

DUCASËN DADA UAID

Mibi ismenuequin dada uaquid Ducas nebi.

1 ¹Utsin-utsinquien ambi naidbëdtabi Esuquidistu chuibanquin dada uaid dadpen iquec. ²Aidon Esuquidistun tauain naidbëdtabi ambi naid utsitedi isted-istedquin chuibanquin chiacpaden dada uaidtedi nec. ³Esuquidistu chuibanquin dada uaid isbanquimbi Esuquidistu isnëdaidon chuibanaid tantiashun aidtedi mibi chuibanquin dada uaimbi, chuiquid dapa, Teyopido. ⁴Abimbo iquec quequin ëmbi dada uaid ma tantiapanueshun mibi chuiquin dada uaimbique. Isec onqueta.

Uan, acten mentoanquid tishte chiaid

⁵Nidaid Udeya caid yacno Edodes cuëmëdquid ancanquid icnubien Nuquin Papan namiaidquio Sacadias cuëmëdquid icpanëdash. Aidi, Abiasën tsyuecquid Adonën tsyuecquidbidi nepanëdash. Aidi, Nuquin Papa tabadte shubu uashunaid nuntanshun nashunquid icpanëdash. Aidën chido Adonën tsyuecquidbidi icpanëdash. ⁶Aton bënëbëdi Nuquin Papan chiaid tantiaquin naquidquio icpanëdash. Adquid icsho Nuquin Papan bëdamboen isaidquio aid daëdi icpanëdash. ⁷Edisabed bacuë tishesa icpanëdash. Adquid yequi aton bënëbëdi tsusio budpanëdash. ⁸Adashic, Nuquin Papa tabadte shubu uashunaid nuntanshun nabanuec

padpidemboec Sacadias puduedpanëdash. ⁹Ambi noadte bëda tauite ushë chonoc Sacadias aid shubun puduedpanëdash. Ënden abipadquid utsibobëdtan abi cuëmëdquid-cuëmëdquidquien dada uashun dada uatempï tëchun sandoshon cadotaniac ambi dada uatsaidëmpi abia puduenacsho isacpadec Sacadias puduedpanëdash. ¹⁰Noadte bëda tauinuec utsi puduedtemaid quënë yacno puduedpanëdash. Ambo Sacadias puduedash icnubi Nuquin Papa tabadte shubu uashunaid puduedte quënë yacno utsibo dadpen Nuquin Papa chiech onquecuededpanëdash.

¹¹Adnubien utsi puduedtemaid quënë yacno Sacadias icnubi ambobi Nuquin Icbon chomiaid, ambi uaid mayan bëda, chopanëdash. Noadte tauinun sanaid dayun abiucquio tabadpanëdash. ¹²Adec tabadsho isash dacuëdampambo iquec, quetanec Sacadias uëdëquiampañdash. ¹³Adsho isash Nuquin Papan uaid mayan bëda nadpanëdash: —Bacuë bunquin mimbi chian-chiamboed Nuquin Papan tantiaidquio neque. Dacuëdenda, Sacadias. Min chido Edisabedën min mado tishendac. Min mado tishacsho Uan cuënta. ¹⁴Min chidon tishaid isash mibi bëdambo iquendac. Aidi mibi bëdambo icmequid iquendac. Aidën chuibanaid tantiash matses dadpen bëdambo iquendac. ¹⁵Aidi Nuquin Papan bëdamboen

isaidquio iquendac. Paëmbocquid min madon isuidendac. Abi tishaid ushën abëd icmenuequin Nuquin Papan aton Mayan meniaidquio min mado iquendac. ¹⁶Nuquin Papan chiaid tantiaquidquio icquin aidën chiac isadaidbo dadpen Nuquin Papan chiaid niacquid icboedi, Con Icbo Nuquin Papan nec, queoaindac. ¹⁷Min mado Nuquin Icbo bëyucanec choendac. Tsusedpa Ediasën chiampicpadquiequi dacuëdenquio icquin cuembo chuibanquidquio min mado iquendac. Aden chuibanquid Nuquin Icbo bëyucanec choendac. Tsusedpabon tishmiaidën tsyuecquid dadpen tantiesabo icboedi min madon chiac tsusedpabopadquid tantiaquidquio nëbi tabadquido iquendac. Aido Nuquin Papan chiaid niacboedi min madon chiac Nuquin Papan chiaid naquidquio iquendac. Nuquin Icbon matses aido icmenuen min madon chuibanendac —quepanëdash Nuquin Papan uaid mayan bëda.

¹⁸Aden Nuquin Papan uaid mayan bëdan chiaquien Sacadiasën: —¿Mitsipadentsimbi mimbi chuiboed tantiapè? Con chidobëdi tsusio budpobi —capanëdash.

¹⁹Adoquien: —Ëbibi, Cabaded nebi. Nuquin Papan abëd tabadquin namiaidquio nebi. Nuquin Papan ambi chiacpadomboen mibi chuimenuen chomiaid nebique. ²⁰Tantia. Chuinu. Min chidon bacuë tishendac, quequin Nuquin Papan chiaid ëmbi chuiboed tantienquio icsho mibi eme uaindac. Min chidon bacuë tishan padpidec mibi onquianoaindac —quepanëdash Nuquin Papan uaid mayan bëda Sacadias caic.

²¹Adnubien noadte bëda tauite quënënuësh Sacadias baded puduenenquiocsho isash, Baded puduenenquiocpec, quequin cainec

tabadpanëdash utsibo. ²²Aden yuen caimbudnubien puduenash onquenuequi buëd cuëdenquiocpanëdash Sacadias. Adsho isun: —Ushquin isacbimboen isbenac —cabededpanëdash. Adnubien Sacadiasën iccuededquido nidmenuen mëdante uic-uiccapanëdash.

²³Adashic, Nuquin Papa tabadte shubu uashunaid nuntanshun nashunte ushëted nainash aton shubuno Sacadias nidoapanëdash. ²⁴Ambo choash yuec tabadnubien aton chidon bacuë usundopanëdash. Aden usundoash mëdante auc abentsëcted ushë nidmec aton shubu nuntan icpanëdash. ²⁵Adec tabadec Nuquin Papan naid chiec nadec Edisabed onquepanëdash: —Bacuë usundoenquiocpec, cabededboedëmbi nëbi macho budshumbi ëmbi bacuë usundoacsho utsibon ëbi isec. Ëbi tantiaquin Nuquin Papan usundomiaid nebi —quepanëdash Edisabed.

Esus tishendac, quequin chiaid

²⁶Adashic, Edisabedën bacuë usundoan ushë 6ted nidan nidaid Cadidia caid yacno shubu dadpen icquid Nasaded caid yacno Nuquin Papan Cabaded chomeoapanëdash. ²⁷Ambo aton chido bedabiquid, tsusedpa Dabidën tsyuecquid Ose cuëmëdquid icpanëdash. Aidi ambo tabadnubien uano aton chido Madia cuëmëdquid tsadacno Cabaded chopanëdash. ²⁸Adec choshon: —Mibi tantiaquin Nuquin Papan bëdamboen icmiaidquio mibi nec. Nuquin Icbo mibëdi tabadendac —capanëdash Cabadedën.

²⁹Adoquien Madia, ¿Atotsi quepeba? quequin otacquio tantiec tsadpanëdash.

³⁰Adec tsadsho isun Cabadedën: —Dacuëdenda. Mibi bëdamboen tantiaquin Nuquin Papan naden nanu quequin chiaid nad iqueque. ³¹Chuinu.

Tantiata. Bacuë usundoshon min mado mimbi tishendac. Tishun, Ēmbi tishaid Nuquin Papa yacno yuedanquidquo nec, quequin Esus cuënta. ³²Mimbi tishaid chuiquid dapa iquendac. Aden mimbi tishaid isec, Nadatiambocquidën madombo nec, quecuededpendac utsibo. Tsusedpa Dabid chuiquid dapa Nuquin Papan icmiacpadomboembidi chuiquid dapa min Mado Esus icmeoaindac. Adoac Chuiquid Dapa Abentsëcquiobi aid iquendac. ³³Adec tsusedpa Acobon tsyuecquido ënenquiocquin chuiquid dapa min mado Esus iquendac —quepanëdash Cabaded Madia chiec.

³⁴Adoquien: —¿Mitsipadentsimbi bacuë usundoshon bacuë tishpe? Chudabicquid nebi —quepanëdash Madia.

³⁵Adoquien: —Nuquin Papan Mayan mibëdi tabadnuc mimbi tishendac. Aden Nadatiambocquin naidënquo Madia usundomiaid, icsa nibëdquid, Nuquin Papan madombobi nec, utsibon cabededendac. ³⁶Min utsi Edisabed macho icquin bacuë usundoenquiocboedëmbi nëbi bacuë usundoac. Usundoenquiocquid nec, cabededboedëmbi nëbi ushë 6ted nidan usundoac. ³⁷Utsin natiapimbo yaid Nuquin Papan naidquo nec —quepanëdash Cabaded.

³⁸Adoquien Madia: —Ai, con Icbon namiaidquo nebi. Ma mimbi chiapadquo icpanuna —quepanëdash. Aden chiaquien Cabaded nidpanëdash.

Madia Edisabed isedec nidaid

³⁹Adashic, aton na nacnenanec Madia tsusedpa Udan tsyuecquidon nidaid macuësh yacno badedi nidpanëdash.

⁴⁰Adec nidashic Sacadias oncamenquo yaidën shubu yacno choec puduedshun Sacadiasën chido, Edisabed istuidash: —Mibi isnuec chobi —Madia quepanëdash. ⁴¹Adsho Edisabedën

tantianubi aton bacuë comapenec cuididiquiampanëdash. Adec aton bacuë cuididiquenubi Nuquin Papan Mayanën tantiamiac Edisabed ⁴²Madia chiec nadece comapenec onquepanëdash: —Nuquin Papan bëdamboshë icmiaidquo mibi nec. Mimbi usundoaid adembidi bëdamboshë icmiaidquo nec. ⁴³Nuquin Icbon tita mibi yec ñatotsi quiaish ëbi isnuec cho? ⁴⁴Mibi isec chobi, mibi qesho ëmbi tantianubi, Cuishon, quiacbimboec con bacuë cuididiquianosh. ⁴⁵Nuquin Icbon tantiapadomboen chuisho tantiaquid mibi iquec mibi bëdambo icted-ictedendac —quepanëdash Edisabed Madia chiec.

Nuquin Papan naid chiec Madia cuëdënaid

⁴⁶Adnubien Madia nadece onquec cuëdëmpañdash:

“Nuquin Papan naid chuibanu. Tantia.

⁴⁷Ēbi usundomiaid Nuquin Papa yacno Yuedanquid nec, quequin tantiec bëdambo iquebi.

^{48,49}Ēbi ambi namiaid icsho bëdamboen isquin Nuquin Papan naosh. Adoacsho, Nuquin Papan bëdamboshë icmiaid Madia nec, quequin abitedishunquo tantiabededendac.

Adembidi aton tsyuecquidon tantiabededoaic.

Nuquin Papa icsaisa iquec. Icsatiapimbo iquec.

⁵⁰Ambi chiaid tantiaquin naquid icsho, Mimbi naid icsa cuidnu, quenquiocquin abëdi shubu abentsëquën tabadacimboecnuc adquid tabadmendac. Adenuidi tantiaquin nampidquo abi iquec.

⁵¹Nadatiambocquin naded-nadedquidquo Nuquin Papa nec.

Ëmbibi tantiacpadomboen naimbi,
quequid icsho isun Nuquin
Papan cacumiac uano
tabadendac.

⁵² Ancanquid daba icboedi utsin
namiaidquio adquid iquendac.
Utsin namiaid icboedi chuiquid
Nuquin Papan icmendac.

⁵³ Ambi chiaid tantiec bēdamboec
tabadte comapenec
bunquiacpaden naquidquio
Nuquin Papan icmendac.
Con na ëmbi bedaiduidi tantiec
bēdamboec tabadebi quequid
unēsacsho cacumiac uano
tabadendac.

⁵⁴ Chuiquid Dapa Abentsēcquiobi
chidon usundoendac, quequin
ambi tsusedpabo
chuiamiapicpadomboen Nuquin
Papan ëbi usundomiac.

⁵⁵ Tsusedpa Abadauambēdta aton
tsyuecquidtedi ambi
tantiampicpadomboen Nuquin
Papan ëbi usundomiac.
Mimbi usundoaid ëbi yacno
yuedanquid nec, quequin Nuquin
Papan ambi tantiampicpadembi
ëbi isec,”

quec comapenec cuēdēnash Madia
ënēdpanēdash. ⁵⁶Adec ënēdash
Edisabedbēd ushē daēd nidmec
tabadashic ushē utsi nidbudtsēcñubi
aton shubuno nidoapanēdash.

Uan tishaid

⁵⁷ Adnubien Edisabedēn bacuē tishte
ushē chonoc dada bacuē tishpanēdash.
⁵⁸ Bacuē tishenquiocboedēmbi nēbi aton
bacuē tishosh, qesho tantiash aton
matses ado shubu utsinquidotedi
Edisabedbēd bēdambo icpanēdash.

⁵⁹ Adashic, 8tedec ushtanquin
Edisabedēn madon shui dēbid
dēteshunu qesho tantiash utsibo

cho-chopanēdash. Choash puduedash
bacuēmpi aton papa cuēmēdquid cuēnu
quenubi ⁶⁰Edisabed: —Padenquio. Abi
cuēmēdquid Uan nec —quepanēdash.

⁶¹ Adoaquien utsibo: —Min matses utsi
Uan cuēmēdquid nibēdec —queshun
⁶² Sacadias ismenuequin mēdante
uic-uiccaquin: —Abi cuēmēdquid chui.
Tantianu —capanēdash utsibon.

⁶³ Adoaquien dada uate bedshun, Abi
cuēmēdquid Uan nec, quequin dada
uaquin Sacadiasēn ismepanēdash.

Adoaquien: —¿Abimboda mimbi
cape? —quecuededpanēdash utsibo.

⁶⁴ Adnubien Nuquin Papan oncameoac
Nuquin Papan naid Sacadiasēn
chuibampanēdash. ⁶⁵ Aden chuibansho
tantiash: —Dacuēdampambo iquec.
¿Atotsiepashun onquenquiocboedēmbi
nēbi onquequin Nuquin Papan naid
chuibampec? —quecuededpanēdash
utsibo.

Aden tantianec aton shubuno
nidaneshun ambi isboedbēdtabi ambi
tantiaboed utsibon chuipanēdash. ⁶⁶ Adoac:
—¿Mitsipadquidquio aton mado nepec?
—quecuededpanēdash Sacadiasēn mado
Nuquin Papan tantiamiaidquio isbededec.

Sacadias oncamiaid

⁶⁷ Adnubien Uanēn papa Sacadias
Nuquin Papan Mayanēn oncamiac
nadec Esus chiec onquepanēdash:

⁶⁸ “Nuquin Papa isadaidbon Icho nec,
quequin chuibanuna.

Aidēn isadaidbo icsaquid icsho
cuidnushe quiaish abided
cuidadquid chomiāc mayan icsan
yuaid icboedi aidēn
mēnchictequidquio isadaidbo
iquendac.

⁶⁹ Abi mēnchicquid nadatiamboquid
nendac.

Tsusedpa Dabidēn tsyuecquidquio
aid nendac.

- ⁷⁰ Ambi chuimaidon
chiampicpadembi
Nuquin Papan adquidquo icmianac.
- ⁷¹⁻⁷³ Nuquin tsusedpa Abadauan
tantiaquin
Nuquin Papan ambi
chiampicpadembi nuquin
tsusedpabo
aton tsyuecquidbëdtabi abi
chieshënkido
nidtiapimbo yacombo abi yacno
yuedanquid
Nuquin Icho Abentsëcquiobi nec.
- ⁷⁴ Abi cudasquin mënchicaid yec
dacuëdenquo yec
Nuquin Papan namiaidombo
iquendac.
- ⁷⁵ Adquid yec icsaisa abipadquo
bëdamboec tabadquid icsho
nuqui aidën isendac
ënenquiocquin.”
- Adec Esus chiec onquiashic nadec aton
mado chiec Sacadias onqueoapanëdash:
- ⁷⁶ “Adnubien nëbi Nuquin Papan
chomiaid chuibanquidquo
mibi nec, quequin utsibon mibi
cuënendac, mado.
Nuquin Icho choec, quequin utsibon
tantiabincuc
bëyuc tantiashun abi chuiquidquo
mibi iquendac.
- ⁷⁷ Adquid icquin mibi icsaquid icsho
cuidnushe quish
abided cuidadquid tantiasho isash
Nuquin Papa mibi icsaid
tantienquo yec bëpiscudendac,
quequin chuibanquid mibi
iquendac, mado.
- ⁷⁸ Nuquin Papan matses tantiaquin
naquidquo icquin
abipadquidquo icsaisa abi
yacnoshon chomiaidquo
iquendac.
- ⁷⁹ Aidën tantiamiac unësash abi
iquendac.

Adquid shubu abentsëquën
tabadacpadec tabadendac,
quequin mimbi chiendac, mado,”
quec Uanën papa Sacadias Nuquin
Papan Mayanën oncamiac
onqueapanëdash.

Matses nibëdacno Uan tabadcueniaid

⁸⁰ Adashic, Sacadiasën bacuë Uan
caniascho Nuquin Papan tantiamiaid
yequi matses nibëdacno
tabadcuenepanëdash ambi Esus
chuibante ushë choabincuc.

Esus tishaid

(Mat. 1.18-25)

2 ¹ Adnubien, Doma yacno tabadquid,
isadaidbo ancaquid dapambo,
empedadod caid, Aucusto cuëmëdquid
icpanëdash. Aucuston, ¿Ëmbi ancaido
isadaidbo aton nabëdta tedtsi iqueque?
Isquin tantiata, quequin Sidenio
cuëmëdquid chuipanëdash. ² Sidenio
nidaid Sidia caid yacnocquido chuquid,
cobednadod caid icpanëdash.

³ Min tsusedpa tishampid yacnoshon
mibi cuëmëdquid mitsanabëdtabi dada
uanuec nidtan, cac abëd icquido buanec
isadaidbo nidanepanëdash.

⁴ Adece utsibo nidnubien Ose aton
chido Madiabëdi nidaid Cadidia caid
shubu dadpen icquid Nasaded caid
yacnoësh puduanec nidequi aton
tsusedpa Dabid caid tishampidnombobi
nidaid Udeya caid yacno shubu dadpen
icquid Beden caid yacno chopanëdash.
⁵ Aton chido Madia bacuë nua
usunquidbëdi Ose abi cuëmëdquid aton
nabëdtabi dada uanuec Beden yacno
chopanëdash. ⁶ Ambo choquin aton
bacuë nuambo usumpanëdash. ⁷ Ambo
matses dadpen cho-choash shubu
abitedi puduedash tsucus-tsucustsëcquo
tabadnuc nidaidën capuquid tabadacno
puduedshun ambi bëyuc usundoaid

Madian tishpanëdash. Tishun dashcute cuësh-cuëshun dapucshun nidaidën capuquidën pete sanaid cuesten ambi bëyuc tishaid dada bacuë Madian nampanëdash.

**Obeca pemebanquin buanquido
Nuquin Papan uaidon chiaid**

⁸Aden Beden yacnoshon Esus tishnubien shubu nibëdacno obeca dadpen pemebanquin buanquido inchëshbudtsëqui choec tabadtuidpanëdash. ⁹Inchëshbudtsëqui choash tabadnubien inchëshnuc Nuquin Papan chomiac ambi uaid mayan bëda abuc chopanëdash. Aid uëshëmbo chënquenuc obeca pemebanquin buanquido dacuëdcuededpanëdash.

¹⁰Dacuëdscho isash: —Chiaid bëda chuinec chobique. Dacuëdenquiocquin tantiata. Chuinu. Ëmbi chuitequid bëda mibi, Cuishon, quetequid nendac.

¹¹Nëbimbobi tsusedpa Dabid tishampid yacnoshon Beden caid yacnoshon mibi Nuquin Papa yacno yuedquid, Quidistu, Nuquin Papan Chomiaid tishosh. ¹²Abi tishacno nidshun naden mimbi aidi ispec. Dashcute cuësh-cuëshun dapucaid nidaidën capuquidën pete santen uesho mimbi istuidendac. Bacuëmpi adquieci uesho istuidash, Nuquin Papan chomiaid Quidistu nec, mibi quependac. ¹³Aden chieci Nuquin Papan uaid mayan bëda onquenubien abëdi abipadquid utsi dadpen choash Nuquin Papan naid chieci nadec cuëdëncuededpanëdash:

¹⁴“Nuquin Papa abucquio tabadquid abitedi uauquidquio bëdamboshë iquec.

Nuquin Papan bëdamboen isaido ma abëdi tabadpanuna,” quec cuëdëmpañëdash. ¹⁵Adec cuëdënash Nuquin Papan uaido mayan bëdabo abuc nidoapanëdash. Adec nidan obeca pemebanquin buanquido

Nuquin Ibon chiaid nanuec: —Nuquin Papan nuqui tantiameboed bacuëmpi isnuec Beden yacno nidnu. Nid —quianec nidpanëdash. ¹⁶Adec nidshun nidaidën capuquidën pete santen bacuë nanacsho istuidpanëdash. ¹⁷Isanec nidquimbi ambi isboedbëdta ambi tantiaboed chiac ¹⁸tantiaquidtedi: —¿Midapadquidien capec? —quecuededpanëdash. ¹⁹Aden obeca pemebanquin buanquidon chiaid tantiash bëpiscudenquio yec Esusën tita, Madia, ¿Mitsipadquid con bacuë nepec? quequin bëpiscudenquiocquin tantiadenepañëdash.

²⁰Adnubien Nuquin Papan chiaid chuibocpadquiocsho isash obeca yacno choash obeca pemebanquin buanquido: —Ëmbi isboed ëmbi tantiaboed Nuquin Papan naidquio nec —quequin chieci onquecuededpanëdash.

**Nuquin Papa tabadte shubu uashunaid
yacno Esus buanaid**

²¹Adnubien 7tedec ushtanquin aton madon shui dëbid dëtemiacsho isun, Nuquin Papan uaid mayan bëdan chiacpadomboen cuënaid Esus nec, quequin Madian aton mado cuëmpañëdash.

²²Adshumbic, bacuë tishun aid bacuën shui dëbid dëtemeshun ushë abentsëc nidan utsi chotsëcnuc Moises Nuquin Papan dada uamiacpaden nanuen Madiabëdtan Osen Esus Edusaden yacno buampañëdash. Edusaden yacno choash Nuquin Papa tabadte shubu uashunaid yacno choshon, Con bacuë Nuquin Papan namiaidquio nec, quequin ismepañëdash. ²³Nuquin Papan naden nata quequin chiaid nad iquec: Bëyuc tishaid dada bacuë ëmbi namiaidquio con na nec. ²⁴Mimbi bëyuc tishaid bedte bunquin ëbi tabadte shubu uashunaid

yacno mimbi buanaid min mado
cuidtequidoain dëbin daëd
cuesunemeta. Dëbin nibëdnuc masën
bëdambocquid daëd cuesunemeta. Aden
nanuec Edusaden yacno choash aton
mado niantiapimbo yec Madiabëd Ose
Nuquin Papan chiacpadomboen nanuec
aton madobëdi puduedpanëdash.

²⁵Adnubien Edusaden yacnombo
tabadquid Simeyon cuëmëdquid Nuquin
Papan naden nata quequin chiaid
tantiaquin naquidquio icpanëdash. Aidi
isadaidbo chuquid dapa abentsëcquiobi
cainquidquio icpanëdash. Aidi Nuquin
Papan aton Mayan meniaidquio
icpanëdash. ²⁶Aidi Nuquin Papan
Mayanën tantiamiac, Chuquid Dapa
Abentsëcquiobi Nuquin Papan
bëdamboen isaidquio choacsho
unësabicquin isendambi, quequin
tantiapanëdash. ²⁷Adembidi Nuquin
Papan Mayanën nidmiac Nuquin Papa
tabadte shubu uashunaid yacno nidequi
Simeyon puduedpanëdash. Ambo
puduedash capunubi Nuquin Papan
naden nata quequin chiaidquio nanuen
aton bënëbëdtambi Madian Esus
bëpanëdash. ²⁸Esus bësho isun
Simeyonën Esus bedshun icucquin
Nuquin Papan naid naden
chuiбанпанëdash:

^{29,30}“Abitedishun Icho icquin mimbi
ëndenquio chiampid nëbi nëid
isembi.

Nëid isash unësmane quenquio yec,
Cuishon, quec unësebi, Papa.

³¹Mibi yacno yuedanquid nëbi isembi.
Nëid mimbi chomiaid icsho ma
abitedishunquio ispanuna.

³²Nëidëmbi mimbi tantiacpaden
chuiбанquin
isadaidbo bëdambo icmendac,”
quepanëdash Simeyon.

³³Aden chuiбанubi,
¿Midapadquidquien con mado capec?

quequin Madian aton bënëbëdtambi
tantiapanëdash. ³⁴Esus chuiбанquin
naimbudshun Osebëda Madia chiec
Simeyon: —Bëdambo icmiaid mibi
daëdi nec —quepanëdash. Aden
chuishumbic Madiuidtsëqui naden
Simeyonën chuiopanëdash: —Chuinu.
Tantiata. Nëid bacuë tantiesa isadaidbo
utsi-utsiec icsho Nuquin Papan uquë
nësecaindac. Min mado tantiaquid
utsi-utsiec icsho Nuquin Papan abi
yacno puduedmiaid iquec bëdambo
iquendac. Min bacuë, Esus, Nuquin
Papa yacno puduedmianquid nec,
quesho tantiaishun matses dadpenshun
icsamboen chuided-chuidedendac.

³⁵Adsho ambi ompoquin naid icsabëdta
ambi tantiaid icsa tantiamequid min
mado iquendac. Adobanquin ismiac
unës uasho isash mibibi unësquio yec,
Con madon natiambo iquebi, mibi
quendac —quepanëdash Simeyon Madia
chiec.

³⁶Aden Simeyonën chuinubi Nuquin
Papan naden nanu quequin chiaid
chuquid chido Ana cuëmëdquid
icpanëdash. Aidën papa Panued
icpanëdash. Aidën tsusedpa Ashed
icpampic. Aid aton bënënen bedac abëdi
seta 7ted matamiash tabadnubi ³⁷aton
bënë unësapanëdash. Aton bënë unësan
Nuquin Papa tabadte shubu uashunaid
yacno nidshun Anan tabadec
nidenquiocquin Nuquin Papauidi
tantiaquin buna mëmbudnequin
Nuquin Papa chuidenepanëdash.

³⁸Ambo icnubi Esus bësho isun Anan
Nuquin Papan naden nanu quequin
chiampicpaden chuiпанëdash:
—Isadaidbo icsaquid icsho cuidnu caid
mënchictequid nëid nec —quepanëdash
Ana Esus chiec utsibon tantianubi.

³⁹Adashic, Nuquin Papan naden nata
quequin chiacpaden nainash Osebëd
Madia nidaid Cadidia caid yacno

nidoash Nasaded caid yacno abi tabadacno choapanëdash. ⁴⁰Ambo tabadnubi aton bacuë Esus dada bëdambo yec canicuempañëdash. Aidi comapenen tantiaquidquio Nuquin Papan bëdamboen isaidquio icpañëdash.

Canicuenash Nuquin Papa tabadte shubu uashunaidën Esus tabadaid

⁴¹Adashic, Ëmbi bëyuc tishaid unës uamenushe qeshun intaquën aton shubu shëcuë ëcnoshcacsho isun aidon bëyuc tishaid unësmenquiocquin Nuquin Papan uaid mayan bëdan matampampid tantiate ushë yanuc Madia Osebëd Edusaden yacno nidoapanëdash. Nuquin Papan chiacpadequi setan-setanquiec nidtenepañëdash. ⁴²Adecbidi, Esus abi tishaid seta 12ted yanash canicuenash anibëd Edusaden yacno nidpañëdash. ⁴³Adec ambo nidashic nami uabicquid petequid tantiaid ushëtedi tantiec tabadtenepañëdash. ⁴⁴Adec ambo tabadquin nainash Esus ambobi icnubi tantienquio yec Madia Osebëd auëshquio nidoapanëdash. Adec nidash inchëshbudtsëqui abëd chobedo yacno capuquin Esus nibëmbenepañëdash. ⁴⁵Aden nibënquin istuidabi yec Edusaden yacno padpidec nidoapanëdash. ⁴⁶Daëdec ushquin nibënshun Nuquin Papa tabadte shubu uashunaid yacno puduedshun Esus tsadsho istuidpañëdash. Ambo tsadec Nuquin Papan chiaid tantiaquiequin chuibanquidbëd onquecuedesho istuidpañëdash. ⁴⁷Adec onquec tsadsho isquin, Bëdamboen tantiaquin chuibanquidquio nëid nec, quequin utsibon tantiabededpañëdash. ⁴⁸Adnubien, ¿Mitsipadquid con mado nepec? quequin otacquo Madian tantiapanëdash. Aden tantiequi:

—¿Atotsi quiaash ëbi daëdi tantienquio yec nëmbo choash mibi tabade, mado? Unësquiocquin papabëdtambi mibi nibëmbeniombi —capanëdash anin.

⁴⁹Adoaquien Esus: —¿Atotsieshun ëbi nibëno? Con Pa shubu uashunaidën tabadnuec chobosh nebi. ¿Tantienquioda mimbi icpe? ⁵⁰Aden Esusën chuisho anibëdtan Osen tantienquiocpañëdash.

⁵¹Adashien: —Nidnu. Nid, mado —anin cac cacuidenquio yec Nasaded yacno anibëdi choash tabadquin Madian chiaidbëdta Osen chiaid tantiaquin Esusën nadenepañëdash. Adec tabadnubi aton titan ambi isboedbëdta ambi tantienquio yaid bëpiscudenquiocquin tantiadenepañëdash.

⁵²Adnubien comapenen tantiec bëdamboec canidopañëdash. Adquid icsho Esus Nuquin Papan bëdamboen isacpadomboen adomboembidi matsesën isbededpañëdash.

Esus choec, quequin Uan mentoanquidën chiaid

(Mat. 3.1-12; Mad. 1.1-8; Uan 1.19-28)

3 ¹Adashic, seta 15ted matamec Tibedio Sesad cuëmëdquid, Doma yacno tabadequi abitedi ancaquid dapa, empedadod caid icpañëdash. Aidi Doma yacnocquido ancaquid dapa icnubien Ponsio Pidato cuëmëdquid, nidaid Udeya caid yacnocquido ancaquid, cobednadod caid icpañëdash. Aid daëd ancanquid icnubien Edodes cuëmëdquid, nidaid Cadidia caid yacnocquido ancaquid, cobednadod caidbidi icpañëdash. Ancanquid aitedi icnubien Edodesën utsi, Uedipe cuëmëdquid nidaid Itudeya caid yacnocquidobëdi nidaid Tëdaconite caid yacnocquido ancaquid, cobednadod caidbidi icpañëdash. Ancanquid aitedi

icnubien Disanias cuëmëdquid nidaid
Abidinia caid yacnocquido ancanquid
cobednadod caid icpanëdash.

²Ancanquid aitedi icnubien Anasbëdi
Caipas isadaidbo tsusio dapabo
icpanëdash. Aid daëdi isadaidbo tsusio
icnubien Uan, Sacadiasën mado matses
nibëdacnombo tabadshobi Nuquin
Papan, Ëmbi chiaid chuibanta,
capanëdash. ³Adoac acte Odan caid
cuëmano capuqimbi naden
chui bampanëdash. Mimbi tantiaid icsa
ënta. Aden ënsho isun mimbi
icsambocquin naboed tantienquo
yacbimboen Nuquin Papan mibi
bëdamboen isendac. Ëmbi tantiaid icsa
nainquiocquin ënu, mibi qesho
tantiashun mibi acten mentono,
quequin cho-choquid cho-choquidquien
Uanën chuidednepanëdash.

⁴Ëndenquimbo Nuquin Papan
tantiamiac Isayasën Uan chuiquin dada
uampicpadequi Uan icpanëdash. Naden
Isayasën Uan chuiquin dada uampic:

“Matses nibëdacnombo tabadquidën
ëcauanshun naden chiendac:

Nuquin Icbombo choeque. Aid
tantianu, quequin mimbi tantiaid
icsa ëmbanta.

⁵Umbo ancuenquo chosho isnu
quequin cuembocnoc andëdshun
ambescabanacbimboen abimbo
chuiquidënquo chiaid tantianu,
quequin mimbi tantiaid icsa
ëmbanta.

⁶Aden ënshun Nuquin Papa yacno
pudedmianquid chuiquid dapa
abentsëcquiobi cuembocnoc
mimbi tantiabënëdash,”
quequin Isayasën Uan tishabicnuc
chuiquin dada uapampid nec.

⁷Aden ënden chiampicpadequi Esus
bëyucanequin acten mentomenuc
cho-choquid dadpen icsho Uanën
nadopanëdash: —Nisin bacuë

anipadquid nec. Aidbimboecquid
icsambocquid mibi neyoc. Mibi adquid
icsho isun ëtsuntsin Nuquin Papan
cuidnushe qeshun ambi mënchictequid
icta, quequin mibi chiosh? ¿Aidën
chiaid tantiashta acten mentomenuc
cho? ⁸Mentomete bunquin mimbi
tantiaid icsa ënshun bëdamboec
tabadquin utsibo ismebanta. Nuquin
tsusedpa Abadauan Nuquin Papan
bëdamboen isaidquo icpampic. Ambi
tishmiaidën tishmiaid caidaid ëbi icsho
Nuquin Papan bëdamboen isaidquo
nebi, quequin tantienda.

Abadauampadquid ambi chiaid
tantiaquid bunquin, Matses icta, Nuquin
Papan cac cuënotebi matses iquendac
—quepanëdash Uan. ⁹Adequi
onquebudec: —Cuëte icsatedi matenu,
quequin cuëte bacuëesa dëdshun
mateshun icbon nëdëncaquin tauiec.
Adquiecbidi tantiaid icsambocquid
cuëshëdmenu, qeshun bëdamboec
tabadaid ismesa cuëshëdmeshun chian
anëdënquequid Nuquin Papan nënendac
—quepanëdash Uan.

¹⁰Adoquien: —Chian anëdënquequid
Nuquin Papan nësiate ictiapimbocquin
ëatotsimbi napeba? —quepanëdash
iccuëdedquido.

¹¹Adoquien: —Mibi dasiuidaid daëd
icsho dashcute nibëdquid isun mitsana
abentsëc meneta. Adembidi pete nibëdquid
icsho isun meneta —capanëdash Uanën.

¹²Adecbidi ancanquid dapan matses
utsin na bedtequid nëidted bedta
caidotsen acten mentomenuc
cho-chopanëdash. Choshon Uanën
chui bansho tantiashta: —Chian
anëdënquequid nësiate ictiapimbocquin
ëatotsimbi napeba? —quepanëdash.

¹³Adoquien: —Ancanquid dapan
chiactedtsëqui bedta. Muaquin mitsana
daëd uanuequin bedenda —capanëdash
Uanën aido chuiquin.

¹⁴Adashic, adecbidi sondado cho-choash: —¿Atotsimbi napeba? —quepanëdash Uan caic.

Adoaquien: —Mitsana bedtequid bunquin icsamboen bedenda. Utsin naid tantiashun mua uaquin chienda. Mibi chuiquidën, Nëidtedi menenu, cac, Utsi bec cho, quenda —capanëdash Uanën sondado chuiquin.

¹⁵Aden Uanën chuibansho tantiash: —¿Tsutsi nepec? ¿Nuquin Papan chomiaidta nepec? —quecuededpanëdash cho-choquido.

¹⁶Adsho tantiash: —Mibi acten mentoquidquio nebi. Padnuen ëbipadquidpenquio nadatiambocquid choendac. Aidi bëdamboshëcquid nendac. Adquid icnuc ëbi icsaquid icsho ¿atotsieshun aid choec quequin chuiquidquio Nuquin Papan icmioshi? Aid choshon aton Mayan abi tantiaquidombo aidëmbi menendac. Aden meniac Esus tantiaquidombo ambi tantiaid icsa ënte bunquidquio icmendac aton Mayanën. Adoac ënsho isun pauquendac —quepanëdash Uan.

¹⁷Aden chuibanec nadpanëdash: —Piacbo ëshë uashun bitsi secatanquin nëdëncashun ëshë icbon dayun uacpadomboen abi tantiesa cuëshëdmeshun chian anëdënquequid nësiashun abi tantiaquidtedi abi yacno puduedmendac aidën. ¹⁸Aden Nuquin Papan chiaid dadpen chuibanquin: —Adomboen tantiaquin nabanta —capanëdash Uanën.

¹⁹Adshumbic, ancanquid Edodesën tantiaid icsatsen Uanën chuibampanëdash: —Min utsin chido, mimbi bedaid, mimbi tantiaid icsa neque. Mimbi tantiaid icsa ënta —capanëdash. Aden chuiboshombic adomboembidi padpiden abibidi Edodesën tantiaid utsibotsen chuiopanëdash. ²⁰Aden ambi tantiaid

icsa chuibansho tantiashun Edodesën Uan bedmeshun quënën nauedmepanëdash abitedishun tantianushe qeshun.

Esus acten mentoaid

(Mat. 3.13-17; Mad. 1.9-11)

²¹Quënën nauedabicquid matses dadpen acten mentobampanëdash Uanën. Utsiboba mentoshombic Esustsen mentopanëdash. Adoaquien mentoacnoëshquiobi Esus Nuquin Papa chiec onquepanëdash. Adec onquenubien abu shëcuë nibëdboedi shëcnianec ²²dëbimbimboec cuembo budec Nuquin Papan Mayan Esusën mapino tsadtoec budpanëdash. Aid budnubien abucuësh Esus chiec nadece aton Papa onquepanëdash: —Mibentsëquiobi icsho ëmbi tantiaidquio mibi nec, mado. Adembidi ëmbi bëdamboen isaidquio mibi nec —quepanëdash aton Papa.

Esuquidistun tsusedpabo chiaidtedi

(Mat. 1.1-17)

²³Adashic, abi tishaid seta 30ted icquimbi Nuquin Papan chiacpaden naquin tauapanëdash Esusën. Aden tauaquin chuibansho tantiash aton matses nadpanëdash. Osen mado nec, quiaish, Nuquin Papan mado nec, quenquio yec matses onquepanëdash. Esusën papapenquio Ose icnëdash. Madia aton tita icbo icnuc Esusën tsusedpabo nëidtedi iquec: aton buchido Edi cuëmëdquid icpanëdash. ²⁴Aidën papabic Matac cuëmëdquid, aidën papabic Debi cuëmëdquid, aidën papabic Ana cuëmëdquid, aidën papabic Ose cuëmëdquid, ²⁵aidën papabic Matatias cuëmëdquid, aidën papabic Amos cuëmëdquid, aidën papabic Naun cuëmëdquid, aidën papabic Esdi cuëmëdquid, aidën papabic Nacai

cuëmédquid, ²⁶aidën papabic Mac
 cuëmédquid, aidën papabic Matatias
 cuëmédquid, aidën papabic Semei
 cuëmédquid, aidën papabic Ose
 cuëmédquid, aidën papabic Uda
 cuëmédquid, ²⁷aidën papabic Uana
 cuëmédquid, aidën papabic Desa
 cuëmédquid, aidën papabic Sodobabed
 cuëmédquid, aidën papabic Sadatied
 cuëmédquid, aidën papabic Nedi
 cuëmédquid, ²⁸aidën papabic Medqui
 cuëmédquid, aidën papabic Adi
 cuëmédquid, aidën papabic Cosan
 cuëmédquid, aidën papabic Edmodan
 cuëmédquid, aidën papabic Ed
 cuëmédquid, ²⁹aidën papabic Osue
 cuëmédquid, aidën papabic Ediesed
 cuëmédquid, aidën papabic Odin
 cuëmédquid, aidën papabic Matak
 cuëmédquid, ³⁰aidën papabic Debi
 cuëmédquid, aidën papabic Simeyon
 cuëmédquid, aidën papabic Uda
 cuëmédquid, aidën papabic Onan
 cuëmédquid, aidën papabic Ose
 cuëmédquid, aidën papabic Ediaquin
 cuëmédquid, ³¹aidën papabic Medeya
 cuëmédquid, aidën papabic Menan
 cuëmédquid, aidën papabic Matata
 cuëmédquid, aidën papabic Natan
 cuëmédquid, ³²aidën papabic Dabid
 cuëmédquid, aidën papabic Isai
 cuëmédquid, aidën papabic Obed
 cuëmédquid, aidën papabic Bos
 cuëmédquid, aidën papabic Sadomon
 cuëmédquid, aidën papabic Nason
 cuëmédquid, ³³aidën papabic Aminidad
 cuëmédquid, aidën papabic Adan
 cuëmédquid, aidën papabic Eston
 cuëmédquid, aidën papabic Pades
 cuëmédquid, aidën papabic Uda
 cuëmédquid, ³⁴aidën papabic Acobo
 cuëmédquid, aidën papabic Isac
 cuëmédquid, aidën papabic Abadauan
 cuëmédquid, aidën papabic Tade
 cuëmédquid, aidën papabic Nacod

cuëmédquid, ³⁵aidën papabic Seduc
 cuëmédquid, aidën papabic Dacau
 cuëmédquid, aidën papabic Pedec
 cuëmédquid, aidën papabic Ebed
 cuëmédquid, aidën papabic Sada
 cuëmédquid, ³⁶aidën papabic Cainan
 cuëmédquid, aidën papabic Adpashad
 cuëmédquid, aidën papabic Sen
 cuëmédquid, aidën papabic Noe
 cuëmédquid, aidën papabic Damec
 cuëmédquid, ³⁷aidën papabic
 Matusaden cuëmédquid, aidën papabic
 Enoc cuëmédquid, aidën papabic Aded
 cuëmédquid, aidën papabic Macadaded
 cuëmédquid, aidën papabic Cainan
 cuëmédquid, ³⁸aidën papabic Enos
 cuëmédquid, aidën papabic Sed
 cuëmédquid, aidën papa abia uampid
 Adan cuëmédquid, aidën papambo
 Nuquin Papa abia yanampidquo nec.
 Abi tabadec. Aidedi Esusën tsusedpabo
 nec.

Satanas Esus icsamete bunaid

(Mat. 4.1-11; Mad. 1.12-13)

4 ¹Adshumbic, Matses nebi, quequin
 Nuquin Papan chiacpaden nanuen
 acten mentomepanédash Esusën. Aden
 Uanën acten mentoaquien Nuquin
 Papan Mayanën chiacpadec acte Odan
 caid yacnoësh puđuanec matses
 nibédacnombo nidash tsadpanédash.

²Ushë utsi nidash utsi choaid
 abuctotsécquiecnuc ambobi
 tsadpanédash. Aidedi ushquin penquo
 yash Esus bundopanédash.

³Bundoacsho isash Nuquin Papa
 chieshënquid choash Satanas
 nadpanédash: —Nuquin Papan madombo
 icquin penun cuënotebi pete icta cata
 —capanédash Satanasën Esus chuiquin.

⁴Adoquien: —Padi: “Peteuidi pec
 bédamboec tabadtemaid nec,” quequin
 dada uapampic —quepanédash Esus
 Satanas caic.

⁵Adoshombic, macuësh dapa abucquio yacno Esus buanshun Satanasën badedquio nidaïdtedi ismebampanëdash. ⁶Ismiash: —Nidaïdën icquidtedishun icbo icmiaïdquio nebi. Abitedi con na nec. Ëmbi menenu cac aïdtedi mitsana iquendac. Nidaïdën tabadquidtedi chuiquid dapa mibi icmete bunebi. Adquid mibi icnuc mibi buntequid nibëendac. ⁷Nidaïdën tabadquidtedi chuiquid dapa icnu quequin, Con icbo mibi nec, ëbi casho adquid mibi icmembi —quepanëdash Satanas Esus caic.

⁸Adoquien: —Padi. Nuquin Papan chiaïd dada uapampid nad iquec: “Nuquin Papa abentsëcquobi mimbi tantiaïduïdtsëqui min icbombo neque. Aidën namiaïdquio icta” —quepanëdash Esus Satanas caic.

⁹Adoshombic Edusaden yacno Esus buanshun Satanasën Nuquin Papa tabadte shubu uashunaid macano abucquio tsadumpanëdash. Aden tsadunshun: —Mibi Nuquin Papan madombo yec nëuëshquio dacuëdenquio yec pudunta. ¹⁰Naden dada uapampid iqueque. Tanti. Chuinu.

“Mibi pudunsho isun, Tsicatequin bëdamboen budmeta, quequin Nuquin Papan ambi uaido mayan bëdabo chiendac.

¹¹Aidombi min taën tsasimbocquid tincanushe queshun uïdën uaquin mibi bëdamboen budmendac.”

Aden min Papan chiaïd icnuc dacuëdenquio yec pudunta —capanëdash Satanasën Esus chuiquin.

¹²Adoquien: —Chuinu. Tantiata: “Nuquin Icbon ambi chiacpadembida natsiashe, Isnu, quequin tanenda,” quequin Nuquin Papan chiaïd chiampid utsi iquec —quepanëdash Esus Satanas caic.

¹³Aden chiaquien Satanasën Esus icsamboen namenuen tanquin naimbudpanëdash. Aden naimbudequi, Padpidemboen ëmbi chiaïd namenuequin Esus tanun nanuna, quequin ambibi tantianec Esus nianec Satanas nidpanëdash.

Nasaded yacnocquido Esus bunesabo

(Mat. 4.12-17, 13.53-58;

Mad. 1.14-15, 6.1-6)

¹⁴Adashic, Nuquin Papan Mayanën tantiamiaïdquio iquequi matses nibëdacnoësh Cadidia yacno Esus choapanëdash. Choacsho isun, Nuquin Papan Mayanën tantiamiaïdquio nec, quequin abi isquidon chiac dëuequidon tantiaïpanëdash. ¹⁵Adnubic, Nuquin Papan chiaïd chuibante shubu utsin-utsinquec puduedcuenequin Nuquin Papan chiaïd Esusën chuibampanëdash. Aden chuisho tantiaish, Nuquin Papan chiaïd tantiaïquidquio Esus nec, quec cuëdëncuededpanëdash.

¹⁶Adashic, Nasaded yacno abi caninëdacno Esus nidoapanëdash. Ambo choash chonoadtemaid ushën Nuquin Papan chiaïd chuibante shubu yacno nidash abi puduedteniacpadequi puduedash Nuquin Papan chiaïd isec onquenush nidtopanëdash. ¹⁷Nidtosho isun Nuquin Papan chiaïd Isayas cuëmëdquidën dada uapampid anocquidën Esus menepanëdash. Aden aid meniac sananquin seccudoabanquin isbanec nadec Esus onquepanëdash:

¹⁸“Nuquin Icbon Mayanën namiaïdquio nebi. Aidën Nuquin Papan chiaïd tantiambo yaid chuibanta caid nebi.

Quënën nauedaido ambi tantiaïd icsa ëmenuen chuibanta caidquio nebi. Aidëmbidi Satanasën yuaid Nuquin Papan bacuë

icmenuequin chuibanta caidquio nebi.

¹⁹ Aidën Nuquin Icbon bēdamboen iste chuibanta caidquio nebi.”

²⁰ Adec isec onquequin nainshun dada uaid bidicashun meniash tsadpanēdash Esus. Adec tsadsho shubu nuntan icquidtedishun bēisbededpanēdash.

²¹ Adoac: —Nuquin Papan chiaid mimbi tantiaboed nēbimbobi tauadoec —quepanēdash Esus abibi chiadequi.

²² Adoaquien: —Bēdamboen chuipec. ¿Mitsipaden tantiaid ambi chiaid nepeba? —quecuededpanēdash. Adec onqueboedobi: —¿Osen mado Esus nenquioda ictic? —queoapanēdash.

²³ Adoaquien: —Bēdamequid yequi abibi daicsambo yanash bēdamiadacsho isash, Bēdamequidquio nec, quequin matsesën tantiapec, quequin chuiampid nec. Ēmbi Capednaun yacnoshon nabambocpadomboen nēshuntsen nabansho isun, Nadatiambocquin nabanquid nec, quequin mibitedishun tantiapec.

²⁴ Abimbo chiembique. Tantiata —quiash Esus abi onquec: —Nuquin Papan ėmbi tantiamicpaden chuibanta caidën abi caniacnoshon chuibansho tantienquiocquid icpec.

²⁵ Ēndenquimboshē adomboembidi Nuquin Papan ėmbi tantiamicpaden chuibanta caid Edias cuēmēdquidën chuibansho tantiesa icpampic. Aidi icnubien isadaidbon bēnua chidobo dadpen icpampic. Aido adquid icnubien seta abentsēc chotsēcnc matamec aton pete nibēdquiec yanubi isadaidbon bēnuabo bunec tabadpampic. ²⁶ Adec bunec tabadsho isun, Isadaidbon bēnua yacno nidta, quenquiocquin isadaidpembon bēnua yacno pemenuc nidta cac Edias nidshun ambi chiacpadomboen isadaidpembon bēnuan nanuc aton pete

uesadenquiocpampic. Aid chido shubu dadpen icquid Sadecta caid yacno tabadpampic. Sadecta shubu dadpen icquid Sidon caid anentsēqui icpampic. ²⁷ Adashic, adecbidi isadaidbo abi daushumbo yacno mishac mishadenquio yacimbocquido dadpen icpampic. Adquido icnubien Nuquin Papan namiaidquio utsi Ediseyo icpampic. Aidēmbi isadaidbo daushumbocquido bēdamenquiocquin isadaidpembo abentsēc Naman cuēmēdquid Ediseyon bēdamepampic. Ēbi bēdamepec, quequin tantiec aton nidaid Sidia caid yacnoēsh choacsho Ediseyon Naman bēdamepampic —quepanēdash Esus.

²⁸ Aden Esusën isadaidpembo nashumpampid chuisho tantiash iccuededquido isadaidbo comapenec nēishpanēdash. Isadaidpembobēd isadaidbo ictiapimbo iquec, quec iccuededquido nēishpanēdash. ²⁹ Adec nēishash nidane nuntanuēsh puduenanec shubu ėnēdacno nidshun acte dapa quiusudacnombo nebudnuequin Esus buampanēdash. ³⁰ Aden nidmiaquien matses dadpen icquid natsusash Esus nidpanēdash.

Mayan icsa dapuduedaid cuemete (*Mad. 1.21-28*)

³¹ Adec abi caniacnoēsh Nasaded caid yacno nidtanashi nidaid Cadidia yacno nidequi Capednaun caid yacno Esus choapanēdash. Ambo choash chonoadtemaid ushē icnuc Nuquin Papan chiaid chuibante shubun puduedshun Nuquin Papan chiaid chuibampanēdash. ³² Aden chuibansho tantiash: —Ambia tantiaquidën chiacpaden chuibanquidien Esus nechitec —quecuededpanēdash anocquido.

³³ Aden Esusën chuibanubien Nuquin Papan chiaid chuibante shubu nuntan

mayan icsa dapuduedaid icpanëdash.
 Aidi comapenec sidquetanec onquec:
³⁴—¿Nasaded yacnocquid Esus caid
 atotsi quec mibi cho? ¿Ëbipadquidtedi
 naimbudmenuecta cho? Ëmbi isaid mibi
 nec. Nuquin Papan bëdamboen
 isaidquio, icsapenquiocquidquio mibi
 nec —mayan icsan caquien:
³⁵—Otaquio tabad. Adec tabadec
 dapuduenta —Esusën cac mayan icsan
 abi dapuduedaid tacpanën nebudec icsa
 uainquio yec dapuduempanëdash.
³⁶Adosho isash tantiadempambo
 iquequi: —¿Chuiquid dapan
 chuitequidta neque? Tantiabono.
 Nadatiambocquin chuibanac mayan
 icsabo dapuduenchitequien nec
 —quepanëdash Capednaun
 yacnocquido. ³⁷Aden tantiaquin Esusën
 mayan icsa dapuduemiosh, quequin
 isquidon chuiban-chuibanac Capednaun
 yacno dëuequidtedishuntsen
 tantiapanëdash.

**Daicsambocquid dadpen
 Esusën bëdamiad**

(Mat. 8.14-17, 1.35-39; Mad. 1.29-34)

³⁸Mayan icsa dapuduemiashic Nuquin
 Papan chiaid chuibante shubu yacnoësh
 puduenanec Simonën shubu yacno Esus
 nidpanëdash. Ambo puduedacsho isun:
 —Simonën nachi chumboshë iqueque.
 ¿Ada aid bëdametsia? —caquien:
³⁹Simonën nachi yacno choash
 dayunquio nidtuidec: —Chumbocquid
 dauebudta —Esus quenubi badedquio
 daebudpanëdash. Adec daebudash
 nidtoshon codocashun Esusbëd icquido
 pemepanëdash Simonën nachin.
⁴⁰Adshumbic, inchëshbudtsëqui
 daicsaid utsi-utsien bë-bëpanëdash.
 Aden bë-bësho isun damishquin Esusën
 bëdamepanëdash. ⁴¹Adembidi mayan
 icsa utsi-utsien dapuduemepanëdash.
 Adoac, Nuquin Papan madombobi mibi

nec, quec sidquesho tantiashun:
 —Nuquin Papan chomiaid nec, quequin
 ëbi chiec adec onquenda —Esusën cac
 mayan icsa ënëdpanëdash.

⁴²Adashic, badiadnuc matses
 nibëdacno Esus nidpanëdash. Esus
 nidacsho isun matses dadpenshun
 nibënquin istuidshun: —Nidenquio yec
 ëbëdi tabadta —capanëdash
 istuidquidon.

⁴³Adoaquien: —Shubu dadpen icquid
 utsi-utsiec yacno nidshun Nuquin Papa
 yacno tabadaid iquec, quequin
 anocquidotsen tantiamenuec nidendabi.
 Nuquin Papan chomiaid icquin
 chuibanun nabono —quepanëdash Esus
 abi nibënquin istuidquido chiec.

⁴⁴Aden chiashic Nuquin Papan chiaid
 chuibante shubu utsin-utsinquec
 puduedcuenequin Nuquin Papa yacno
 tabadte iquec quequin
 chuibampanëdash. Nidaid Udeya caid
 yacno shubu dadpen icquid utsi-utsiec
 yacno choshon aden Esusën
 chuibampanëdash.

Abëd tabadmenuen chomiaid

(Mat. 4.18-22; Mad. 1.16-20)

5 ¹Adashic chian Quenesaded caid
 cuëmambi tabadquin Esusën
 Nuquin Papan chiaid chuibansho tantiec
 iccuededquido dadpen tabadpanëdash.
²Adnubien masi yacno aton cano daëd
 nëshun icbon aton nëshaidtedi
 pambampanëdash. ³Adsho isanec
 nidash Simonën cano antsadtoshon,
 Udictsëc ëbi buan, Esusën cac Simonën
 udictsëc buampanëdash. Aden buanac
 chian cuëman iccuededec tabadshobi
 cano antsadquin Esusën
 chuibampanëdash.

⁴Aden chuibanquin nainshun:
 —Shodombo yacno nuëcquid
 bednuequin nëshaid nënebanta, Simon
 —capanëdash Esusën.

⁵Adoaquien: —Icbo, inchëshëmbi nuëcquid bednuen nëshaid nënebenequin ëbitedishun bedamboccombi. Mimbi nëshaid nënetan cac nënetanembi —quepanëdash Simon.

⁶Adash shodombo yacno nidshun nëshaid nënetanquin nuëcquid dadpenquioshë bedac nëshaid tèsëdec taëpanëdash. ⁷Adsho isun abëdtan nuëcquid beduidboedo cuënquin, Cadoec cho, quequin ismiac aido cano utsin choshon cano cubu-cubutsëcquiocnoc nuëcquid sandoac cano daëd mentoadtsempanëdash.

⁸Adoanec Esus yacno choequi danëshën sebudec shuebudash Simon Petedon: —Icbo, ëbëd iquenquio yec nidaneta. Icsambocquid nebique —capanëdash Esus chuiquin. ⁹Abëd icquidobëdtan nuëcquid dadpen bedboed tantiadempambo iquec, Esus nadatiambocquid nec, quequin tantiec onquepanëdash Petedo. ¹⁰Acobo Uan chedo tantiadempambo yec tabadoapanëdash. Aid daëdi Sebedeyon mado icpanëdash.

Adec Petedo shuebudash onquesho tantiatanec Esus nadpanëdash: —Dacuëdenda. Mimbi nuëcquid penun acten bedbocpaden nëbi tauain ëbi tantiaquid icmenuen nidaidën capucuenquin abuc tabadaid mimbi chuiban-chuibanendac —quepanëdash Esus Petedo caic. ¹¹Aden chiaquien aton cano acte cuëman nëshanec aton natedi nianec, Esusën chiacpaden tantianuna, quianec abëdtan nuëcquid bedboedobëdtan Petedon Esus nidsho tsibanampanëdash.

Daushumbocquid bëdamiad

(*Mat. 8.1-4; Mad. 1.40-45*)

¹²Adashic, shubu dadpen yacno Esus icnubien daushumbocquid nami mishac

paëpenquiocquid chopanëdash. Aidi choash Esusën taëno shuebudec nadpanëdash: —Ëbi bëdamete bunquin ëbi mimbi bëdamepec —quepanëdash daushumbocquid.

¹³Adsho tantiashun adquid daushumbocquid mishtemaid nec, quenquiocquin damishec Esus: —Mibi bëdamete bunebique. Mibi bëdamenu —quenubi badedquio bëdampanëdash.

¹⁴Aden bëdametanec Esus: —Ëmbi naid utsibo chienda. Adenquiocquin isadaidbo tsusiobo ismetanta ma bëdamiad Nuquin Papan naid nec quequin ma aidon tantiapanu. Aido ismeshun Nuquin Papan ambi chiaid Moises dada uamiampicpadembi bëdambo icmiaid cuidtequidquio meneta —capanëdash Esusën ambi bëdameboed chuiquin.

¹⁵Adnubien Esusën bëdamesho isquidon Esusën bëdamiad chuibanac matses dadpen Esusën chiaid tantianuec cho-chopanëdash. Adecbidi, daicsambocquido bëdanuec cho-choacsho Esusën bëdamepanëdash.

¹⁶Adashien matses nibëdacnombo nidash Nuquin Papa chiec onquepanëdash.

Dada shëquëquenquiocquid bëdamiad

(*Mat. 9.1-8; Mad. 2.1-12*)

¹⁷Adashic, ushë utsin Esusën chuibanuc padiseyobobëdi Nuquin Papan naden nata quequin chiaid tantiamequid dadpen tabadpanëdash. Utsi-utsiec nidaid Cadidia yacnoësh cho-chonobi utsi-utsiec nidaid Udeya caid yacnoësh cho-chonobi utsi-utsiec Edusaden caid shubu dadpenquioshë yacnoësh cho-chopanëdash. Adec aido cho-choash tabadnubien Nuquin Papan nadatiambocquin naquid icmiac matses bëdamenuc Esus icpanëdash. ¹⁸Aid icnubien dada shëquëquenquiocquid

aton din nandoshon aton utsibon
bëpanëdash. Aden bëquin shubu nuntan
nënantanquio Esus icnubi ¹⁹matses
tsucus-tsucustsëcquiocsho isash
puuedtiapimbo yec macano
pada-padapambo yacno dada
shëquëquenquiocquid buanec
dectatoshon macano chic-chicshun dada
shëquëquenquiocquid abi bëquidon
imbudpanëdash.

²⁰Dada shëquëquenquiocquid ëmbi
bëaid Esusën bédamec, quequin
tantiaquin bëquidon ambi bëaid
imbudsho isash dada
shëquëquenquiocquid caic: —Mimbi
tantiaid icsa cuidenquio yec
bëpiscudtequidquo mibi nendac
—quepanëdash Esus.

²¹Aden chuisho tantiaish
padiseyobobëd Nuquin Papan naden
nata quequin chiaid tantiaimequid:
—¿Nuquin Papanuidi chuitequidquioda
chuiamposh? ¿Tsutsi aden
chuihanquid nepec? Nuquin Papauidi
tantiaid icsa cuidenquio yec
bëpiscudtequidquo nec —quepanëdash
ambibi tantiacpadec onquec.

²²Aidon tantiaid tantiec Esus:
—¿Atotsi quiash mimbibi icsamboen
tantiec onquepe? ²³¿Mimbi tantiaid icsa
cuidenquio yec bëpiscudtequidquo
nendac ëmbi chiaidquo
bédantequidpenda nedic? Adecbidi,
¿Mibi icsambocboedi mibi bédanoque.
Nidtoash nidta, quequin chiaid
bédantequidpenda nedic? ²⁴Nuquin
Papan chomiaid icquimbi mimbi
tantiaid icsa cuidenquio yec
bëpiscudtequidquo nendac ëmbi cac ad
iquendac. Nuquin Papan chuimaidquo
nec mibitedi camenuen dada
shëquëquenquiocquid naden
chiembique Tantia. Nidtoash nidquin
min di buanec nid —capanëdash Esusën
dada shëquëquenquiocquid chuiquin.

²⁵Adoac nidtoshon aton di bedanec
Nuquin Papan naboed chuibanequi aton
shubuno nidpanëdash.

²⁶Adsho isash tantiadempambo yec
Nuquin Papan naid chiech
onquecuededec tabadpanëdash: —Aden
bëdamiaid isenquiochoedëmbi
nëbimbobi aid isbempombi
—quecuededpanëdash.

**Debi, ëbi tsibanec cho,
quequin Esusën chiaid**
(Mat. 9.9-13; Mad. 2.13-17)

²⁷Adashic, capucuenequin Debi
cuëmëdquid Esusën istuidpanëdash.
Debi nec queshumbi Mateyo
cuëmpanëdash. Ancanquid dapan
utsibon na bedtequid bedshumbanta
caid Debi icpanëdash. Ancanquidën
chiacpaden Debin utsibon na bedtequid
bedbansho isun: —Ëmbi chiaid
tantianush ëbi tsibanec cho —Esusën
cac ²⁸Debi nidtoanec aton natedi nianec
Esus tsibananec nidpanëdash.

²⁹Adshun aton shubuno Esus
buanshun Debin pemepanëdash.
Ancanquidën utsibon na bedtequid
bedbanta caido abipadquido
dadpembëdtabi Esus Debin
pemepanëdash. ³⁰Aden adquidobëdtan
Esusën pesho isash padiseyobo:
—¿Atotsieshun mibi chuiquidbëdtan
mibitedishun icsambocquidbëdtan
pepeba? —quepanëdash Esusbëd
icquido caic.

³¹Aden chuisho tantiaish Esus
nadpanëdash: —Ëbi bédamec cho,
quenquio bédambocquid iquec.
Daicsambocquidien, Ëbi bédamec cho,
quendac. ³²Adecbidi, Nuquin Papan
bëdamboen isaidquo icscho, Mimbi
tantiaid icsa ënta, quequin chuinuec
choenquio iccondabi. Nuquin Papan
icsamboen isaidquo icscho, Mimbi
tantiaid icsa ënta, quequin chuinuec

chondabi —quepanëdash Esus
padiseyobo caic.

Buna mëmunaid
(*Mat. 9.14-17; Mad. 2.18-22*)

³³Aden Esusën chuibansho tantiaishun naden padiseyobon Esus chuipanëdash: —Uambëd icquido buna mëmunec Nuquin Papa chiec onquedenec. Adquiecbidi ëbëd icquido buna mëmunec Nuquin Papa chiec onquedenec. Adenquio mibëd icquido iquec. Aidon buna mëmunenquiocquin peshun sicaid actenec —quepanëdash padiseyobo Esus chiec.

³⁴Adoquien: —Aton chido bednun pambid meniac chidon codocacsho abi inquidën abëd icquido menec. Aden meniac isuidesa abëd icquido nec. Adecbidi ëbi abi chuiquid icnuc ëbëd icquidon buna mëmunenquiocquin isuidenquio iquec. ³⁵Yuecash chido inquid nibëdanan abëd icboedo unësquiocquin buna mëmunquin isuidpec. Adecbidi ëbi nibëdanan ëbëd icboedo unësquio yampec —quepanëdash Esus padiseyobo caic.

³⁶Aden chuibanequi abi Esus onquec: —Dashcute chuca cuëshun dashcute shë nibëdta nacnenquin bëtuscaisa matses nec. Cuëshquin dashcute chuca icsa uaic. Adecbidi shëni tuscaid bëtësëdec. ³⁷Adembidi dadpen icquid chodo uashun sandoec. Adotanquimbic istuidshun chuca uain chodo uashun sandoaic chodo shënin icsa sandoshon nequid bëenquiocquin. ³⁸Adembidi, ëmbi ënden tantiaiduidi tantianu, quequin Nuquin Papan nëbi chiaid pausudtequid bëda tantiauidquid yanec icsabudendac. Mibi adquid iquec, quequin tantiaquin utsi chiacimboen Esusën padiseyobo chuipanëdash. ³⁹Adashic ambi ënden chiaid tantienquiocboedi nëbi Nuquin Papan chiaid utsi chuibanac tantiauidquio iquendac —quepanëdash Esus.

Chonoadtemaid ushë tantiaquid
(*Mat. 12.1-8; Mad. 2.23-28*)

6 ¹Adashic, chonoadtemaid ushë icnuc Esusbëdtan abëd icquidon tied matanquin tiedën caniquid ëshchicshun abëd icquidon bitsi tsucucashun pebededpanëdash. ²Aden pesho isquin padiseyobon: —¿Atotsieshun chonoadtemaid ushën chonoadpeque? Tantanu. Ëbi chui —capanëdash Esusbëd icquido chuiquin.

³Adoquien: —¿Tsusedpa Dabid caidbëd icquidon piasquin pepampid tantiamboda ique? ⁴Naden chuipampid neque. Tantia. Abëd icquidobëd Nuquin Papa tabadte shubu uashunaid puduedtemaid quënën puduedshun Nuquin Papa tantiaquin pan meniac nanaid chuiquid dapan bedshun abëd icquido menebanshun aidobëdtambi pepampic. Aid pan Nuquin Papan namiaidënuidtsëqui petequid nepampic —quequin padiseyobo chuishun Esusën nadopanëdash: ⁵—Ëbia: Tiboquenu, quiash tsadacpadec matses: Nëid chonoadtemaid ushë nec, quequin tantiec. Adnubini aid ushë icbo yec tiedën caniquid ëshchicshun bitsi tsucucasho isash: Mimbi icsamboen naic, quetiapimbo iquebi.

Mëuesadaid bëdamiaid
(*Mat. 12.9-14; Mad. 3.1-6*)

⁶Adashic, chonoadtemaid ushë utsin Nuquin Papan chiaid chuibante shubun puduedshun Esusën chuibanubien abiucquid mëuesadaid dada icpanëdash. ⁷Ambobidi tabadquimbi Esus chieshënquidon, Chonoadtemaid ushën Esusën bëdamenushe. Isnu, quequin padiseyobon caimbededpanëdash. ⁸Aden cainubien abi chieshënquidon tantiaid tantiaquin mëuesadaid isquin: —Nënantanquio nidto —Esusën cac

mëuesadaid nēnantanquio nidtoash nidpanēdash.

⁹Adsho isashien: —Tantianu. Chui. ĩChonoadtemaid ushēn matses tantiaquindambi bēdamboen nape? ĩAdoenquiocquindambi bēdametemaidd ushē nēid neque? ĩMibi nēbi bēdametiapimbo iquebi, quequindambi chuipe? ĩAdoac daicsaid utsi-utsiec unēspec? —quepanēdash Esus.

¹⁰Aden chuishumbic iccuededquido isbanquin: —Ēbi mēd —cac Esus mēdequi mëuesadaid bēdampanēdash.

¹¹Adec mëuesadaid bēdansho isashien comapenec nēishash: —ĩMitsipadentsimbi Esus acpe? —quec onquecuededpanēdash abi chieshēnquido.

Esusēn, Ēbi chuibeneta, caido

(*Mat. 10.1-4; Mad. 3.13-19*)

¹²Adashic, ushē utsin macuēsh yacno matses nibēdacno Nuquin Papa chiec onquenuec nidash inchēshēn ushenquio yec Nuquin Papa chiec Esus onquepanēdash. ¹³Badiadshun abēd icquido dadpen chomeshun, Ēbi chuibeneta, quequin 12tedictsēqui chuipanēdash. ¹⁴Nēidic, Simon, Esusēn Petedo caid; utsibic, Andedes, Simonēn utsibi; utsibic, Acobo; utsibic, Uan; utsibic, Uedipe; utsibic, Badtodome; ¹⁵utsibic, Debi cashumbic Mateyo caid; utsibic, Tomas; utsibic, Acobo, Adpeon mado; utsibic Simon, ancanquid isadaidpembo bunesa; ¹⁶utsibic, Udas, Acobon mado; utsibic, Udas Iscadiote, yuecshun Esus chieshēnquido Esus bedmequid. Aidtedi, Esusēn, Ēbi chuibeneta, caido icpanēdash.

Nuquin Papan bēdamboen isaido icnuc ambi icsamboen isaido

(*Mat. 4.23-25, 5.1-12*)

¹⁷Adashic macuēsh yacnoēsh abēd 12ted icquido pada-padambo yacno budash abi tsibanquido dadpen icsho

isash Esus nidtuidpanēdash. Nēidted icpanēdash: Nēidic, Edusaden yacnoēsh choquido; utsibic, Acte Dapa cuēman shubu dadpen icquid Tido caid yacnoēsh choquido; utsibic, Sidon caid yacnoēsh choquido. Aido Esusēn chuibansho tantianuec cho-choash tabadnubi, Ēbi bēdamepec, quequin tantiec utsibo choash tabadpanēdash. ¹⁸Adec choquido mayan icsa dapuduedaid icsho isun Esusēn dapudemepanēdash. ¹⁹Adsho isun nadatiambocquid Esus neque. Mishnu, qeshun mishequi bēdancuededpanēdash.

²⁰Adshumbic abēd icquidombo isbanquin naden Esusēn chuibampanēdash:

—Nēmbo mibi icnuc mitsana nibēdtenesho isun Nuquin Papan bēdamboen isaido iquec abuc nidan con natedi mitsana nendac.

²¹“Nēuēshquio bundodenesho isun Nuquin Papan bēdamboen isaido yec abuc ēbēd tabadec bundoesa iquendac.

“Nēuēshquio mates Nuquin Papan chiaid tantiesa icsho isash unēsqiuo yec shubidednequid Nuquin Papan bēdamboen isaid yec abuc nidash ēbēd tabadec bēdambo iquebi quependac adquido.

²²“Esus tantiaquid icsho chieshēnquin pudued cainquio yaid adembidi mua uaquin chuishunaid Nuquin Papan bēdamboen isaidquido nec.

²³“Adomboembidi ěmbi ěndenquimbo chuimiai aton matsesēn icsamboen chuishundeniampic. Adomboembidi mibi min matsesēn icsamboen chuishundenetsiash. Nidaidēnshun adoaid iquec Nuquin Papa yacno choacsho ambi bēdambo icmiaid mibi iquendac. Adquid iquendabi quequin tantiec mibi icsamboen chuishunaqui, Cuishon, queta.

²⁴“Padnuen, con na dadpen iquec, quequin tantiec bēdamboec tabadebi, qesho Nuquin Papan icsamboen isaido

mibi nec. Nidaidënsun mimbi bedteniaiduidi tantiec Nuquin Papa yacno puduedtiapimbocquid mibi iquendac. Nidaidën bēdamboec tabadquin ënden bedondaidi mibi nec.

²⁵“Nidaidënsun abi bunaidtedi bedquido Nuquin Papan icsamboen isaido nec. Abi bunaiduidi tantiaquin Nuquin Papan chiaid tantianu qeshun tantiatipimbo iquendac.

“Mitsanauidi tantiec, Bēdambo iquebi, quec mamēnec tabadquido icsho Nuquin Papan icsamboen isaido mibi nec. Adquido Nuquin Papa yacno puduedte bunsho, Padi, cac shubiquiendac.

²⁶“Bēdamboquid nec, quequin mibi dadpēnsun chuisho tantienda. Adomboembidi mua uain Nuquin Papan ëndenquimbo chuimiai dpembon chuipampic. Aidon chiaid tantiashun tsusedpabon Nuquin Papan chiaid tantienquo yanampic. Adquido Nuquin Papan icsamboen isaido nec —quepanēdash Esus.

**Mibi uimanēnquido tantiaquin
nabanta, quiaid
(Mat. 5.38-48, 7.12)**

²⁷Aden chiashic abi Esus onquec: —Ēmbi chiaid tantiaquidquido nad iqueque. Chuinu. Tantiata. Mibi chieshēnquido bēdamboen tantiaquin nabanta. ²⁸Adembidi mibi icsamboen chuiquid bēdamboen chuita. Adembidi, ěbi icsamboen naquido bēdamboen tantiaquin cuidenda, Papa, quequin Nuquin Papa chuita. ²⁹Adembidi mibi cuesquid cuidenda. Adembidi mibi icsamboen nadenesho cuidenquiocquin adembi bēdamboen nabanta. Adembidi ampequin min dashcute bedanec nidsho isun, Chiata. Dadamicquidtsen buan, cata. ³⁰Utsibic, aton na nibēdquid, Bec cho, qesho meneta. Adembidi utsin mitsana ampesho isun cuidenquiocquin

bēdamboen naoata. ³¹Adembidi ěbi bēdamboen nashuntiadquidi nepec quequin mimbi tantiacpadomboen utsi tantiaquin nashunta.

³²“Ēbēd tantiananquiduidi tantianu, quec ĩbēdambo mibi icpe? Padenquoio. Adembidi Esus tantiesan abipadquiocquido tantiec. ³³Adecbidi, Ēbi bēdamboen tantiaquin nashunquiduidi tantiaquin nashunoanu quec ĩbēdambo mibi icpe? Padenquoio. Esus tantiesan adembidi nashunquidquido nec. ³⁴Adecbidi, Ēbi menequiduidi menenu, quec ĩbēdambo mibi icpe? Padenquoio. Esus tantiesan adenuidi menec. ³⁵Naden nata, quequin chuinu. Tantia. Mibi chieshēnquid icsho aid tantiaquin bēdamboen nabanta. Adembidi mibi meniantipimbocquid, Bec cho, qesho, Yucash cuidnanun nanuna, quenquiocquin meneta. Mimbi adosho isun Nuquin Papan mibi bēdamboen isendac. Adobanec bēdambo iquebi quec mibi tabadendac. Adomboen nabanquido Nuquin Papan nacpadomboen nabanquid nendac. Adquido aton mado iquendac. ³⁶Nuquin Papan abi chieshēnquido nashundeniacpadomboen mibi chieshēnquido nashundeneta —quepanēdash Esus.

**Icsambocquid nec,
quequin chienda, quiaid
(Mat. 7.1-5)**

³⁷Aden chuibanashic Esus abi onquec: —Ēmbi tantiacpadomboen naisa icsambocquid nec, quenda. Adesa abi yacno choacsho Bēdamboquid neque. Puduedme, Nuquin Papan caindac. Adecbidi, Icsambocquid iquec. Aid cuidtiadquidi Nuquin Papa nec, quenda. Adenquoio icsho Nuquin Papan cuidenquioctequid mibi iquendac. Mibi icsamboen tantiaquin utsin nasho isash

cuidnanenquo yec bēpiscudta. Adquid, Cuidnu, quenquo yec mimi icsamboen tantiaquin naid Nuquin Papa bēpiscudendac. ³⁸Aton na nibēdquid bēdamboen tantiaquin meneta.

Adembidi, mibi tantiaquin abi utsibēd bēdamboec tabadtequid Nuquin Papan mibi menendac. Utsi tantiaquin mimi meniaccpadomboen mibi tantiaquin bēdamboen tabadmeteuid daēd uashun Nuquin Papan mibi meneoaindac —quepanēdash Esus.

³⁹Aden chuishumbic utsin tantienquo ictequid abēd icquido naden Esusēn chuipanēdash: —¿Podquedēn nidnu quec bēshuaid utsi bēyucampecta nidtic? Nidnu, quianec nidec abi daēdi nidaid shēcuē ampaēdpatsiash.

⁴⁰Adembidi tantianuequidēn abi tantiemequid dēniactiapimbo iquec. Tantiamic abi tantiemequidpadquid iquendac —quepanēdash Esus.

⁴¹Adoshombic adembidi tantiemequin naden Esusēn chuipanēdash: —¿Atotsi quiaash utsi bētsiadaid pistēcquid isequi mibi bētsiadaid dapa isadtiapimbo icpec? ¿Mibibi bētsiadaid dapa bēbedadabiquin mitsipadentsi mimi utsi bētsiadaid pistēcquid bedshunuen ispe?

⁴²Adembidi, utsin tantiaid icsa abentsēc icnubien mimi tantiaid icsa utsi-utsiec icnuc ¿atotsieshun, Mimi tantiaid icsa ēnta, quequin utsi chuipe? Mimi tantiaid icsa nibēdacbimboen mimi chuipeque. Adoenda. Mimi tantiaid icsa ēnshun utsin tantiaid icsa icsho isun ēmenuequin chui —capanēdash Esusēn.

Cuēte abipadquid aton bacuē nec, quequin chiaid

(Mat. 7.17-20, 12.34-35)

⁴³Adoshombic, adembidi Esusēn chuipanēdash: —Cuēte bēdan bacuē adquiobidi bacuēec. Cuēte icsan bacuē adquiobidi bacuēoiaic. ⁴⁴Chetequid isun

cuēte dada matsesēn tantiec. Aden tantiec nisanquidēn bacuē isash, Dadain bacuē nec, quenquo matses iquec. Adecbidi, echo bacuē isash, Bata nec, quenquo matses icoaic. ⁴⁵Adembidi bēdamboen tantiaquidēn ambi tantiacpadomboen utsi bēdamboen tantiaquin nabanendac. Adecbidi ambi tantiacpadec bēdamboec onquec. Adembidi icsamboen tantiaquidēn ambi tantiacpadomboen utsi icsamboen tantiaquin nabanec. Adecbidi ambi tantiacpadec icsamboec onquec —quepanēdash Esus.

Tantiaquidquo icnuc tantiauidquid nec, quequin chiaid
(Mat. 7.24-27)

⁴⁶Adoshombic: —¿Atotsieshun, Con Icbo mibi nec, qeshumbi ěmbi chiacpadomboen naisa mibi ne? ⁴⁷Ēbi yacno choshon ěmbi chuibansho tantiaquiash nidshun nadomboen naquidquo iqueque. Chuinu. Tantiata. ⁴⁸Cunquequid dapan chimeshnushe qeshun shubu uaquidēn shēcuē ěquēduc uēdēshcashun buintad nitsinquid. Adembidi, natiamianquiec cametequid yanabicnuc tantesa uainquiocnuen ěbi tantiaquidquo icquin ěmbi chiaid papuduedshun adomboembidi nabanquid nec. Adquidēn tantesa uainquo iquendac. ⁴⁹Utsibic nad iqueque. Tania. Ěquēduc uēdēshcabi nitsinaid cunquequid dapan chimeshunendac. Adecbidi, ěmbi chiaid papudueduidtsacpadomboen nabanenquo yec natiamianquid chonoc abi papudueduidtsaid bēpiscudendac. Adquid uquē nēsecatequid nendac —quepanēdash Esus.

Sondado chuiquidēn tantiaid

(Mat. 8.5-13)

7 ¹Aden iccuededquido chuiquin nainash Capednaun caid yacno Esus nidoapanēdash. ²Capednaun caid yacno

choash Esus tabadnubien
isadaidpembon sondado chuiquidën yua
abi cudasaid unëstiadtsëcquio
icpanëdash. ³Aton yua unëstiadtsëcquio
icnubien, Nënquid bédamequid Esus
nëmbobi iquec, quequin utsibon chiac:

—Aidën con yua bédametsiash
—quianec isadaidbo tsusiobo yacno
nidshun istuidash: —¿Con yua chiec
Esus yacno ada mibi nidpatsia?
—quepanëdash sondado chuiquid.

^{4,5}Adoquien: —Ai —quianec Esus
yacno isadaidbo tsusiobo nidshun
chuituidec: —Sondado chuiquidën
chuitan caido nebi. Con yua
unëstiadtsëcquio iqueque. Esus
bédamequid neque. Chuitan, cac mibi
chiec chobi. Sondado chuiquid
bédambocquid nec. Nuquin Papan
chiaid chuibante shubu uamiondaidquio
nioshe. Ambi chiacpadomboen aton yua
bédametiadquidi mibi nec
—quepanëdash isadaidbo tsusiobo Esus
caic.

Adoac aidobëdi Esus nidpanëdash.
⁶Adec aidobëd Esus nidshobi sondado
chuiquidën chomiaid utsibo choquin
bèquedtuידash nadpanëdash: —Sondado
chuiquidën chomiaid nebi. Aidën chiaid
chuinuuec chopobi. Naden chuita,
caposhi: “Padicnuna, Icbo.
Icsambocquid nebique. Mibi
bédambocquid iquec con shubun
puduedenquioctiadquidi mibi nec. ⁷Ëbi
icsambocquid iquec mibi bèquedec
nidenquiocobi. Mibi bédamequid yec
con shubun puduedenquiocquin mibi
yacnoshombi, Bédanta, mimbi cac con
yua bédampec. ⁸Ëbien sondado
chuiquid nec. Ëmbi nidta cacpadquiequi
sondado nidec. Adecbidi, Cho, ëmbi
cacpadquiecbidi choaic. Adembidi,
Nadota, cacpadomboembidi con yuan
nabanec,” quequin chuitan sondado
chuiquidën cabocpadembi mibi

chuipombi —quepanëdash sondado
chuiquidën chuitan caido Esus caic.

⁹Adoquien: —¿Abimbobida cai?
—qeshun ambi chiaid
tantiamenuequin iccuededquido Esusën
bëisbanquin nadopanëdash: —Chuinu.
Tantiata. Sondado chuiquid
isadaidpembo ëbi tantiaquidpadquid
isadaidbo nibëdec —quepanëdash Esus.
¹⁰Aden chiaquien sondado chuiquidën
chuitan caido aucbidi nidoash shubun
puduedshun sondado chuiquidën yua
bédamiaid istuidpanëdash.

Nianten mado uincuen uaid

¹¹Adashic, ushë utsin shubu dadpen
icquid Nain caid yacno Esus
nidpanëdash. Aidbëdi abëd icquido
nidpanëdash. Adecbidi matses utsibo
dadpen nidpanëdash. ¹²Adec nidequi
Nain tsasi uaid quënë shëcuë
anoentsëqui choquimbi unësaid bëquido
bèquedtuידpanëdash. Unësaid epa
icnubi ani nianten icpanëdash. Niantebëd
Nain yacnocquido dadpen
cho-chopanëdash. ¹³Adec cho-choec
nianten shubisho isash Esus unësquio
yec: —Shubienquio yec ënëd
—quepanëdash. ¹⁴Adec, Ënëd, quetanec
udictsëc nidshun unësaid nanaid Esusën
mishnubi abi bëquido nidtuidpanëdash.
Nidtuidsho isun: —Abuido, uëtsëdtota
—cac ¹⁵uëdtsëdtoash tsadec unësboed
onquepanëdash. Adsho isash ani caic:
—Në, unësboedi min mado
uincuenoshe. Abëdi nidec nid
—capanëdash Esusën.

¹⁶Aden unësaid uincuemesho isash
cho-choquido: —Adopenshenda
uincuemec —qeshun Nuquin Papan
naid chuibanpanëdash. Aden
chuibanec: —Nuquin Papan matses
bédamboen isnuen ambi chomiaidquio
nuquibëd icmiosh —quec isquido
onquecuededpanëdash.

¹⁷Aden isash nidshun unësaid uincuemiaid isquidon chuibansho isadaidbon nidaid Udeya caid yacnocquidon tantiabempanëdash. Adembidi chiac dëuequidontsen tantiapanëdash.

**Ëbitedishun cainaid mibi nec,
quequin Uanën chiaid**
(Mat. 11.2-19)

¹⁸Adnubien, acten mentoanondaid Uan cuëmëdquid quënën nauedaid icsho abëd icquidon Esusën nabanaid chuibampanëdash. Adoaquien abëd icquido daëd chomeshun Uanën nadopanëdash: ¹⁹—Esus yacno nidshun nadota. ¿Ëbitedishun cainaid Nuquin Papan chomiaid abentsëcquiobi mibida ne? ¿Aidtabi nedi? mibi quenuc, ¿Adambi utsi caimpe? quequin chuita —Uanën cac aid daëdi Esus yacno nidpanëdash.

²⁰Adec Esus yacno choash: —Acten mentoanondaidëmbi Uanën chomiaido nebi. Uan nadosh: “¿Ëbitedishun cainaid Nuquin Papan chomiaid abentsëcquiobi mibida ne? cac ¿Aidtabi nedi? mibi quenuc ¿Adambi utsi caimpe?” quiosh Uan —quepanëdash Uanën chomiaido Esus caic.

²¹Aden chiaquien icsambocquid bédamequinc, mayan icsa dapuduedaid dapuduemequinc, bëshuaid bédamequinc caquin Esusën ismëbampandash. ²²Aden nabanquin nainashic: —Mibi chuiquid Uan caid yacno nidshun ëmbi nabamboedtedi mimi isboed naden chuitanta. Bëshun isbenosh. Adecbidi canite icsaidi capuanosh. Adecbidi daushumbocquidon nami bédanosh. Adembidi pashun tantiabenosh. Adembidi unësaid uincuemiosh. Adembidi aton na nibëdquido tantiamenuen Nuquin Papan chiaid

Esusën chuibanosh, quequin Uan chuitanta. ²³Ëmbi aden nabansho isun tantesa uainquiocquin Nuquin Papan bédamboen isaidquio nendac, Esus quiosh quequin Uan chuitanta —quepanëdash Esus Uanën chomiaid daëd chiec.

²⁴Adashic, Uanën chomiaido nidambi iccuededquido tantiamëbanuec Uan chiec Esus nadpanëdash: —¿Atotsi isnuec matses nibëdacno nidonda? ¿Cunquequidën ishcunaid isnuecta niddionda? ²⁵¿Aid isnuec nidenquio yec atotsi isnuec nidonda? ¿Dashcute ushumbocquid dasiuidquid isnuecta niddionda? Padenquio. Dashcute ushumbocquid dasiuidquido aton na dadpenquio icquido ancanquid dapan shubun tabadquido nec. ²⁶Ad icnuc, ¿atotsi isnuec matses nibëdacno nidonda? ¿Nuquin Papan ambi chiaid chuimiaid isnuec nidenquioda ictionda? Ai, matses nibëdacno Nuquin Papan chuimiaid isnuec mibi nidondac. Uanën ëbi chuiquidëmbi ispondashi. Ëbi ëndenquimbo chuiquido ëbi isesabo icpampic. ²⁷Ëbi cain naden Uan Nuquin Papan chuimiampid nec:

“Mibi choec quequin chuibanquidba chomëmbi.

Mibi choec quequin chuibanac ambi tantiaid icsa ënshun mibi cainquidombo iquendac.”

Aden ëbi cain Uan chuiquin dada uapampid nec.

²⁸“Adëmbi Uan chuibanu. Tantiata. Nuquin Papan chuimiaid Uampadquid matsesën tishaid utsi nibëdec. Aidën ëbi chotequid chuibanac choshon ëmbi nabansho isenquio icposh. Isash, Nëid Nuquin Papan chomiaid nec, quetsemposh Uan. Aidi quënën nauedac ëmbi nabanaid istiapimbo yec tsadec, Nuquin Papan chomiaid, ëbitedishun cainaid mibida ne, quepec —quepanëdash Esus.

²⁹Aden Esusën chuibansho tantiash: —Nuquin Papan naid bēdambo iquec —quepanēdash Uanēn mentobanondaido. ³⁰Utsiboen ambi tantiaid icsa ēnenquo icquin Uan Esusën chuisho tantiash, Nuquin Papan naid bēdambo iquec, quetiapimbo aido icpanēdash. Aido padiseyobobēd matsesēn naden nata quequin chiaid tantiaquido icpanēdash.

³¹Aden Uan chiaish Esus: —¿Nuquin Papan chiaid nēbi chuisho tantiesa mitsipadquid nepeque? ³²Adquid chuinu. Tantia. Ambi tantiacpaden naisa icsho isash bacuēbo yacbimboec nēishun mimbi icsamboen tantiec. Adembidi ambi tantiacpaden naisa icsho isun Nuquin Papan chiaid tantienquo iquec. Adquidēn Nuquin Papan chuimiaidēn nabansho icsamboen ispec. ³³Nua cubudquin pesa Uan icsho isash, Mayan icsa dapuduedaid nec, queposh Uanēn chuisho tantiesa. ³⁴Ēmbi peshun acsho isec, Nua peshun tantienquiocquin acquid nepec. Aidbidi icsambocquidobēd icquid nec, ēbi caposh. ³⁵Aden tantienquiocquid, Bēdamboen tantianu, qeshun bēdamboen tantiaquidēnquo chuibansho tantiash abi tantiaquidpadquid iquendac —quepanēdash Esus.

Chidon Esus tanoshcaid

³⁶Adashic, Ēbi yacno pec cho, padiseyobo abentsēcshun cac aidbēd nīdash shubun puduedash pete santen cuēshnudash Esus uepanēdash. ³⁷Adec Esus puduedash uesho isquidon chiac utsin, Icsambocquid nec, caid chido choquin noadte bēda danoshquete aton shubumpichobi bēpanēdash. ³⁸Aden bēequi Esus yuedacno choash puduedshun abi bēdamequid Esus

istuidash, Ēbi bēdamequid bēdambo iquec, quequin ambibi tantiec shubiec Esusën taēno tsadbudshun aton bēunēn tapascapanēdash. Aden tapascac taē chucusho isun aton manēdaidēn taucshun taē tachoccabanshun noadte bēdan chidon tanoshcapanēdash. Chidon aton na bedtequid dadpen menequin comapenec noadte bēda bedshun Esusën taē tanoshcapanēdash chidon.

³⁹Chidon adosho isash Esus yuedquid, Simon caid, abibi onquec: “Ēmbi yuedaid Nuquin Papan chuimiaid iquec, Ēbi mishquid icsambocquid nec,” quequin chido mishmenquo icpec, quepanēdash Simon.

⁴⁰Adoaquien, tantiaquidquo icquin Esusën: —Mibi tantiaequin chuinu. Tantiata, Simon —capanēdash.

Adoaquien: —Aden chuiban. Tantanu —quepanēdash Simon.

⁴¹Aden tantiashun Esusën Simon ambi tantiaid icsa tantiamenuen utsi chuiquin nadopanēdash: —Bec cho. Yuecshun menenun nanuna, quepondash daēd. Abentsēcshun dadpen bedshunubi utsin daēdpactsēc bedshumpondash. ⁴²Aden bedshunshun yuecshun ambi bedshunacted abi daēdi meniantiapimbo icpondash. Adsho isun: “Padi. Mimbi bedondaid ēbi cuidenda,” quequin abi bedshunēdaidēn abi daēdi chuipondash. Adoacsho, ¿Mitsiquid abi bedshunēdaid ēnenquiocquin tantiec bēpiscudenquo icpec? —quepanēdash Esus Simon caic.

⁴³Adoaquien: —Ambi dadpen meneshun cuidenda caidien nechitec —quepanēdash Simon.

Aden chiaquien: —Ai, bēdamboen tantiaquin mimbi chioc —quiash

⁴⁴Simon ismenuec Esus chido yacmi bidiadshun naden chuipanēdash: —Min shubun puduedacsho mimbi taē pante

ëbi menenquiococ. ¿Nëid chido isquindactio? Aidëmbien aton bëunën taë chucu uashun aton manëdaidën con taë bëchishaid ucposh. ⁴⁵Min shubun ëbi puduedsho isun tanchoccanesa mibi nec. Padnueni ëbi puduedacsho isun nëid chidon ëbi tantiaquioquin yuen con taë tachoccaniosh. ⁴⁶Bëchin manoshcanesa mibi iccoc. Padnueni nëid chidombi noadte bëdan tanoshcaniosh.

⁴⁷Adembidi mibi chiembique. Tantiata. Mayan icsa dadpenshun tantiamiaid icsho nëid chido bëdamepombi. Aden bëdamiashic abi icsaid tantienquo yec bëpiscudpobi. Ëmbi aden nac ëbi comapenen tantiaquioquin ëbi nashunquidquo nëid chido nec. Padnuen utsi icsaid daëdpactsëc mibi icsaidtedtsëcbidi icpec. Adquid icsaid bëpiscudebi ëbi quenuc ëbi bëdiactsëc tantiatsec mibi nashumë nec —quepanëdash Esus Simon caic.

⁴⁸Aden Simon chiashic chido caic: —Icsaquid nec, quenquiocquin icsainquo yac bimboecquid mibi isembi —quepanëdash Esus chido chuiioaic.

⁴⁹Adsho tantiash: —Icsainquo yac bimboecquid mibi isembi, quec ¿mitsipadquid Esus nepec? —quepanëdash iccuededquido. ⁵⁰Aden iccuededquidon tantianubi chido caic Esus: —Ëbi tantiaquid yec Nuquin Papa yacno puduedquid mibi neyoc. Bëdamboec tabadaid tantiamiaid mibi iqueque. Dacuëdenquo yec nidta —quepanëdash chido caic.

Chidobo abi nashunquido

8 ¹Adshumbic, Esusën shubu dadpen yacno-yacnomboen chuibanquin Nuquin Papa yacno shubu abentsëqui yac bimboec nidaidën tabadaid chuibenepanëdash. Abi bëdamequid tsibananec chidobo nidpanëdash. ²Ambi mayan icsa dapudue miaidobëdtan ambi

bëdamiadon Esus tsibanampanëdash. Madia, Macada yacnoshon tishaid chedon Esus tsibampanëdash. Mayan icsa 7ted dapudue miaid Madia icpanëdash. ³Abëd nidquid utsi Uana icpanëdash. Aidën bënë Chusa cuëmëdquid, ancanquid dapa Edodesën shubu nuntan nacnemequid icpanëdash. Abëd nidquid utsibic, Susana icpanëdash. Chido utsibo dadpen Esusbëd capucuenepanëdash. Aidon aton na dadpen icnuc Esusbëd icquidon aton na nibëdsho isun menebampanëdash.

Pete ëshë sequid

(Mat. 13.1-23; Mad. 4.1-20)

⁴Aden chuibeniash tabadtuidtsëcnubi ambi chuiquin tantameboedo cho-choquin tsibanampanëdash. Cho-chosho isun, Mibibimboecnuc chiembi, quenquiocquin Esusën nadopanëdash: ⁵—Tiedën caniquid pete ëshë sianuec aton tied yacno nidquid icbo. Adec nidshun tiedën caniquid pete ëshë secabanac maisec utsi-utsiëc podqued nantan paëdacsho matsesën manenubi utsi-utsien uicchunën chec. ⁶Utsibic, cuënote dadpen samëdacno secac badedquid dëyucuidtsash nidaid ëquëduc tapun nidenquo iquec bidiquequid. ⁷Utsibic, nisanquid dëyucacno secac aibdëdi dëyucash canidoudtsacsho nisanquidën bëtinac unësquid. ⁸Utsibic, nidaid bëdan secac dëyucash canias dadpen ëshëndac —quepanëdash Esus.

Aden chuibanashic: —Tantiate bëdambocquidën ëmbi chuiboed tantiapec —quepanëdash.

⁹Adoaquien: —¿Mitsipadquid tantiaid mimbi chuiboed icpec? Èbitedi tantamequin chuiioa —capanëdash abëd icquidon.

¹⁰Adoaquien: —¿Mitsipadequini Nuquin Papa yacno tabadpe?

queboedëmbi nëbi mimbi tantiabenece.
Padnuen utsibon tantienquoio yaid aid
iquec. Aden chiac:

“Ëshë bédambocquid icquimbi
tantiesa icquin ma Nuquin Papa
yacno isenquiocpanuna.
Adembidi tantiate bédambocquid
icquimbi tantiesa icquin ma
abimbo chiaid
tantienquiocpanuna”

—quepanëdash Esus.

¹¹Aden chiashic: —Ëmbi chuiboe
nad iqueque. Tantia. Chuinu. Tiedën
caniquid pete ëshë icbon
siaidbimboecquid Nuquin Papan chiaid
nec. Ëshë siacno nidaidbimboecquid
matsesën tantiate nec. ¹²Podquedën
nidaid tsasimbocquidbimboecquid nad
iquec. Nuquin Papan chiaid tantias
papuduedtiapimbocsho Satansën
bëpiscudmiaid adquid nec. ¹³Cuënote
dadpen samëdacno nidaidbimboecquid
nadquid iquendac. Nuquin Papan chiaid
tantias, Bëdambo iquebi, quias
natiastianquiecametequid icnuc aid
tantic Nuquin Papan chiaid
papuduedquid iquendac.

¹⁴Nisanquid dëyucaid dadpen yacno
nidaidbimboecquid nad iquec. Nuquin
Papan chiaid tantias abi bunaid, abi
nënaid, ambi natequid adquid
tantiaquin Nuquin Papan chiaid
bëtashacimboc icnuc bëdamboec
tabadaid ismesa yampec. Aden
bëdamboec tabadaid ismesa yanuc utsin
Nuquin Papan chiaid tantiatipimbo
iquendac. ¹⁵Nidaid bëdabimboecquidien
nad iquec. Nuquin Papan chiaid
tantiadonec bëdamboec tabadquin utsi
ismequidquio nec. Adquid
natiastianquid chonoc tantesa
uainquiocquin ënenquiocquin ismendac.
Aden ismiac Esus tantiaquid utsi dadpen
yampec —quepanëdash Esus ambi
chuiboe abëd icquido tantiamenuec.

Tabote nënantan nanac chënquiacbimboecquid

(Mad. 4.21-25)

¹⁶Aden chuishumbic naden Esusën
chuiopanëdash: —Tabote taboshon
matsun bëtashesa. Adembidi tsadte
tëdion tabote nanesa icbo nec. Ma ëmbi
yuedaidon isnueshun nënantan tabote
nanquid. ¹⁷Adomboembidi mimbi
ompoquin chuibanaid Nuquin Papan
ompoenquiocquin chuibanendac.
Adomboembidi mimbi tantiamenquoio
yaid aidëmbi chuibanendac. ¹⁸Ad icnuc
ëmbi chiaid bëdamboen tantiaquiota.
Nuquin Papan chiaid tantianuequin ambi
chiaid dadpen tantiaquid. Adquid ambi
tantiapadec tabadquid. Adec tabadquin
ompoenquiocquin utsi ismequid. Nuquin
Papan chiaid tantiauidboed, Bëdamboen
tantiembi, queshun
papuduedmenquiocquin bëdamboen
ismesa nec. Aden ambi tantiauida
uesadendac —quepanëdash Esus.

Aton utsibo aton titabëd choaid

(Mat. 12.46-50; Mad. 3.31-35)

¹⁹Adashic, Esus isec aton utsibobëd
aton tita chopanëdash. Cho-choshon
matses dadpen nuntan tabadsho isun, Ëbi
choaid chuita, cac ²⁰shubun puduedshun:
—Titabëd min utsibo choshon
umanucshun mibi cainec mibëd onquete
bunquin —capanëdash Esus chuiquin.

²¹Adoquien: —Adquid chuinu.
Tantia. Nuquin Papan chiaid tantias
nabanquido ëbëd icquid nec. Adquid
buchu caindambi. Adquid utsi chido
chuchu caindambi. Utsibic tita
caindambi —quepanëdash Esus.

Acte tëccoasquesho ënëdmiaid

(Mat. 8.23-27; Mad. 4.35-41)

²²Adashic: —Chian cuëma utsiuc
nidnu. Nid —quianec abëd icquidobëd

cano antsadtoanec nidpanëdash. ²³Adec nidec cano anuequi Esus ushtopanëdash. Adec ushnuvien cunquequid dapa comapenec cunquenubi acte tèceasquequidën acte uemiac cano mentoadtsempanëdash. Adsho isash dacuëdec ²⁴Esus ushacno nidshun tinec abëd icquido: —Nuqui mentoadequé. Isucun, Icho —quec comapenec cuëdpanëdash abëd icquido. Adsho tantiash isucunash nidtoshon: —Mibi comapenec cunqueque. Ënëd —Esusën cac cunquequid badedquio ënëdpanëdash. Adembidi: —Mibi comapenec tèceasqueque. Ënëd —Esusën cac badedquio acte tèceasquequid ënëdoapanëdash. ²⁵Aden ënëdmetanec: —¿Atotsi quiaish ëbi tantienquio yec dacuëdcuedede? —Esusën caquien abëd icquido dacuëdcuededquiequi, ¿Mitsipadquid nepec? Cunquequidbëdtabi acte tèceasquequid ënëd capadequi ënëdchitosh, quec abëd icquido abibi onquëcuededpanëdash.

**Mayan icsa dapuduedaid
dapuduequin bëdamiaid**
(*Mat. 8.28-34; Mad. 5.1-20*)

²⁶Adshumbic, acte tèceasquec ënëdan nidaid Cadidia yacno chian cuëma utsiuc Esusbëd icquidon poteoaic nidaidëmpi Cadada caid yacno aido nidpanëdash. ²⁷Ambo nidequi canon choash dectatosho isash mayan icsa dapuduedaid dada Esus bëquedec chopanëdash. Aidi shubu dadpen yacno tabadboedi nëbi uano unësaïd chococate macuësh cuënote yacno tabadpanëdash. ²⁸Aidi Esus bëquedec choash sidquianec Esusën taëno uebudash: —¿Atotsienuec ëbi isec cho? Nuquin Papan madombo mibi cadoque. Ëbi mëyanenda —quec onquenubien ²⁹mayan icsa chuiquin: —Dapuduenta

—capanëdash Esusën. Mayan icsa dapuduedaid nad icpanëdash. Shocosh bucun abi mëtaniaidbëdtabi abi tataniaid chictenesho isun, Mëtanenu, cainquio yampanëdash. Adoac mayan icsan matses nibëdacno nidmiaïd icpanëdash.

³⁰Adquid nec, quequin tantiaquin Esusën: —¿Tsutsi cuëmëdquid mibi ne? —capanëdash.

Adoaquien: —Sinco midted dapuduedondaid nebi —quepanëdash mayan icsa dapuduedaid onquec.

³¹Aden chiashic: —Mibi bëdambocquid cadoque. Ënenquiocquin mëyanacno cuidnuequin ëbitedi nidmenda —quiashic ³²chancho dadpenshun pec tabadsho isash: —Ëbitedi chanchotedi dapuduedtiadquio iquebi. ¿Ada bëdambo icpec? —quepanëdash mayan icsa dapuduedaid.

Adoaquien: —Aïdo dapuduedtan —Esusën cac ³³dapuduequei chancho mayan icsa dadpen dapuduedash acte quiusudacno chancho comapenec niquec chian pudun-pudunec mentoadbudnec nibëdquieq unësbunepanëdash.

³⁴Adsho isash chancho pemequin isquido titinquianec shubu dadpen yacno choshon ambi isboed chuituidac ³⁵anocquido istanu quianec Esus yacno cho-chopanëdash. Adec choshon mayan icsa dapuduequin bëdamiaïd dashcute dasiuidash bëdamboen tantiec Esusën taëno tsadsho istuidpanëdash. Adec aid onquesho isash anocquido, Uinsadpambo iquec, quiaish dacuëdcuededpanëdash. ³⁶Dacuëdsho isun mayan icsa dapuduequin bëdamiaïd isquidon ambi isboed dacuëdquido chuipanëdash. ³⁷Aden chiac: —Nëuëshquio nidenquio icpec —quepanëdash dacuëdquido Esus chiec. Adoac Esusbëd icquido canon antabëdtopanëdash.

³⁸Adsho isun: —Mibëd nidiadquio iquebi —quepanëdash ambi mayan icsa dapuduequin bëdamaid Esus chiec.

³⁹Adoaquien: —Padi. Min shubuno nid. Ambo tabadquin Nuquin Papan naid mayan icsa mibi dapuduedaid dapuduemaid anocquido chuibanta —quianec Esus canon nidpanëdash. Aid nidnubien mayan icsa dapuduequin bëdamaid nidanec aton shubu yacno choshon anocquidtedi Esusën naid abi mayan icsa dapuduequin bëdamaid chuibanoapanëdash.

Chido intac budaid bëdanaid icnuc champi uincuemaid

(Mat. 9.18-26; Mad. 5.21-43)

⁴⁰Adashic chian potiash cuëma utsiuc Cadidia yacno Esus padpidec chosho isash: —Mibi isec bëdambo iquebi —quepanëdash iccuededquido abi cainquido. ⁴¹Adnubien, Nuquin Papan chiaid chuibante shubun tabadquid isquid Aido cuëmëdquid choash Esusën taëno uebudash: ⁴²—Con champi abentsëc tishaid unësanequidquio iccosh. Aton seta 12ted icquid niosh. Ëbi cudasaid nec. ¿Aidi isnuec con shubuno ada nidtsia? —quepanëdash Aido.

Aden chiac Esus nidnubien cho-choquido dadpen tsucus-tsucustsëcquio yec Esus datsidadpanëdash. ⁴³Adnubien, chido seta 12ted matamec intac budaid chopanëdash. Aidi dauëchoquid dadpenshun bëdametiapimbo icpanëdash. ⁴⁴Adoac bëdanabi yec, Bëdamequidën ëbi bëdamepec, abibi quianec Esusën cachoc choshon ismenquiocquin Esusën dashcute cuëmano mishnubi aton intac badedquio bëdampanëdash.

⁴⁵Aden mishac: —¿Tsuntsimbini mishosh? —quepanëdash Esus. Aden

chuisho tantiash abi datsidash capuquido mishambo yec otacquio tabadcuededpanëdash. Adec tabadnubien: —Matses dadpenshun tsucus-tsucustsëcquiocquin mibi cuëscabededec —capanëdash Petedon.

⁴⁶Adoaquien: —Matses abentsëcshun ëbi mishosh. Ëmbi nadatiambocquin natequid bëuesadtsac —quepanëdash Esus.

⁴⁷Adec Esus onquesho tantiash chido, Ambi tantiacpadomboen ëbi isec, quec abibi onquequi dacuëdec uëdëquequi Esusën taëno uebudtuidpanëdash. Adec uebudec datsidadquidon tantianubi: —Intac bëdanuequin min dashcute cuëscatsequi bëdanobi —quepanëdash chido Esus caic.

⁴⁸Adoaquien: —Mimbi tantiacpadquieci mibi bëdanaye. Dacuëdenquio yec bëdamboec tabadec nid, champi —capanëdash Esusën.

⁴⁹Aden Esusën chuinubien Aidon shubun icquid utsibo Esus yacno cho-chopanëdash. Choash: —Min champi unësoshe. Chuibanquin tantiamequid min shubuno nidnunda —capanëdash abi yacnoësh choquidon Aido chuiquin.

⁵⁰Aden chuisho tantiash: —Dacuëdenda. Aden tantiequi nid. Mimbi tantiacpadquieci min champi bëdaneque —quepanëdash Esus Aido caic.

⁵¹Aden chianec Aidon shubuno nidash cho-choquidotedi, Ëbëd puduedenda, quequin chianec Peto, Uan, Acobo aidted buanec Aido cuëmëdquidën champi yacno Esus puduedpanëdash.

⁵²Ambo puduedshun anocquido unësquio yec shubisho tantiashun: —Mibi shubieque. Ënëdta. Champi unësenquio yec usheque —capanëdash Esusën.

⁵³Adsho tantiashun, Champi unësacsho isombi, quequin Esus

tantienquiocquin shubiquidon
mamënshumbededpanëdash.

⁵⁴Mamënshumbedednubi Esusën Aido
cuëmëdquidën champin mëdante
mëdinquin: —Nidto, champi
—comapenen cac ⁵⁵aton tiboedte
unësabi yec champi badedquio
nidtopanëdash. Champi nidtosho isash:
—Peme —quepanëdash Esus. ⁵⁶Aton
champi nidtosho isash: —Adopenshenda
iquec —quepanëdash ani amëbëdi.

Adoaquien: —Mimbi isboed
chuiibanenda —quepanëdash Esus.

**Esusën ëbi chuiibeneta,
quequin ambi nidmiaido**

(*Mat. 10.5-15, 14.1-12; Mad. 6.7-29*)

9 ¹Adashic ambi ëbi chuiibeneta caido
12tedtsëqui chometanquin Esusën
nadopanëdash: —Ëmbi
nadatiambocquin nabanacpaden
mibitedishun nabanendac. Mayan icsa
dapuduequinc daicsaido
bëdamequinc cain mibi
capucueniacnoshon mimbi
ismebenendac. ²Nëbi mibi nideque.
Adec capucuenequin chuibenequimbi
bëdamebeneta. ³Nidquin cueste uidën
nidte buanenda. Shictoadte buanenda.
Petequid buanenda. Mitsana bedtequid
buanenda. Dashcute utsi buanenda.
Buanenquio yec dadauidquio nidtan.
⁴Adec nidash mibi yuedquidën shubun
puduedshun ëmbi chiacpadomboen
nabanec anouidi tabadta. ⁵Mibi nidacno
mibi yuedquid nibëdsho isun naden
nata. Mimbi tantiaid icsa mibibi
cuidadte nec, quequin nidaid putu
tasequequin ismeta —capanëdash
Esusën abëd icquido chuiquin.

⁶Aden chiac nidash abëd icquido abi
yuedacno puduedash tabadquin Esusën
chiacpadomboen Nuquin Papabëd
tabadaid chuiibanquimbi daicsaido
bëdamebenepanëdash.

⁷Adnubien Esusën nabansho isquidon
Edodes chuibampanëdash. Edodes
Cadidia yacnocquido ancaquid
icpanëdash. Aden Esusën nabanaid
chuisho tantiashun, ¿Tsudain nepec?
Edodesën caquien,

Acten mentoanondaid, Uan
cuëmëdquid uincuempash icnui,
quenubien; ⁸Edias Nuquin Papan ambi
chiaid chuimiampid padpidec choapash
icnui, utsi-utsiec quenubien, Nuquin
Papan chuimiampid utsi uincuenoapash
icnui, utsi-utsiec quecuededpanëdash,
quequin chuipanëdash Esusën nabansho
isun chuiquidon Edodes tantiamequin.

⁹Adoaquien: —Mambi
uincuentiapimbocnoc Uan mapi
budtemiondac. ¿Tsudain ëmbi
tantiacmaidquio adobanquid icpec?
—quiashic Esus iste bumpanëdash
Edodes.

Matses dadpen pemiaid

(*Mat. 14.13-21; Mad. 6.30-44; Uan 6.1-14*)

¹⁰Adashic ambi nidmeboedo Esus
yacno padpidec choapanëdash.
Choashumbic ambi nabamboedtedi
chuibampanëdash. Aden chuibansho
tantiash Esus abëd icquido bëyucanec
shubu dadpen icquid Betsaida caid
anoentsëqui nidpanëdash. ¹¹Aido nidsho
isun cho-choquidon tsibanampanëdash.
Adsho isun Esusën Nuquin Papa yacno
tabadaid chuiibanquimbi daicsaido
bëdamepanëdash.

¹²Adashic ushë budtsan Esusbëd
icquidombo Esusën dayunquio choshon:
—Nëmbo shubu nibëdeque. Shubu
utsi-utsiec yacno nidshun pete bedshun
pec tabadta, quequin cho-choquido
chuita —capanëdash Esus chuiquin.

¹³Adoaquien: —Padi. Mimbibi aido
pemeban —capanëdash Esusën.

Aden chiaquien: —¿Ma nëmbobi
panëmpi mëdante auc abentsëcted

icnubi nuëcquid daëd iquec.
Aidtedtsëqui icsho isunda
cho-choquidtedi pemenuequin ëbitedi
bedtan, cai? —quecuededpanëdash
abëd icquido.

¹⁴Ambobi tabadsho chido
bacuëbobëdtabi tambanenquio icquimbi
dadauidquio, 5000ted icnuc
tambampanëdash.

Adoquien: —Nëidtedi uano
50ted-50tedquien tabadme —Esusën cac
¹⁵ambi chiacpadomboen
tabadmepanëdash. ¹⁶Aden tabadmesho
isun panëmpi 5tedbëdta nuëcquid daëd
sananquin abuc isec: —Mibi
bëdambocquid icquin mimbi meniaid
nëid pete nec, Papa —quec onqueshun
pete cuësh-cuëshun: —Meneban
—Esusën caquien abëd icquidon
menebampanëdash.

¹⁷Aden menebanac piash cubudambic
napi uaid sandobanquin tsitsan 12ted
icnuc Esusbëd icquidon
bedbampanëdash.

Chuiquid dapa abentsëcquiobi iquec, quiaid

(Mat. 16.13-19; Mad. 8.27-29)

¹⁸Adashic, matses nibëdacno abëd
icquido icnubi Nuquin Papa chiec Esus
onquepanëdash. Adec onqueshumbic:
—¿Tsutsi ëbi tsibanquidon ëbi capec?
—capanëdash Esusën.

¹⁹Adoquien: —Acten mentoanondaid,
Uan padoen Esus nechitec, quenubien,
Edias Nuquin Papan ambi chiaid
chuimepampidien Esus nechitec, utsibo
quenubien, Nuquin Papan chiaid
chuimepampid uincuenoaidien Esus
nechitec, utsibo queoaposh
—quepanëdash abëd icquido.

²⁰Adoquien: —¿Ma, mimbi, tsutsi ëbi
cape? —capanëdash Esusën.

Adoquien Petedo: —Chuiquid dapa
abentsëcquiobi, Nuquin Papan

chomiaidquio yec Quidistu caid ma
mibi neyoc —quepanëdash.

Abi unëste chiaid

(Mat. 16.20-28; Mad. 8.30-9.1)

²¹Adoquien: —Mimbi ëbi tantiaid
nëbi utsi chienda —quepanëdash Esus
comapenen chiec. ²²Aden comapenen
chiashic Esus: —Ëbi matsesaid icsho
natiambocquin mëyantequid iquendabi.
Ëbi chieshënquido dadpen iquendac.
Nuquin matses tsusio dapabo yec tsusio
utsibo yec Nuquin Papan naden nata
quequin chiaid chuibanquin
tantiamequido yec quec aidtedi ëbi
chieshënquido nec. Aidon naden
chiendac: ¿Esus chuiquid dapa
abentsëcquiobi Nuquin Papan
chomiaidta nedic? Aidpenquio nec,
quequin ëbi cuesunemependac aidombi.
Adoquini daëdec ushacsho uincuen
uaindac —quepanëdash Esus abi
uincuen uate chiec.

²³Aden chiashic: —Ëbi tantiaquid
icnuequin ambibi tantiacpadomboen
nainquiocquin ëmbi chiacpadomboen
nabantiadquidi nec. Ëbi mëyanacpaden
mëyanuc unësmene quenquiocquin
tantesa uainquiocquid. Ëbi
tantiaquidquio iquendac adquid.
Nidaidën tabadaiduidi tantiaquid iquec
Nuquin Papa yacno nidenquio iquendac.
²⁴Cuesunenu cac unësmene quiaish Esus
tantiaquid nebi queboedi Esus tantiesa
nebi quequid unësash Nuquin Papa
yacno tabadenquio iquendac. Utsibo,
Esus tantiaquid nebi, quiaishic abi
cuesunenuequid icnuc adecbidi Esus
tantiaquid nebi, queoaposh. Adquid
unësash Nuquin Papa yacno
tabadendac. ²⁵¿Atotsieshun Nuquin
Papa yacno tabadaid tantienquio yec
nidaidën bëdamboec tabadnuequin
bedted-bedtede? Mimbi bedaidënquio
Nuquin Papa yacno puduedtiapimbo

mibi iquec. ²⁶Esusbëdtabi ambi chiaid tantiaquid nebi nidaidënuësh quetiapimbocquid icsho adquidi ëmbi tantiaid nec, queoatiapimbo iquendabi con pa yacnocquidtedishun tantianubi. ²⁷Nad iquendac. Tantiapiota. Chuinu. Ëbi tantiaquid dadpen yansho ënabicquid utsin-utsinquien isendac —quepanëdash Esus.

Esus bed-bedquesho istiapimbo yaid
(*Mat. 17.1-8; Mad. 9.2-8*)

²⁸Aden chiashic Esus mëdante utsiuc tauadoec ushash Nuquin Papa chiec onquenuc macuësh yacno nidoapanëdash. Petedo, Uan, Acobo aidted buanec macuësh yacno Esus nidpanëdash. ²⁹Adec macuësh yacno nidash Nuquin Papa chiec Esus onquenubi aton bësbed aton dashcutebëdi nac-nacquio ushë chënquiabimboec icpanëdash. ³⁰Adsho isnubien badedquio dada utsi daëd choash adquiobidi Esusbëd nidec. Nëidic, Moises, Nuquin Papan ambi naden nata quequin chiaid dada uamiampid; utsibic, Edias, Nuquin Papan ambi chiaid chuimiampid. ³¹Aid daëdi Esusbëd tabadquin Nuquin Papan tantiampicpadec Edusaden yacnoshon Esus unës uate ushë chiec onquecuededpanëdash. ³²Adnubien Esusbëd choboedo abëd icquido 3ted ushcas mash tabadtuidquin Esusbëd utsi daëd nac-nacquiocquid dasiuidacimboec bed-bedquesho isbededpanëdash. ³³Esusbëd daëd nidtuidsho isash Petedo nadpanëdash: —Nëmbobi iquec bëdambo iquebique. Nëmbobi mibi tabadmenun abentsëc chotsëcnuc shubumpi uanuna, Icbo. Abentsëc mitsana, utsibic Moisesën na, utsibic Ediasën na, quequin shubu uanuna —quepanëdash Petedo. ³⁴Adec Petedo onquenubien abu ushun isadenquiocnoc abitedi

bëtimpanëdash. Adsho isash Esusbëd choboedo dacuëdpanëdash.

³⁵Adnubien abu ushunuësh onquec: —Nëidic ëbëd icte bunquidquio, con madombo, ëmbi bëdamboen isaidquio neque. Aidën chiaidquio tantiata —quepanëdash Nuquin Papa Esusbëd icquido tedestedshun isenquiocnobi.

³⁶Adec onquiash ënëdambi Esusuidtsëqui nidsho abëd icquidon ispanëdash. Adoshombic Esusbëd icquidon ambi isboed utsibo chienquiocpanëdash.

Mayan icsa dapuduedaid madompi
(*Mat. 17.14-21; Mad. 9.14-29*)

³⁷Adashic badiadash macuësh dapa yacnoësh Esus budsho isash bëquedec matses dadpen cho-chopanëdash. ^{38,39}Cho-choash abentsëc nadpanëdash: —Con mado abentsëc icquid mayan icsa dapuduedash icsambo iccoshe. Isec chota. Aidën bedto-bedtoac badedquio sidquianesho aidëmbidi bedshun bëcunedeniac con mado ëcbacushaniosh. Dapuduenenquio icquin con mado aidën uimambo icmedeniosh. ⁴⁰Adsho isash choshon mibëd icquido chuiquin, Dapuduemeta, cauidombi. Adoac mayan icsa dapudue menuequin aidon tanac dapuduenenquio iccosh —quepanëdash dada abentsëc Esus caic.

⁴¹Adoquien ambi nianaïdo caic Esus nadpanëdash: —Nadatiambocquid Nuquin Papa nec, quequin tantiesa mibitedi neque. ¿Tedectsi icshun ëmbi chiaipaden mimbi tantiabempe? ¿Mimbi tantienquiocsho isash tedectsiashini chieshtope? —quetanquin: —Min mado bec cho —Esusën cac aton mado aton papan bëpanëdash. ⁴²Aden bënubi mayan icsan bëcuniac madompi uëdëquiampañëdash.

Adsho isun: —Padi. Chën
—capanëdash mayan icsa chuiquin.
Aden madompi bëdametanquin aton
papa Esusën meneoapanëdash.

⁴³Adsho isash: —Nuquin Papan
nadatiambocquin naid uinsadpambo
iquec —quecuededpanëdash isquido.

Abi unëste chuioaid
(*Mat. 17.22-23; Mad. 9.30-32*)

⁴⁴Adoaquien: —Chuinu.
Bëpiscudenquiocquin tantiaquiota.
Matsesacsho nëbi bedmendabi
—quepanëdash Esus abi unës uate
chiec.

⁴⁵Aden chuisho abëd icquidon
tantienquiocpanëdash. Aden
tantienquio yec, Mimbi chiaid
tantienquio iquembí, quetiapimbo yec
otacquo tabadcuededpanëdash abëd
icquido.

¿Tsutsi chuiquid dapa icpec?
quequin chiaid
(*Mat. 18.1-5; Mad. 9.33-37*)

⁴⁶Adashic: —¿Nuquin Papa yacno
nidash chuiquid dapa mitsiquid icpec?
—quec Esusbëd icquido
onquecuededpanëdash. ¿Èbida chuiquid
dapa icpe? quec ambibi tantiequi
adpanëdash.

⁴⁷Adoaquien Esus tantiaquidquio
icquin bacuëmpi chomeshun aton
dayunquio tabëcash: ⁴⁸—Chuiquid dapa
icnu, quesa icta. Èbi tantiaquid icquin
nëid bacuëmpi bëdamboen nashunquid
iquec èbi nashunoquid iquendac.
Nuquin Papan chiapadomboen
nabanquid Esus nec, quequin
tantiaquidquio iquec èbi chomiondaid,
Nuquin Papa tantiaquidquio icoaindac.
Nidaidënuësh utsi nashunquidquio
icboedi aidquiobi Nuquin Papan
chuiquid dapa icta caindac
—quepanëdash Esus abëd icquido caic.

Abimbo tantiaquid ëbëd icquid nec quiaid
(*Mad. 9.38-40*)

⁴⁹Adashic, Uan Esusbëd icquid
abentsëc nadpanëdash: —Mayan icsa
dapuduemebanquid ispombi. Aidi
mayan icsa dapuduemenuc nadposh:
“Esus, nadatiambocquin naquidquio
mibi cadoque. Mayan icsa
dapuduemeta,” cac mayan icsa
dapuduemposh. Aidi ëbëd
icquidpenquio icsa isun: “Padicnuna,”
cauidpombi. ¿Adambi bëdamboen
chuipo? —quepanëdash Uan Esus caic.

⁵⁰Adoaquien: —Adquid, Padicnuna,
cainda. Nadatiambocquin naquidquio
Esus nec quequin abimbo tantiaquin
ëmbi nacpadomboen nabanquid icnuc
mibipadquid ëbëd icquid neque
—quepanëdash Esus Uan caic.

Esus bunesabo, Samadia yacnocquido

⁵¹Adashic Esus abi abuc indote ushë
chote anoentsëqui yanan, Unësmanc
quenquio yec nidebi, quequin ambibi
tantianec Edusaden yacmi Esus
nidoapanëdash. ⁵²Adec nidnun ambi
bëyucmiaido Esusën abia nidmiac
nidaid Samadia caid yacno shubu
daëdpactsëc yacno Esusbëd icquido
chopanëdash. Choash: —Edusaden
yacno Esus nideque. ¿Aidbëd icquido
ada mimbi yuedpatsia? —caquien
⁵³Esus isadaidbo nec, quequin
yuedenquiocpanëdash Samadia
yacnocquidon.

⁵⁴Adoaquien, Acobobëd Uan
nadpanëdash: —¿Ènabicquido
unësmenuen mimbi nëdëncatequid
chome, Papa, quequindambi Nuquin
Papa chuipe, Icbo? —quepanëdash.

⁵⁵Adoaquien: —Padicnuna. ¿Matses
unësmenuectabi chodio? —quianec
⁵⁶shubu daëdpactsëc yacno
nidoapanëdash abëd icquidobëd.

Esus tsibante bunquidën natequid*(Mat. 8.19-22)*

⁵⁷Adec podquedën Esus nidsho abi databëdquid abentsëcshun nadopanëdash: —Mimbi chuibeniactnombobi mibi tsibananec nidendabi —quepanëdash Esus databëdquid abentsëc.

⁵⁸Adoquien: —Bëdi chëshë aton shëcuën uec. Podochoquidën aton shubu uaic. Aden shubu uainquiocquin Nuquin Papa yacno tabadaid chuibenec nebi —quepanëdash Esus.

⁵⁹Adoshombic: —Ëbi tsibanta

—Esusën caquien utsi:

—Con pa unësascho chococashun mibi tsibanec nidendabi, Icbo —quepanëdash.

⁶⁰Adoquien: —Nuquin Papa yacno tabadnu quequin unësaid chococaquidëmbi ma chococapanuna. Mimbi Nuquin Papa yacno tabadnuequin abi yacno tabadaid tantiaquin mimbi chuibeneta —capanëdash Esusën.

⁶¹Adashic, utsi nadpanëdash: —Mibipadquid icnuequin mibi tsibanendambi. Con matses nidnu quiacnoba ëbi nidme, Icbo —caquien:

⁶²—Mibi tsibanu queboedi utsiba tantiec ëbipadquid ictiapimbo mibi icpec —quepanëdash Esus.

Abi bëyucanec nidquid 72ted icquido*(Mat. 11.20-27, 13.16-17)*

10¹Adshumbic ambi bëyucmiaido dadpen, 72tedi, Esusën nidmepanëdash. Daëd-daëdec shubu utsi-utsiec yacno nidshun chuibeneta, quequin nidmepanëdash. ²Nidmenun aid 72ted icquid Esusën nadopanëdash: —Mimbi ëbi chiac ëbi tantianuequid dadpen icpec. Adquido icnuc aido tantiamenuen ëbi chuibanquid

daëdpactsëc iqueque. Naden Nuquin Papa chui: Icbombo, mibi cadoque. Mibi tantiamenuen chuibanquid dadpen nidmeta, Papa, quequin chui. ³Aden mimbi chiacpaden mibi nidmembique. Ëbi chuibenec nidanetan. Mimbi nidshun chuibenenubi mibi chieshënquido dadpen iquendac. ⁴Ëbi chuibenec nidanequin mitsana buanenda. Mitsana bedtequidbëdta shictoadte buanenda. Tapucudte tapucudenquo yec nidanetan. Adec nidanequin utsi bëquedash tabadenquiocquin datambidanec shubun puduedec nidta. ⁵Shubun puduedshun naden shubu icbo chuita: Nuquin Papabëd abi yacnocquido bëdamboec tabadacpadquiec ma nëid shubun icquido tabadpanuna. ⁶Aden chiac shubu icbo bëdamboec tabadnuequid icsho Nuquin Papan abi bëdamboec tabadte aid shubun icquido menendac. Shubu utsi icbo ëbi chieshënquid ictsiash. Adquid yec mimbi chiaid tantianu qesa aid shubu icbo icpec. Adquid icsho Nuquin Papan abi bëdamboec tabadte aid shubun icquido menenquo iquendac. ⁷Mibi yuedacnouidtsëqui tabadta. Adembidi, mibi yuedquidën meniaid peshun acta. Mimbi chuibanaid cuidquin aidëmbi mibi menendac. Adoac anouidi tabadta.

⁸“Shubu dadpen yacno mibi choacsho yuedshun pete meniac isuidec, Utsitsen bec cho, quenda. ⁹Ambobi tabadquin daicsaid bëdameshun naden chuita: Nuquin Papan Chomiaid abi yacno yuedanquid neque. Aid tantiata, quequin chuita. ¹⁰Shubu dadpen yacno choshon mibi yuedquid nibëdsho isun aton podquedën nidquin naden chuita: ¹¹Nuquin Papan chomiaid mibi chuinuac chobi. Ëbi daëdi yuedenquiocsho mibi chuitiapimbo iquebi. Adoac abi yacno ambi

chomiaidën mibitedi yuedtiapimbo iquendac. Nuquin Papan chomiaid tantiate bunesa mibi icsho isash mibi yacno capuec ëbi tabitacquiaid tabesquenu. Is, quequin ismequin adota —capanëdash Esusën ambi nidmeteuid 72ted icquido chuiquin. ¹²Aden chiashic aido chiec abi Esus onquec: —Naid icsabëdtabi naid bëda chuibante ushë chonoc mibi yuedesa Nuquin Papan comapen cuidendac. Ëbi choabincuc Sodoma yacnocquido icpampic. Ëbi choabincuc aidon ëbi tantiatipimbo icpampic. Adquido Nuquin Papan bëdiactsëc cuidendac —quepanëdash Esus.

¹³Aden ambi nidmeteuid 72ted icquido chuibanshumbic utsibo isacbiboen Esusën nadopanëdash: —Nëbi icquido, shubu dadpen icquid tantiec unësquiocquin mibi chiembique. Tantiata. Shubu dadpen icquid Codasin caid yacnoshon ëmbi nadatiambocquin nabansho mibitedishun isted-istedshumbi Nuquin Papan chomiaid nec quequin tantienquo mimbi iccuededpec. Adembidi nadatiambocquin nabansho isted-istedboedi Betsaida yacnocquido mibi nec. Aden ëmbi nasho isash ëbi tantiesa mibi icoapec. Ënden yampido isadaidpembon ëmbi nadatiambocquin nabansho isun, Icsaquid nebi, qeshun unësquiocnoc shubiquin abi icsaid ëntsempampic. ¹⁴Aden Tido yacnocquidobëdtan Sidon yacnocquidon tantiashun abi icsaid ëntsempampic. Adquido Nuquin Papan bëdiactsëc cuidendac. Isadaidbo Codasin yacnocquidobëd Betsaida yacnocquido ëbi isquido mibitedi nec. Ëbi tantiesa icsho Nuquin Papan mibi comapenen cuidendac. ¹⁵Adecbidi, nëbi icquido, Capednaun yacnocquido mibi unësash ¿Nuquin Papa yacnoda mibi nidpe?

Padenquo. Ëmbi nadatiambocquin nabansho isun tantiesa yec chian anëdënquiacno mibi nidendac —quepanëdash Esus abi tantiesabo chiacbibmoec onquec.

¹⁶Aden chiashic, ambi nidmenu caido 72ted icquido tantiamenuen chuibudec: —Mibitedishun ëbi chiac ëbi tantiaquido utsibo iquendac. Adquiobidi mimbi ëbi chiac ëbi tantiesabo icoaindac. Adomboembidi ëbi chuibansho tantienquo yash ëbi chomiondaid tantiesambo nendac —quepanëdash Esus. Aden chiac ambi nidmenu caido nidanepanëdash.

¹⁷Adec nidanequin Esusën chiacpaden nabeniashic, Bëdambo iquebi, quecuededec Esus yacno cho-choapanëdash. Adec cho-choash: —Mimbi chiacpaden nabanombi. Aden nabanquimbic, Esusën nadatiambocquin naidënquo dapuduenta ëmbi caidtedi mayan icsa dapuduemposh, Icbo —quecuedepanëdash ambi nidmiuido 72ted icquido ambi nabod Edus chuibanec.

¹⁸Adoquien: —Ëmbi nadatiambocquin nabanquin tantiamiac mibitedishun mayan icsa dadpen dapuduemebedednubi abi dëniacacbibmoecnuc bedquetanacbibmoec Satanab abucüesh badedquo paëdsho isec niobi. ¹⁹Ëmbi nadatiambocquin nabanacpadquid mibitedi icmebanombi. Aden mibitedi adquid icmiacsho mibi chieshënquidon mibi icsa uatiapimbo iquendac. Mibi chieshënquin icsa uanuequido nisibimbocquido nec. Aidobidi icsa uanuequid yec chichumbimbocquido neoaic. Adquid nisi icsho catashac mibi petiapimbo iquec. Adomboembidi catashac chichunën mibi setiapimbo icoaic. Adquidbibmoec mibi chieshënquid icsho ëmbi

chiacpadomboen nabanac mibi icsa uatiapimbo iquendac. ²⁰Aden nabanac mibi icsa uatiapimbo icsa isash, Bëdambo iquebi, quenda. Nuquin Papan abi yacno chomenuequin ëbi cuëmëdquid ënden dada uaid iquec abi yacno ëbi puduedte iquec, quequin tantiec, Bëdambo iquebi, quianta —capanëdash Esusën ambi nidmiaido chuiquin.

²¹Aden chuibanshumbic ambi nidmiaidon chiaid tantiash, Bëdambo iquebi, quequin Nuquin Papa Esusën nadopanëdash: —Abu icbo nidaid icbobidi mibi nec, Papa. Adquid icquin ëmbi nidmiaido mimbi tantiamiacpadomboen nadatiambocquin aidon nabededosh. Aden nabededshun chuisho tantiash bëdambo iquebi. Dadpen tantiaquido mimbi nadatiambocquin naid tantiamenquiocquimbi, ëmbi namiaido, daëdpactsëc tantiaquidobien mimbi tantiamioc, Papa. Mimbi tantiacpaden tantiamiac ëmbi nidmiaidon nabededosh, Papa —quepanëdash Esus Nuquin Papa chiec.

²²Aden Nuquin Papa chiec onquequin nainec: —Con pa abia yampid icquin abitedi tantiaquidquio nec. Aidën abipadquid icmiaid nebi. Aid abentsëcquiobi ëbi bëdamboen tantiaquidquio con pa nec. Adecbidi abëd abia yampid icquin con pa bëdamboen tantiaquidquio nebi. Adquid icquin, Con pa nad iquec, quequin ëbi tantiaquido tantiamendambi —quepanëdash Esus abi tantiec choash iccuededquido caic.

²³Aden iccuededquido chuibanshumbic naden ambi 72ted icquido nidmian choboedouditsëqui Esusën chuioapanëdash: —Ëbi tantiaquido icquin ëmbi tantiamiacpaden mimbi nabansho isun

Nuquin Papan bëdambo iquebi camiaido mibitedi nec. ²⁴Nuquin Papan chiaid chiampidobëd ancanquid icampido mimbi nadatiambocquin nabamboed iste bunquin aidon istiapimbo icpampic. Adembidi, ambi chiaid Nuquin Papan chomiaid abi yacno puduedmianquid chosho iste bunquin aidon ëbi istiapimbo icoapampic —quepanëdash Esus.

Utsi tantiaquin bëdamboen naquidquio

²⁵Adashic, ¿Tantiaquidquioda Esus neque? Tantiabono, abibi quequin dada utsin: —¿Nuquin Papa yacno tabadnuen atotsimbi napeba? chuibanquin tantiamequidën ëbi chui —capanëdash.

²⁶Adoaquien: —Ambi Nuquin Papan naden nata quequin chiaid Moises dada uamiampid ¿mitsipaden chuipec? ¿Aid isquin atotsi mimbi tantiap? —quepanëdash Esus abi chuimequid caic.

²⁷Adoaquien: —Nuquin Papan chiaid nad iquec: “Nuquin Papa tantiadoneta.” Ambi chiaid utsibic: “Mibi icnëdacpadpenquio yec Nuquin Papa bunacpadquieci tabadnuec adquiota.” Ambi chiaid utsibic, “Nuquin Papa tantiaquid nebi quequin bëdamboen nadeneta.” Utsibic, “Nuquin Papa tantiaquid nebi quequin ambi chiacpadomboen tantiaquiota. Aden nabanquimbi utsibo adembidi bëdambo icmequin naban. Ëbi tantiaquin nashuntiadquidi utsibo nec, mimbi cacpaden utsibo tantiaquin nashunta,” quequin Nuquin Papan chiaidquio nec —quepanëdash Esus chuimeboed Esus caic.

²⁸Adoaquien: —Bëdamboen mimbi chioque. Nuquin Papan chiacpadomboen nabanec Nuquin Papa yacno mibi tabadendac —quepanëdash Esus.

²⁹Aden Esusën chiac ëbi otacquoio icsho isash Nuquin Papan chiacpadpenquiocquid nepec, quequin iccuededquid utsibon ëbi chuitsiash quequin tantiashun Esusën chuimeboed: —¿Mitsicquid con utsi nepec? —quepanëdash.

³⁰Adoaquien Esus: —Utsi chuinu. Tantiata. Edusaden yacnoësh shubu dadpen icquid Edico caid yacno nidsho isun ampequidon bedshun ambi aton na bedtequid aton dashcutebëdtabi chicshun icsa uabudtsëcquien cuestanquin niamposh. ³¹Adoambi, cuestanquin nianaid uiacno podquedën choquin isadaidbo tsusion, Con matses nenushe. Isnu, quenquiocquin uano datamposh. ³²Utsibic, Nuquin Papa tabadte shubu uashunaid nuntan nashunquid choquin, Con matses nenushe. Isnu, quenquiocquin adembi uano datanoaposh. ³³Utsibic, Samadia yacnoësh choquid aid podquedëmbi choquin cuestanquin nianaid istuidash unësquiocquin ³⁴aton dayun tsadbudshun cuestanquin nia-naidën chiuëtedi aton dauëmbi bënoshcashun bëtaneshumposh. Aden bëtaneshunshun cuestanquin nianaid aton cabayo canandoash aton cabayobëdi nidequi capuquido puduedmete shubu yacno choash abëdi tabadquin bëdamboen isquin nashumposh. ³⁵Adec tabadashic badiadshun capuquido puduedmete shubu icbo cuidquin aton na bedtequid meneposh. Aden menequin nadoposh: “Nidebique. Ëmbi bëboed ampequidon cuestanquin nianaid bëdamboen isquin nashunta. Mimbi aid nashunacsho isun mimbi meneboed cuidquin mibi menendambi,” quequin chianec ampequidon cuestanquin nianaid istuidshun nashumboed nidposh —quepanëdash Esus. ³⁶Aden chuishumbic: —Ëmbi chuibod

utsi-utsiec icposh. ¿Mitsicquid ampequidon cuestanquin nianaidën utsibimboecquid icposh? —capanëdash Esusën.

³⁷Adoaquien: —Ampequidon cuestanquin nianaid istuidash unësquio yanquin abi nashumboedien con utsi nec, capendac —quepanëdash Esus chuimequid.

Adoaquien: —Adembidi mimbembi ëmbi chuibodbimboecnuc utsibo tantiaquin nashunoata —quepanëdash Esus.

Madtan nabanubi Madian tantiaid

³⁸Adashic, Esusbëd nidequi abëd icquido shubu daëdpactsëc yacno chosho isun anocquid chidon Madta caidëmbi Esusbëdta abëd icquido aton shubun yuedpanëdash. ³⁹Adoac ambo puduedash tsadquin Esusën chuibansho Madian Madtan chibinquo datsadbudshun tantiapanëdash. ⁴⁰Adec tsadquin Madian tantianubi Madtan ambi natiadquio yaidtedi tantiaquin nabampanëdash. Aden nabanequi Esus yacno choshon: —¿Con chibin ëbëdtambi nainquiocsho isenquioda mibi ique? Min utsibëdtan nabanta, cata, Icbo —capanëdash Madtan Esus chuiquin.

⁴¹Adoaquien: —Mimbi natiadquio yaid dadpen tantiaquidquio mibi iqueque. ⁴²Ëbi tantiaquidquio icta. Adquid min utsimbo Madia icsho, Padicnuna. Min utsibëdtan nabanta, catiapimbo iquebi —quepanëdash Esus Madta caic.

Nuquin Papa chiec onquianete

(Mat. 6.9-15; 7.7-11)

11 ¹Adashic ushë utsin Nuquin Papa chiec Esus onquepanëdash. Aden Nuquin Papa chiec onquequin nainacsho isun abëd icquidon nadopanëdash:

—Nuquin Papa chiec onquianeta quequin
Uan padon abëd icquido
tantiamapanëdash. Adembidi Nuquin
Papa chiec onqueta quequin ëbitedi
tantiamequin chuioa, Icho —capanëdash.

²Adoquien: —Nuquin Papabëd
onquequin naden chuita:

“Bëdambocquidquio mibi nec, Papa.

Adquid mibi icsho matsestedishun
mibi con icbo capashun, Papa.

Mibi yacnoshon mimbi uaido
mayan bëdabon mimbi
chiacpadomboenuidi naic.

Adomboembidi matses
abitedishunquo napashun, Papa.

³Tantiaquidquio, mibi cadoque.

Bumianenquiocquin
badiadquidën-badiadquidënquien
con pete ëbi bedmedene, Papa.

⁴Adecbidi utsin ëbi chieshënsho
cuidenquio yec ëbi abi icsaid
bëpiscudacpadquiequi ëbi icsasho
cuidenquio yec bëpiscudoata,
Papa.

Adembidi, Satanasën icsa uanushe
queshun ëbi cudasquin dayun
uata, Papa, quequin chuita”

—quepanëdash Esus.

⁵Adtanequic Esus nadpanëdash:

—Mibëd nashunanquid iquec. ¿Adquid
icnuda inchëshpotsembo abi yacno
nidshun pete mimbi bedshumpatsia?

⁶Inchëshpotsembo pete bedshunuec
mibëd nashunanquid yacno nidash: ‘Ëbi
yacno utsi chosho pete nibëdnubi
yuedombi. Con pete nibëdsho isash
pemenun bedec chobi. Mimbi meniaid
cuidquin adquidi mibi meneoaimbi,’
quepatsiac mibi mibëd nashunanquid
caic.

⁷“Adoquien, nuntanuëshi: ‘Padi.
Shëcnandombi. Con bacuë ishacunec din
ictoshon mibi menetiapimbo iquebi,’
quequin mibëd nashunanquidën mibi
chuitsiash.

⁸“Aden aidën chiaqui min pete
nibëdnuc chuidonetsiac mimbi. Aden
chuidoniac mibi menetsiash. ¿Abëd
nashunanquid icshoda mibi menepadic?
Padenquio. Mimbi nidenquiocquin
chuidonesho tantiashun mimbi
chuiboedtedi mibi menepatsiash
—quepanëdash Esus.

^{9,10}Aden chiec abi onquec:
—Adomboembidi Nuquin Papa
chuidonesho mimbi bedtiadquio yaid
aidëmbi mibi bedmendac. Adembidi,
Nuquin Papa tantianu quequin abi
chuidonesho mibi tantiamendac.
Adembidi, abi chuidonesho Nuquin
Papan aton Mayan mibëd tabadmiac
aidën Nuquin Papa mibi tantiamendac.

¹¹“Adembidi chuinu. Tantia. ¿Min
mado, Nuëcquid bec cho, qeshoda
mimbi nisimbo menedi? ¹²Adembidi,
¿Cachinan bacuë bec cho, qeshoda
mimbi chichun menedi? ¹³Padenquio.
¿Aden icsaquid icquin min bacuë
tantiaquin bëdamboen menequid mibi
icnuc Nuquin Papa icsaisa icquin mibi,
Min Mayan ëbi mene, qesho
tantiashun menenquioda mibi ictic?
—quepanëdash Esus.

Bedtsibun namiaid Esus nec, quequin chiaid

(Mat. 12.22-30; Mad. 3.19-27)

¹⁴Adashic, mayan icsa dapuduedquin
eme uaid icsho Esusën istanquin:
—Dapuduen —cac mayan icsa
dapuduempanëdash. Adec dapuduenan
ambi eme uaid onquepanëdash. Adsho
isash tantiadempambo yec iccuededquid
dadpen tabadcuededpanëdash.

¹⁵Utsiboen: —Mayan icsan icbo
Bedtsibu caidën tantiamiac mayan icsa
Esusën dapuduemepash icnui
—quepanëdash Esus chieshënquido.

¹⁶Adnubien iccuededquid utsibo:
—Nuquin Papan chomiaidquio icquin

Nuquin Papa mimbi chiac aidëmbi abucshun naquin ëbi isambo yaid nadatiambocquin ismepatsiashi. Aden mimbi Nuquin Papa chiac aidën nadatiambocquin nasho isash, Nuquin Papan chomiaid nebi quequin abimbo chuiquid mibi nec, mibi catsiambi —quepanëdash iccuededquid utsibo Esus caic.

¹⁷Aden chuisho tantiashtantiaquidquio yec abi icsamboen chuimenuequido chiec Esus nadpanëdash: —Chuiquid dapa nëishquin abëd icquido comapenen chushcac, Abëd ictiapibi, quianec cuëshëd-cuëshëdec nidanepec. Adec nidaniash chuiquid dapa ictiapimbo aid iquendac. ¹⁸Adembidi, Bedtsibu cashumbic Satanas caid mayan icsatedi chuiquid dapa nec. ¿Mayan icsa icquinda abëd icquido dapudumequid ëbi icmepadac? Adembidi, ¿ambi mayan icsa dapuduemiatic abëd icquido nibëdenquioda ictic? ¹⁹Bedtsibun tantiamiaid nec, mimbi ëbi capec. Adembidi mibëd icquidon mayan icsa dapuduemec. ¿Tsuntsin tantiamiac aidon mayan icsa dapuduemepash? Nuquin Papan tantiamiaido nebi, aido qesho tantiasht, Abimbo caic, mibi quepec. Adomboembidi Nuquin Papan tantiamiaid nebi, quequin ëmbi chuisho ¿atotsi quiasht, Abimbo chiec, quenquio mibi icpe? ²⁰¿Nuquin Papan tantiamiac mayan icsa dapudumequid ëbi yec ambi chomiaidquio matses chuiquid dapa mibi yacno ënden choabida ictio? —quepanëdash Esus abi chuimequido chiec.

²¹Aden chiashic abi onquec: —Mibitedi tantiamenuen utsi chuinu. Bëdamboen tantiata. Chuiquid dapa icquin abëd icquido cuëshëdnu quenquiocquin bëdamboen chuiquin namepec. ²²Aden namiatic tabadnubi chuiquid dapa icnuequid utsi chopec.

Nëbi choquidën abia chuiquid dapan yuabo nameshun nua meniac aidën yuabo yanoapec —quepanëdash Esus.

²³Aden chiashic: —Ëbëd icquido ëbi chieshënesa nec. Matses ëbëd icquido icmenu quequid nebi. Matses Esusbëd icmenu qesa cuëshëdmianquid nec —quepanëdash Esus.

**Abibi dapuduemoed mayan icsa
dapuduedoaid
(Mat. 12.43-45)**

²⁴Aden chiashic abi onquec: —Abi dapuduedaid mayan icsa abibi dapuduenanec abipadquid tabadacno icsano matses nibëdacno nidash capuquin abi dapuduedbocpadquid istuidenquio icposh. Adquid istuidambo yec, Abibidi dapuduedoanu, quianec anobidi nidoaposh. ²⁵Adec nidshun abi dapuduemoed naden istuidposh. Mayan icsa nidan, Ëbibi bëdambo iquec. Adash bëdambo tabadnu, abibi quiasht, Nuquin Papa tantianu, quenquiocposh. Aden chienquiocsho aton Mayan Nuquin Papan aid menetiapimbo icnuc abi dapuduemoed choshon aid abentsëcquio ²⁶istuidashic nidoashun abipadquid chuituidac utsi 7ted abëdi choash abitedi dapuduedcuededac dada icsamboshë yamposh —quepanëdash Esus.

²⁷Aden Esusën chiambien iccuededquid chido: —Mibi tishacsho shuma chishmiondaid Nuquin Papan bëdamboen isaid icpec —quepanëdash Esus caic.

²⁸Adoquien: —Aden nasho padenquio. Nuquin Papan chiaid tantiashtun nabansho Nuquin Papan bëdamboen isaidquio nec —quepanëdash Esus chido caic.

**Onasën ismiampicpaden ismiaid
(Mat. 12.38-42; Mad. 8.12)**

²⁹Adnubien abi yacno cho-choash utsi dadpen iccuededsho isun Esusën nadopanëdash: —Nëbi nidaidën

tabadquido icsanuequido yec Nuquin Papan abucshun nadatiambocquin naid iste mibi bunacpaden mimbi isenquio iquendac. Nuquin Papan Onas ismiampicpaden ismiaid mimbi isendac. ³⁰Ninibe yacno nidshun ambocquido icsaid cuidte Nuquin Papan chuimiapaden Onasën comapenen chuisho tantiash, Abimbo chuiquid nec, qeshun abi icsaid Ninibe yacnocquidon ëmbodedpampic. ³¹Utsibic, Nuquin Papan dadpen tantiamiaid, Sadomon iquec qesho tantiash chuiquid dapa chido Sadomonën chiaid tantianuec ënapenuësh choshon tantiash, Abimbo iquec, quepampic. Nuquin Papan matsesën naid icsa ambi naid bëdabëdta chuibante ushë chonoc aid chidon tantiampicpadomboen Nuquin Papan chiaid abimbo iquec quequin mibitedishun tantienquiocsho Nuquin Papan mibi isendac. Nuquin Papan bëdamboen tantiaquin chuiquid dapa Sadomon icmepampic. Abitedi tantiampidquio nëmbobi iqueque. Ëmbi chiaid tantiata. ³²Adembidi, matses icsaidbëdta ambi bëdamboen naid Nuquin Papan chuibante ushë chonoc Ninibe yacnocquidon Onasën chiaid tantiapadomboen Nuquin Papan chiaid abimbo iquec, quequin tantienquio icsho Nuquin Papan mibitedi isendac. Nuquin Papan chuimiapaden Onasën chuisho Ninibe yacnocquidon tantiabededpampic. Onas Nuquin Papan matses icsaid cuidte chuimiaidquio icpampic. Padnuen mibi icsaid bedshunash abided cuidadequid nëmbobi iqueque. Ëmbi chiaid tantiata —quepanëdash Esus abibi chiadequi.

**Tabote taboshon bëtashenquio
yacbimboec abi bëdamboec
tabadaid ismequid
(Mat. 5.15; 6.22-23)**

³³Aden chuishumbic Esusën abi chuibanec: —Tabote taboshon ompoesa.

Adembidi matsun bëtashesambo icbo nec. Ma ëmbi yuedaidon isnueshun tabote nënantan nanquid.

³⁴Adoaidbimboec min tantiata iquec. Min tantiata bëdamboec icquin bëdamboec tabadquin ismequid mibi nendac. Bëtashacximboec min tantiata icnuc icsamboen ismequid mibi nendac. ³⁵Con icbo ëbi bednuec choec qeshun bëpiscudenquiocquin isted-istedta. ³⁶Min tantiata icsaisa icsho Nuquin Papan chiacpadomboen tantiaquidquio aidi nec, quequin utsibon mibi isendac —quepanëdash Esus.

**Nuquin Papan icsamboen isaidquio
(Mat. 23.1-26; Mad. 12.28-40; Duc. 20.45-47)**

³⁷Aden Esusën chuibanshobien padiseyobo abentsëcshun: —¿Ada ëbi yacno pec nidtsia? —capanëdash. Adoac aidbëdi nidash pete sanaid cueste dayunquio Esus tsadbudpanëdash.

³⁸Adec Esus tsadsho isash, ¿Adpecshenda iquec. Penush mëpamëdenquio Esus icpec? quec abibi onquequin padiseyobon Esus yuedquidëmbi tantiapanëdash.

³⁹Adoquien, tantiaquidquio iquec Esus nadpanëdash: —Ëndenquimbo padiseyobon peshun acnun dëshote cachocbëdtabi pada-padaid cachoc bëdamboen dapanta quequin chuinëdacpaden mimbi naoaic. Aden dapanshun mimbi codocaidbëdtabi mimbi actequad nitsinaid anauc ampanenquio mimbi icpec. Mibitedi adquio iquec. Nesquin bëchish uquec dapanudquin mimbi tantiataid icsa ënenquio mimbi icpec. Adecbidi, mibi bunaid bednuen icsamboen naquin ampequid mibi nec. ⁴⁰Nuquin Papan chiaid tantiesabimboecquid mibitedi nec. Nuquin Papan matses uaqin dadabëdtabi tantiata uainquioda icpampic. ⁴¹Ai. Adquid icnuc aton na

nibëdquid tantiaquin mimbi
pada-padaidën nitsinaidpadquid
menebanta. Aden mimbi nadenesho
isun Nuquin Papan min tantiatebëdta
min dada bëdamboen isendac

—quepanëdash Esus.

⁴²Aden chiashic padiseyobo caic Esus
nadpanëdash: —Uno bedanquin dies
yacno ënquin min tiedën caniquid ëshë
tambanshun, Nuquin Papan chiapaden
con na 9ted icnubi abentsëc Nuquin
Papan na nec, quequin aid abentsëc
menenuequin mimbi dayun uaic
penquiocquin. Aden nabanquin Nuquin
Papan ambi matses bëdamboen
tantiaquin nabanacpaden naisabo mibi
nec. Min tiedën caniquid dies yacno
cuëscacquin tambanshun Nuquin Papan
chiapaden abentsëc menebanshun
utsibo bëdamboen tantiaquin
nabantiadquidi mibi neyoc. Adesa icsho
Nuquin Papan icsamboen isaidquio mibi
nec, padiseyobo. ⁴³Adembidi, tsusio
dapabimboecsho bëdamboen isashuni,
quequin tantiec Nuquin Papan chiaid
tantiate shubun puduedash tsusiobo
tsadacno mibi tsadtenec. Adomboembidi
tantiec matses iccuededacno nidequi,
Ëbi bëquedquidon ëbi tsusio
dapabimboecsho isash onquequin
chuiplashuni quec mibi capuec. Aden
tantiaquid Nuquin Papan icsamboen
isaidquio mibi nec. ⁴⁴Adembidi, matses
unësaid chococate manenushe queshun
isimequin mabiunu, quenquio
yacpadomboen ëbi icsaid tantianushe
quequin ompoquid mibi nec
—quepanëdash Esus padiseyobo chiec.

⁴⁵Adoaquien, Nuquin Papan naden
nata quequin chiaid tantiembi, quiash
utsibo tantiamequid abentsëc:
—Padiseyobo chuiquin ëbipadquido
mimbi chuiiopec —quepanëdash.

⁴⁶Adoaquien: —Nuquin Papan
ëndenquimbo naden nata quequin

chiaidbëdta mimbi naden nata quequin
chiaid dadpen chuibanquin matses
mimbi namec. Adoac aited matsesën
natiapimbo icpec. Adsho isash, Mimbi
natequid dadpen iqueque. Mibi
nashunu, quesa icsho Nuquin Papan
icsamboen isaid mibi nec.

⁴⁷“Adembidi, Nuquin Papan chuimiai
dadpen min tsusedpabon cuesunepampic.
Tsusedpabon cuesuniampido
ënenquiocquin tantianu quiacbimboen
mimbi shubumpi uabanec. Ëmbi
shubumpi uaido isun utsibon bëdamboen
ispashuni, quequin aden mimbi nabanec.

⁴⁸Aden naquin tantiec, Nuquin Papan
chuimiaiido cuesunequin bëdamboen
tsusedpabon napampic, quiacbimboen
tantiaquid mibi icnuc ambi chuimiampido
cuesuniampidobimboecsho Nuquin Papan
mibi isec. Nuquin Papan icsamboen
isaidquio mibi nec. ⁴⁹Ëmbi chiapaden
chuibanta, cabicquin naden Nuquin
Papan chuiampic. Ëmbi chuimiai
utsi-utsien aton matesën mëyampec.

Utsi-utsien mëyanshun cuesunepec, quec
Nuquin Papa abitedi tantiaquidquio
adpampic. ⁵⁰Aden min tsusedpabo
Nuquin Papan chuimiaiido chuisho
tantiesa icquin aido mëyampampic. Min
tsusedpabopadquid nëbi icquido icquin
Nuquin Papan chuimiai tantiesambo
mibi nec. Adquido iquec ënden
mëyanampidpadquido mibi neoaic. Aido
cuesuniampidpadquido mibi neoaic.

⁵¹Tsusedpan abia abed cuesunepampic
icnubi ambi tsyuec Sacadias
cuesunepampic. Aid Nuquin Papa tabadte
shubu uashunaid dayunquiobi aidon
cuesunepampic. Ai, Nuquin Papan chiaid
tantiesatedi ambi chuimiaiido
cuesuniampidpadquido nëbi icquid
neoaic.

⁵²“Nuquin Papan naden nata quequin
chiaid tantiembi, queshun utsibo
tantiamenquiocsho Nuquin Papan

icsamboen isaido mibi nec. Nuquin Papan chiaid tantienquiocquin abi yacno yuedanquid tantiesa mibi nec. Adquid iquec mibi abi yacno puduedtiapimbo iquec. Adquid mibi icquin naden nata quequin chiaiduidi mimbi chiac utsibotsen abi yacno puduedmiantequid tantiesabo yec abi yacno puduedtiapimbo icoaic —quepanëdash Esus Nuquin Papan naden nata quequin chiaiduidi tantiaquido chiec.

⁵³Aden chiashic, Ëbëdtambi pec cho, queboedën shubunuësh puduenanec Esus nidpanëdash. Adec Esus nidambien abi comapenen chieshënnquidombo padiseyobo: —Esus icsamboen chuimenu —quiampanëdash. ⁵⁴Adquid icquin Esusën chuibanacno nidaneshun chuimeoanuequin naden padiseyobon tantiapanëdash: Ëbitedishun chuimiac Nuquin Papan chiaid icsamboen Esusën chuitsiash. Aden icsamboen chuisho tantiash, Nuquin Papan chomiaid nec, quec mibi muasho tantiashun, Unës uametiadquio iquebi, quequin Esus chiembi, quequin tantiaquin Esus chuimepanëdash padiseyobon.

Natiamiantequidbëdtabi dayacmetequad
(Mat. 10.28-31)

12 ¹Aden padiseyobon: Esus icsamboen chuimeoanembi, quequin tantianubien matses dadpenquioshë Esus yacno cho-choash tsucus-tsucustsëcquio yec tabadpanëdash. Aïdo tsucus-tsucustsëcquio yec tabadnubien abëd icquido Esusën nadopanëdash: —Sicaïd nami uaid cabiunac amëec bidisquedoc matsesën isenquiocnobi. Adembidi padiseyobon Nuquin Papan naden nata quequin chiaidbëdta ambibi tantiacpaden naden nata quequin dadpen chuioaic. Aden padiseyobon

ambibi tantiacpaden naden nata quequin chuisho, Nuquin Papan naden nata quequin chiaidta nec, quequin Nuquin Papan chiaid bëdamboen ista. ²Matsesën ompoquin naid Nuquin Papan abitedi ismendac. Matsesën ompoquin chienquio yaidbidi abitedi tantiamendac. ³Inchëshën min nuntanuësh mibi icsamboec onquiaid Nuquin Papan matsestedi tantiaequin chuibanendac. Nuntanuësh shoshquequin mimbi chiaid Nuquin Papan matsestedi tantiamenuen chuioaindac.

⁴“Adembidi chuinu. Tantiata. Mibi cuesunenuequid dacuëdënenda. Adquidën mibi cuesunequin mibi nibëdametiapimbo iquendac. ⁵Nuquin Papauidtsëqui dacuëdënta. Icsadednequid icsho aidën mibi cuesunemeshun chian anëdënquequid nësecaindac. Adoanquiduidtsëqui dacuëdënta. ⁶Nuquin Papa tantiaquid yec dacuëdenda. Nuquin Papan ambi uaidtedi tantiec. Padichucu dadpen icquid abentsëc cueso isun aid Nuquin Papan tantiapec. ¿Adquid tantiaquinda Nuquin Papan mibi tantienquio ictic. ⁷Ai, mibi tantiaquiec. Min manëdaïdtedi ambi tambanaid nec. Aïd pistsëcquidtedi tantiaquin Nuquin Papan mibi tantienquioda ictic? Mibi comapenen tantiec.

Esus tantiaquid nebi,
quequin utsibon tantianubi chiaid
(Mat. 10.32-33; 12.32; 10.19-20)

⁸“Abi chiembique. Tantiaquiota. Utsibo icnubi Esus tantiaquid nebi, quequin abimbo chuiquid Nuquin Papa yacno chosho isun, Nëid ëbi tantiaquid neque. Puduedme, quequin chiendambi. ⁹Adecbidi, utsibo icnubi, Esus tantiaquid nebi, quetiapimbocquid Nuquin Papa yacno chosho isun, Nëid

ëbi tantiesa neque. Puduedmenda, quequin Nuquin Papan uaido mayan bédabo chiendambi. ¹⁰Ëbi matsesacsho matsesën icsamboen chuipec. Aden icsamboen chuiboshombic, Icsamboen chiombique. Ëmbi mibi icsamboen chienquio yacimboec bēpiscudta, Papa, quesho tantiasch aidēn icsamboen chienquio yacimboec Nuquin Papa bēpiscudendac. Nuquin Papan Mayanēn tantiamiac nasho isash, Satanasēn tantiamiaid nec, quequid icpec. Aidēn chiaid bēpiscudenquiocquin Nuquin Papan abi yacno adquid yuedenquio iquendac.

¹¹“Adembidi chuinu. Tantiaquiota. Mibi chieshēnquido iquendac. Adquid icquin chuiquid dapa yacno Esus tantiaquido ëmbi buanacsho aidēn mēyantsiash, quequin mibi bedshun aid yacno buampec. Aden nanu, quequin buanaqui ¿Atotsimbi chuiquid dapa chuipe? quequin tantienda. ¹²Nuquin Papan Mayanēn mimbi chuibante mibi tantiamique —quepanēdash Esus abēd icquido caic.

Aton na dadpen icquidēn tantiaid icsa

¹³Adashic, abi datsidadquid abentsēcshun: —Con pa unēsān con pan na dadpen con buchin bedbanosh. Mimbi dadpen bedbamboed musuctanquin min utsi meneta, quequin con buchi chuita —capanēdash Esus chuiquin.

¹⁴Adoaquien: —¿Buchibēdta mibi chuiquidtabi nepe? —quepanēdash Esus abi chuita caquid caic. ¹⁵Aden aid chuishumbic utsibo chuiquin nadopanēdash: —Con na dadpen bednu, quesa icta. Mimbi bedaidēnquio mibi Nuquin Papa yacno puduedtiapimbo iquendac.

¹⁶“Aidpadquid chuinu. Bēdamboen tantiata. Aton na dadpen icnubi aton

tiedēn caniquid bacuēash dadpen icsho isash icbo nadposh: ¹⁷‘Con tiedēn caniquid bacuē dadpen iqueque.

¿Atotsimbimbi aidtedi dayun uapeba?

¹⁸Naden naimbi. Tiedēn caniquid èshē dayun uate shubu shēnitedi chicbanshun aidtedi nuamboshēcñuc shubu uabanuna. Aden nuamboshēcñuc shubu uashun aidēnquio con tiedēn caniquid bacuētedi sandoshon dayun uanuna. ¹⁹Aden dayun uashumbic nadopembi: Con na dadpen iquec yuecash naimēdenquio iquec. Ad icñuc nainquio yec tabadquin peshun aquendambi. Aden naic, Bēdambo iquebi,’ quec aton na dadpen icquid abibi onqueposh.

²⁰“Adec abibi onquesho tantiashun, ‘Mimbi icsamboen tantiec. Nēid inchēshēmbi mibi unēsec. Adec mibi unēsān ¿mimbi dadpen dayun uaid tsuntsin bedpatsiash?’ quequin Nuquin Papan aton na dadpen icquid chuiposh —quepanēdash Esus.

²¹Aden chiashic: —Aton na dadpenuidi tantiaquin Nuquin Papan chiacpaden naisa yec aton na nianec unēsash Nuquin Papa yacno tabadtiapimbo iquec —quepanēdash Esus.

¿Atotsimbi napeba? quesa icta, quequin chiaid (Mat. 6.25-34)

²²Aden iccuededquido chuishumbic Esusēn abēd icquido nadopanēdash:

—Aton na dadpen icquidēn tantiacpaden tantienda. ¿Con na nibēdnuc atotsimbi pepeba? quec dacuēdenda. Adecbidi, ¿Atotsibi dasiuidpeba? quec dacuēdenda.

²³Bēdamboec tabadnuequin mibi piasteuidi tantienda. Adembidi, Con dada bēdambo icmenuequin, Dashcute bedteuidi tantienda. ²⁴¿Uicchunēnda

ambibi cuëte ëshë siac bacuëacsho chepadic? Padenquio. Adecbidi, ambi dayun uatequid shubu nibëdnubi aton na nibëdec. Adquid icsho Nuquin Papan aton pete bedmec. Uicchun Nuquin Papapadquidpenquio icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic Nuquin Papan? ²⁵Adecbidi, ¿mibi unëste ushë abimbo chonoc, Padi, quepecta mibi icti? Padenquio. ²⁶Adec mibi unëste chonoc, Padi, quetiapimbo mibi iquec ¿atotsi quiaish ¿atotsimbi pepeba? quepe mibi?

²⁷“Adembidi, cuëtempi chuinu.

Tantia. ¿Cuëtempinda aton bacuë ictequid daëdcapec? Padenquio. Adoenquio yaid aton bacuë ictequid bëdaidquio iquec. Cuëtempi bacuë ictequid bëdaidquio yacpadquid chuiquid dapa Sadomonën dashcute adquio ictiapimbo icpampic. ²⁸Padnuen cuëte bacuë ictequid bëdaidquio icboedi badedquio sequiaish chodquiaacsho tauiquid. Ad icnuc ¿Abipadquid Nuquin Papan uaido mibi icsho mibi dasiuidte bedmenquioda icpadic? Èbi bedmenquio ictsiash quequin Nuquin Papa bëdiactsëc tantienda. ²⁹Aden tantienquio yec ¿Atotsimbi peshun aque? quec dacuëdenda. ³⁰Nuquin Papa tantiesan abi bunaiduidi tantianubi Nuquin Papa tantiaquidquio icquin pete actequidbëdta ëbi bedmedonec, quequin tantiec tabadta. ³¹Adembidi, Nuquin Papabëd tabadnu quequin tantiec tabadta. Aden tantiaquin mimbi bedtiadquio yaid mimbi bedendac.

Abi yacno choacsho meniaid

(Mat. 6.19-21)

³²“Nuquin Papan abi yacno mibi chomeque. Dacuëdenda, ëbi tantiaquido caimbi. ³³Ambo nidabi icquin mitsana

menebanquin mitsana bedtequid bedshun aton na nibëdquid menebanta. Aden utsi tantiaquin mimbi nabanuc Nuquin Papa yacnoshon menetequid mitsana chodquetemaid iquendac. Ampequidën bedtemaidquio iquendac. Capishton petemaidquio aid iquendac. ³⁴Mimbi tantiaidquio mimbi dayun uaid mibi cudasaid nec. Nuquin Papa yacno nidnu quequin mimbi tantiaid icnuc mibi bëdamboec tabadte cudasquin mimbi dayun uaid iquendac —quepanëdash Esus.

Chieshenquiocquin caintequid

(Mat. 24.45-51)

^{35,36}Aden chuishumbic Esusën nadopanëdash: —Aton icbo u isec nidan con icbo chonoshe quiaish dasiuidacchobi ushenquiocquin tabote dëbedtonequin, Con icbo chosho puduedmeshun nashunu, quequin aton yuabon caimpec. ³⁷Aden abi cainquido aton icbon bëdambo icmequin nadopec: “Èmbimbo mibi pemenu. Nëmbo tabadec cho,” qeshun ambi yuaido icbonquio pemequin bëdambo icmendac. ³⁸Adembidi, icbo inchëshpotsembo choshon abi nashunuequin cainquido icsho icbon bëdambo icmiaido iquendac. Adembidi, cachina cuëdanabi badiadabicnuc choshon abi cainquido icbon bëdambo icmiaido iquendac. ³⁹Adquidpenquio icbo utsi chuinu. Tantia. Aidi abi cainquid nibëdnubi aton na icnuc isedanec choshon isac ampequid ënden nidac. Adsho isash, Ampequid choec, quequin tantiaquid yec nidenquio ictsenobi, quependac icbo. ⁴⁰Adquiecbidi ampequid choacximboec Nuquin Icho choequ. Ad icnuc, Chosho ëmbibi tantienquiocchitomane qeshun chieshenquiocquin ëbi cainta —capanëdash Esusën.

⁴¹Aden Esusën chuisho tantias
 Petedo: —¿Utsi chuiquin mibëd
 icquidoudi tantiamenuenda chio?
 ¿Abitedi tantiamenuenda chio?
 Tantianu. Èbi chui —quepanëdash Esus
 caic.

⁴²Adoaquien: —¿Icbon chiac
 mitsipadquiocquin ambi namiaido
 bëdamboen napeba? Adquid chuinu:
 Pete tambanshun musucshun ëmbi
 namiaid utsitedi bëdamboen
 menebanta, quequin ambi namiaid utsi
 abentsëc chianec icbo nidac. ⁴³Adec
 nidashic choshon ambi chiacpaden
 ambi namiaidën chieshenquiocquin
 nabanacsho isun icbon bëdambo
 icmiaid nendac. Adquid naden chuipec:
 Èbi nidan chieshenquiocquin mimbi
 nabanoque. ⁴⁴Èmbi namiaid utsibotedi
 ëbipadquiocquin chuiquid icta. Adquid
 icquin con natedi dayun uata, quequin
 chiendac icbon. ⁴⁵Adquid icnubi
 adomboen naisa icbo utsin namiaid
 icpec. Aton icbo yuec choenquiocsho
 isun aton icbon namiaid utsibo
 chieshënquin cuesbanshun ambentsëqui
 nua peshun tantienquo yanquin aquec.
⁴⁶Aden nabanquin tantienquiocnoc aton
 icbo choshon ambi namiaidën
 icsamboen cuesbanaido isun icbon
 comapenen cuesquin abi tantiesa utsibo
 ambi nidmiacnombo aidi
 nidmeoaindac.

⁴⁷“Adembidi, ambi chiacpaden
 nabanesa icsho isun, Comapenen cuesta,
 icbon cac cuesendac. ⁴⁸Aton icbo
 bunaid tantiaicquidën
 cuesmetiadquiocquin nabansho aton
 icbon bëdiactsëc cuesmendac.
 Adembidi, Nuquin Papan dadpen
 tantiamiaido ambi chiacpaden
 nashuntiadquo iquendac. Adembidi,
 icbon dadpen meniaidon dadpen
 meneoatiadquidi nendac
 —quepanëdash Esus.

**Utsibëd bëdamboec tabadnu
 quesa icquin cuëshëdmequid
 (Mat. 20.34-36)**

⁴⁹Aden chiashe abi onquec: —Èbi
 tantiaquid icnuc ëbi tantiesa yec
 cuëshëdendac. Aido ënden
 cuëshëdondan ëbi tantiaquidombo
 bëdamboec tabadtsiandac, quec tsadebi.
⁵⁰Adecbidi, Yuecshun ëbi unës uanun
 mëyantequid iquendac, quequin tantiec,
 Ènden mëyanondaid iquec abuc Nuquin
 Papabëd tabadtsiandabi, quec tsadebi.
⁵¹¿Nidaidënsun abitedi bëdamboen
 tabadmenu quectabi chodionda?
 Padenquo. Èmbi chiaid tantiesa ëbi
 tantiaquidbëd icboedi cuëshëdtsiashe
 quianec chopondabi. ⁵²Nad iquendac:
 Min shubun icquid sincoted icboedi
 Esus tantiaquid utsi-utsiec yanubien utsi
 padenquo yec cuëshëdec adquid.
⁵³Nadec cuëshëdtsiashe: aton papa ëbi
 tantiaquid icnuc con papadquid icnu
 quesa aton mado cuëshëdendac. Shubu
 utsin aton mado ëbi tantiaquid icnuc
 aton papa adquid icnu quenquo yec
 cuëshëdendac. Adecbidi aton tita ëbi
 tantiaquid icnuc con tapadquid icnu
 quenquo yec aton champi
 cuëshëdendac. Shubu utsin, aton
 champi ëbi tantiaquid icnuc aton tita
 padenquo yec cuëshëdendac. Shubu
 utsin aton chaya ëbi tantiaquid icnuc
 aton babanën padenquo yec
 cuëshëdendac. Shubu utsin, aton
 babanën ëbi tantiaquid icnuc aton
 chaya padenquo yec cuëshëdendac
 —quepanëdash Esus. Abi tantiesa
 cuëshëdtequid chuibanec.

**Nuquin Papan ismiente isun nad
 iquendac, quequin tantiaid
 (Mat. 16.1-4; Mad. 8.11-13)**

⁵⁴Aden abëd icquidombo chuishumbic
 Esusën naden iccuededquido

chuiopanëdash: —Inchësh chosho isec, Ue choec, quiacpadec choec. ⁵⁵Adecbidi, ushë chënquec chosho isash, Chumbo yampec quiacpadec iquec. ⁵⁶Aden isquin mimbi ëmbi nidaidëshun ismiaidbëdta abucshun ismiaid mimbi tantiec. Aden abucshun ismiaid isquin tantiaquidquo icquin ãatotsieshun abucshun Nuquin Papan chomiaid isumbi tantienquiocquin mibi icsaid ënenquo ique? —quepanëdash Esus iccuededquido caic.

Utsibëd chushcananquid

(Mat. 5.25-26)

⁵⁷Aden chiashic: —Utsibëd chushcananquido mibi nec. Adec tabadec ãatotsi quiash, Naden natiadquidi nebi, quequin tantiasahun mibi icsaid ënenquo ique? ⁵⁸Utsi icsambocquin mimbi nadenec. Adsho isun matses cuidte chuiquid yacno aidëmbi mibi buanshobi nëish bëdamenuen, Mimbi chiacpadomboen mibi nashunu, quequin bëdamboen chuita. Mibi adenquo icsho matses cuidte chuiquid yacno buanshun mibi icsaid chiac matses cuidte chuiquidën, Quënën nauedmenuen buanta, cac buanshun quënën nauedmequidën mibi quënën nauedmepec. ⁵⁹Aden nauedaqui mimbi icsamboen naboed cuidnante meniabicnuc quënë yacnoësh mibi puduentiapimbo iquendac —quepanëdash Esus.

Utsibo unësmiacpadec unësmemane
quequin mibi icsaid ënta caid

13 ¹Aden Esusën chuibanubien iccuededquid utsibon, Esus chuimenu, quequin cainpanëdash. Aden cainequi Esusën chuibanquin nainsho tantiasahun iccuededquid utsibo: —Chuinu. Tanta. Cadidia yacnocquidon Nuquin Papan

chiacpadomboen nidaidën capuquido cuesunesho Pidaton aido cuesunemiosh, quiosh. Aden cuesuniac aidon intac ambi nidaidën capuquido cuesuniadën intacbëd daëdash chididiquiosh, quequin chuiopanëdash. Aid chiaid tantiasahun. ãAtotsi icsamboen nasho aido cuesunemepashba? caimbi mibi —quecuededpanëdash Esus chiec.

²Adoquien: —ãCadidia yacnocquido utsitedi icsaid daëdpactsëc icnuc cuesunemiaido icsaid dadpen icsho aido cuesunemias, quequinda mimbi tantiape? ³Icsamboen mimbi tantieque. Mibitedishun mibi icsaid ënta utsibo unësmiacpaden unësmenushe qeshun. ⁴Chuinu. Tantiata. Shubu dadpen icquid Edusaden caid ënëdacno Sidoe yacno tabadquidon ambi abucshun nacenaid uebudquin abëd icquido 18ted cuesac unësoh, quiosh. ãEdusaden yacnocquid utsibo icsaid daëdpactsëc icnuc Sidoe yacnocquido icsaid dadpen icquid unësoh, quequinda mimbi tantiape? ⁵Mimbi icsamboen tantieque. Utsibo unësapadec unësmene quequin mibitedishun mibi icsaid ënta —capanëdash Esusën abi chuimeboedo chuiquin.

⁶Aden chuishumbic utsitsen chiec: —Icbon cuëte icnuc nadpec: ‘ãCon cuëte ada bacuëashe? Istanu,’ quianec icbo nidpec. Adec nidshun isquien bacuë nibëdec. ⁷Adsho isun icbon abi neshcashunquid chuiquin nadopec: ‘Seta tedested matamias cuëte bacuë cuësnuec choudobi. Bacuëambo iqueque. ãBacuëenquiocquididambi dayun uape? Utsi nitsinun dëdshuneta,’ quequin abi neshcashunquid aton icbon chiosh.

⁸Adoquien: ‘Cuëte bacuëesa ëbi dëdshunemenda. Naden ëbi nameta, icbo. Cuëte bacuëesa tacheshcatanquin seta abentsëc matamequin nidaid

chëshë chodquiaid ëbi bëdamboen tasiamea. Adoac bacuëtsiash. ⁹Aden seta abentsëc matamiash choquin bacuëacsho isash bëdambo mibi icpec. Padnuen bacuë nibëdsho isun, Dëdshuneta, ëbi caoata, 'abi neshcashunquid quiosh —quepanëdash Esus. Ëmbi tantiacpadec tabadenquico boedi bëdamboen chiac bëdamboec tabadsho isash ëbi tantiaquid dadpen yanendac, quequin tantiec adpanëdash Esus.

Cashuebudaïd bëdamiaïd

¹⁰Adashic, chonoadtemaid ushën Nuquin Papan chiaïd chuibante shubun puduedshun Nuquin Papan chiaïd Esusën tantiamenubien ¹¹seta dadpen 18tedi matamequin mayan icsan shuabudaïd icpanëdash. ¹²Adquid icsho isun Esusën: —Shuabudaïd icboedi nëbi cacueoaid mibi iquendac, chido —cashun ¹³mishac cacuiash, Nuquin Papan nadatiambocquin naid nec, quequin chiec chido onquepanëdash.

¹⁴Aden chonoadtemaid ushën Esusën chido bëdamesho isun Nuquin Papan chiaïd chuibante shubu isquidon: —Nëid ushë chonoadtemaid ushë neque. Bëdamenu quequin nëid ushënquio bëdamenda. Chonoadtequid ushënquio bëdameta —capanëdash iccuededquido chuiquin.

¹⁵Adoquien Esus: —Mimbi chiapaden naisa mibi neyoc. ¿Chonoadtemaid ushë icnuc, Con yua acte acmebono qeshun mimbi yuaid tënëshacchobi acte yacno buanenquioda mimbi icpe? ¹⁶¿Aden chonoadtemaid ushën mimbi min yua acmenuc nëid ushëmbidi chido, min matses Abadauanën tsyuecquid, dadpen seta matamequin Satanasën yuaid icsho mënchiquenquiodambi icpe? —quepanëdash Esus nëid ushën

bëdamenda quequido tantiamequin chiec.

¹⁷Aden Esusën chuisho tantiash, Adenda, quequin bëdamboen chiombi, quetiapimbo yec otacquio tabadcuedednubi utsibotedi, Esusën nadatiambocquin naidtedi bëdambo iquec, quec bëdambo yec tabadpanëdash.

Cuëte ëshëmpi chiaïd

(Mat. 13.31-32; Mad. 4.30-32)

¹⁸Adashic: —¿Nuquin Papan shubun icquido mitsipadquidquio icpec?

¹⁹Nadquidquio iqueque. Chuinu. Tantia. Icbon cuëte ëshë pistsëcquiocquid mostasa caid nësecaid dëyucash nuamboshë caniec. Aid cuëte caniaïdën cuidin podochoquidën shubu uabededec. Adquiecbidi, Nuquin Papan chiaïd chuisho tantiatsëcquidën tantiabënash bëdambocquid icsho isash matses utsibo ëbi tantiaquid Nuquin Papan shubun icquido dadpen yanec —quepanëdash Esus.

Sicaïd nami uaidpadquid

(Mat. 13.33)

²⁰Aden chuishumbic utsitsen chuioaic: —¿Nuquin Papan shubun icquido mitsipadquidquio icpec? ²¹Nadquid iqueque. Tantia. Sicanun nami uatepadquid nec. Sicaïd chidon nami uashun cabiunac amëec bidisquedoec. Adomboembidi ëmbi chiaïd ëbi tantiaquidën chuibanac ëbi tantiaquid dadpen yanec utsibon isenquiocnobi —quepanëdash Esus.

Pudued-puduedtequid shëcuë

pistsëcquio chiaïd

(Mat. 7.13-14, 21-23)

²²Adashic, Edusaden yacmi nidoaquin shubu dadpen icquid utsi-utsiec yacno isbidanquin shubu daëdpactsëcquid

utsi-utsiec yacnotsen isbidanoaquin
anocquidotsen tantiamenuen
chuiubenenu, quec Esus nidpanëdash.
²³Adec nidsho isun iccuededquid
abentsëschun nadopanëdash: —¿Nuquin
Papa yacno matses daëdpactsëcta
nidpec? Tantanu. Ëbi chui.

Adoaquien Esusën nadopanëdash:
²⁴—Nuquin Papa yacno
pudued-puduedtequid shëcuë
pistsëcquio iquendac. Esusquio tantiec
aidëmpinquo mibi puduedendac.
Mimbi tantiaid utsi icnuc tsucusec
puduedtiapimbo mibi iquendac. Adquid
dadpen icnuc, ²⁵Nuquin Icbon, Ëbi
yacno puduedte ushë naimbudosh,
caqui cho-choshon, Ëbi puduedme,
quequin comapenen cuëmbededpec.

“Adoaquien: ‘Ëbëd icquidpenquo
mibi neque. Mibi puduedmetiapimbo
iquebique. Mibëd icquido yacno nidtan,’
caindac Nuquin Icbon adquid.

²⁶“Adoaquien: ‘Mibëdtambi peshun
acbededombi. Ëbi yacnoshon mimbi
tantiamequin chuibansho tantiombi,’
quequin abi tantiesan Nuquin Icho
chuipec.

²⁷“Adoaquien: ‘Icsaquido mibi neque.
Nëmbo puduedenda,’ quepec Icho.

²⁸Aden chiaqui Abadauan yec Isac yec
Acobo yec quec Nuquin Papan
chuimiao aidtedi Nuquin Icho yacno
tabadsho isash abi tantiesa adtiapimbo
yec chian anëdënquiacno tabadec
shubiquiec, Nuquin Papa icsambo iquec,
quec nëishpec. ²⁹Nuquin Papa yacno abi
tantiesa puduedtiapimbo nobien
nidaidtedi yacnoësh utsibo dadpen
cho-choshon Nuquin Papan abia
yuedaidobëdtan tsyuec choquidon
peshun aquendac. ³⁰Abi yacno choquido
utsin namiaid icboedi utsi-utsiec
chuiquid iquendac. Choquid utsi
chuiquid dapa icboedi utsi-utsiec utsin
namiaido icoaindac —quepanëdash Esus.

Edusaden isash anocquido Esus

unësqiotequid

(Mat. 23.37-39)

³¹Aden Esusën chuibanquin
naimbudnubien padiseyobo utsi-utsiec
cho-choshon: —Ancanquid Edodes mibi
cuesunemete buneque. Nëuëshquio
nidec nid —capanëdash Esus chuiquin.

³²Adoaquien: —Edodes
cuesunemenuecbimboec onquequidquio
nec. Aid yacno nidshun naden chuita.
Nëbi mayan icsa dapuduequien utsibo
bëdamembi. Badiadshun adomboembidi
nabanoaimbi. Abadiadshun
adomboembidi nabanoaimbi. Ushë
utsin-utsinquien adomboembidi
nabanoaimbi. Adobanquimbi
naimbudembi. ³³Adobanequi nëbi
capuebi. Adobanequi badiadash
capuoai. Adobanequi abadiadash
capuoai. Adobanequi Edusaden yacno
capuoai. Adec capuec ¿Edusaden
yacno choabidabi unës uapec? quiosh,
Esus quequin Edodes chuita
—capanëdash Esusën.

³⁴Adashic choequi macuësh yacno
tabadtuidash shubu dadpen icquid
Edusaden caid uano icsho isec Edusaden
yacnocquido chiacbimboec Esus
nadpanëdash: —Nuquin Papan
chuimiao cuesunequido mibi nec.
Adembidi, Nuquin Papan mibi yacno
chomiaido cuënoten se-sequido mibi
neoaic. Ëbi tantiaquid icmenu, quequin
chuideniombi. Cachinan, Con bacuë
chieshënquid choec, qeshun nua
shoccotsëschun aton bacuë cudasquin
mabësec aton podon. Adembidi: Mibi
chieshënquid choec, qeshun mibi
cudasquin chuibanombi. Aden chuisho
tantiatipimbo yec mibi tabadpoc.

³⁵Adquido yec nëbi min shubun icquido
cudasquid ëbipadquid nibëdec. Nad
iqueque. Tania. Mibi chieshëne

cuesunenuequido choabienuc ëbi
nidacsho yuen ëbi isenquio mimbi
iquendac. Yucash abucuësh choasho
isash, Ambi chomiaid Nuquin Papan
bëdamboen isaidquio nec, quequin
tantienquioeboedëmbi tantiendac
—quepanëdash Esus Edusaden uano
icnuc Edusaden yacnocquido
tantiamequin chiacbimboec onquec.

**Padiseyobon shubun
Esus puduedash tabadaid**

14 ¹Adashic, chonoadtemaid ushë
utsin padiseyobo tsusio dapa
isedec Esus puduedsho isun, Nëid ushën
natemaid icnuc Esusën bëdamenushe
queshun isnuequin padiseyobo utsibo
tabadquin caimbededpanëdash. ²Aden
caimbedednubien podo nidte chedo
bidisquiaid uano tsadsho isun Esusën:
³—¿Chonoadtemaid ushën
daicsambocquid bëdamenquiocte ushë
nec, quequina mimbi tantiapè?
—caquien ⁴abi caimbededquido
otacquo tabadcuenedpanëdash. Adec
aido otacquo tabadcuenednubien podo
nidte chedo bidisquiaid dada Esusën
bedshun bëdameshun: —Nidec nid
—cac bëdambo yec nidpanëdash.

⁵Aden aid nidmeshun abi
bëdamenushe quequin caimbededquido
caic: —¿Chonoadtemaid ushën nua
uëdëshcaidën min baca ampaëdacsho
isun badedquio bedtanquin
indoenquioda mimbi ictsia?
—quepanëdash Esus. ⁶Aden chuisho
tantiash adquiobidi otacquo
tabadcuenedpanëdash.

⁷Adashic, tsusiobon dayunquio
tsadsho isash, Chuiquid dapa nec, utsibo
quetsiash, quec padiseyobo cho-choec,
quequin tantiashun Esusën
nadopanëdash: ⁸—Pec cho, cac choshon
tsadte bëtinenda. Tsadte mimbi
bëtinambien shubu icbon ambi pec cho

caid utsi mibi chuiquid tsusio chosho
⁹isun: “Chuiquid dapa choeque. Uano
tabadad,” icbon cac icsamboen naombi
quiash natiaic uano tsadpec mibi.

¹⁰Naden nata. Pec cho, cac choash
utsiuc tsadbudta. Adsho isun: “Uano
mibi tsadeque. Nëmbo, chuiquidbëd
tsadec cho,” capec mibi shubu icbon.
¹¹Chuiquidbimboecsho ispashuni,
quequid Nuquin Papa yacno choacsho
adquid ambi namiaid Nuquin Papan
icmendac. Nashunquid icboedi Nuquin
Papa yacno choacsho chuiquid Nuquin
Papan mibi icmendac —quepanëdash
Esus abëdta yuedaido caic.

¹²Aden aido chuishumbic abi
yuedquid Esus nadpanëdash: —Pemenu,
quequin mibëd icquid min utsibo aton
na dadpen icquidoudi pec cho cainda.
Aido pemiach, mibi pec cho caoac.

¹³Pemenu, quequin aton na nibëdquido,
daicsaidobëdta bëshuaido pec cho cata.

¹⁴Adquido mibi cuidquin pemetiapimbo
iquec. Adquido pemiash, Bëdambo
iquebi, mibi quepec. Nuquin Papa yacno
nidash puduedsho ambi bëdambo
icmiaid mibi iquendac —quepanëdash
Esus abi yuedquid caic.

Nuquin Papa yacnoshon pequido

¹⁵Aden Esusën chuisho tantiash
abëdtan pec tsadquid abentsëc:
—Nuquin Papa yacno nidshun
abëdtambi pec bëdambo iquebi
—quepanëdash.

¹⁶Adoquien aidi tantiamenuen utsi
chiacbimboec Esus nadpanëdash:
—Yuednu, quequin nadënquio pec
chota, quequin ambi yuedtequid dadpen
chuiposh. ¹⁷Ambi chiacpadën ushë
chonoc: ‘Ëmbi chiuoedtedi pec cho
quequin chuitanta,’ cac aton yua
nidposh. ¹⁸Adec nidshun
chuituidaquien: ‘Nidiapimbo iquebi,’
queposh abitedi. Abia chuituida

abentsëc nadposh: 'Ëmbi sêuëmboed dëdabi nidtiapimbo iquebi,' queposh.

¹⁹"Utsibic: 'Baca bedshun, Bëdamboen nimbanquinda buaneque. Isnu,' qeshun isedtanenquiocquin ambi bedboed nimbameposh.

²⁰"Utsibic: 'Con chido bedombique. Nidenquo iquebi,' queposh.

²¹"Aden chuisho tantiash nidshun aidon chiacpaden aton yuan icbo chuiaoposh. Adsho tantiash nëishun icbon: 'Ëmbi isedacmaido yacno nidshun, Pec cho, cata. Aton na nibëdquidbëdta daicsaid, bëshuaid chedo chuitan,' cac aton yua nidposh.

²²"Nidshun chuitanec aidobëdi choshon, 'Mimbi chuiboedo bëombi. Aido icnubi abi tabadte iquec,' queposh yua.

²³"Adoaquien: 'Shubu ënëdacno nidshun ëmbi chuibocpadquido isun bëoata ma con shubun tsucus-tsucustsëcquio yec ma adquido tabadpanuna. ²⁴Abia ëmbi pec cho caidon ëbëdtambi petiapimbo iquendac,' queposh icbo —quepanëdash Esus.

Esuspadquio ictequidquio

²⁵Adashic, nidsho matses dadpeshun tsibanac abi choacmi bidiadshun isec Esus nadpanëdash: ²⁶—Ëbipadquio icnuequid aton papabëduidi icquid iquec ëbipadquio ictiapimbo iquec. Adecbidi, aton titabëduidi icquid iquec ëbipadquio ictiapimbo icoaic. Adecbidi, aton chidobëduidi icquid iquec ëbipadquio ictiapimbo icoaic. Adecbidi aton bacuëbobëduidi icquid iquec ëbipadquio ictiapimbo icoaic. Adecbidi, aton utsibobëduidi icquid iquec ëbipadquio ictiapimbo icoaic. ²⁷Unësmanc quiash mëyanac dayactiapimbocquid ëbipadquio ictiapimbo icoaindac —quepanëdash Esus.

²⁸Aden chiec Esus abi onquec: —¿Shubu uanu, qeshun abia shubu uaid isec, Nëidtenquio nanu, qeshun aidtedquiobidi bëshun toccashun shubu uainquioda icpec? ²⁹Aden tantienquiocquidën abentse-abentsen bë-bëtsëcquin baded naintiapimbo iquec. ³⁰Adsho isun utsibon mamëshumpec. Bëdamboen isun shubu uaquidpadquid, Esuspadquio icnu, qeshun ëmbi chiaid bëdamboen tantiaienash adquiobidi icpec. Ëbi tantiauidtsëcquid ëbipadquio ictiapimbo iquec.

³¹"Adembi chuinu. Tantiata: 'Mibëd icquidobëd cuesnanuec chuiquid utsi nëmbo cho-choec,' qesho tantiashun nëmbobi icquido chuiquidën naden tantiapec: 'Ëbëd icquido daëdpactsëc iquec. Aidtedtsëqui iquec dayacquiocquid icquin chuiquid utsi abëd icquido cuemepec, qeshun ma chobono,' quequin caimpec. ³²Padnuen, abëd icquido dayactiapimbo icsho isun chuiquidën: Chuiquid utsi bëquedtanta. Bëquedshun, Mibëdi ictsiabi. Ëbëd icquido chuiquid icta, ëbi chuiquid quiosh, quequin chuita, quequin chuiposh. ³³Adembidi ëbipadquio icnuequidon bëdamboen tantiata. ¿Ëbi chuiquid Esus nec, quequin ambi chiacpadendambi nabampeba? Ai, adonona, qeshun adota. Adoesa, Esuspadquiocquid nebi, quenda —quepanëdash Esus abi tsibananquido chiec.

Sa batapentsëcquiocquid (Mat. 5.13; Mad. 9.50)

³⁴Aden chiashic Esus nadpanëdash: —Sa batambo iquec. Casecac utsibëd daëdash batambo iquec. ¿Sa batapentsëcquiocquid casecac batamboda icpadic? ³⁵Padenquio. Secatequid adquid nendac. Adecbidi

Esuspadquio icnu quiash ëbipadquio yanesa chian anëdënquequid nësiatequid nendac. Adquid ictiapimbo iquebi, quequin, Tantaranu, qeshun tantiacpadomboen nabanta —quepanëdash Esus.

Obeca abentsëc bënudtequid

(Mat. 18.10-14)

15 ¹Adashic, icsaquid utsibobëd ancanquidën matsesën aton na buansho isun aton na bedtequid nëidtedi bedta caido, Tantaranu, quiash Esus datsidadpanëdash. ²Adsho isash padiseyobo Esus tantiamenquio yec chushquiacbimboec, Abi datsidadquido icsambocquid icsho cacumenquiocquin aidobëdtambi peshun Esusën aquec, quec abibi onquecuededpanëdash.

³Adoaquien, tantiaquidquido iquec Esus: ⁴—¿Min obeca dadpen 100ted icboedi abentsëc bënudacsho isun, Nibënu, quequin min obeca utsi dadpen 99ted nianec nibënc nidenquioda mibi icpe? ⁵Aidi nibënquin istuidash, Con obeca istuidbosh bëdambo iquebi, qeshun chiadquin buanec icbo nidec. ⁶Shubuno choshon abëd icquido ambi yuedaidobëdta chomeshun: “Con obeca bënudaïd istuidshun bëbosh bëdambo iquebique. Nuquibi penuna,” quequin icbon chuipec. ⁷Adecbidi Nuquin Papa tantiaquid dadpen icnuc matses icsaquid abentsëcshun abi icsaid ënsho isash abuc Nuquin Papabëd tabadquido bëdamboshë iquebi, quecuededpendac —quepanëdash Esus.

Aton na bedtequid bënudtequid

⁸Aden icbon aton yua bënudaïd chuishumbic utsi chiec Esus nadpanëdash: —¿Aton na bedtequid shocoshëmpi 10ted icboedi abentsëc nibëdsho isun tabote taboshon bescaquin chidon nibënenquioda icpec?

⁹Ai. Aden nibënquin istuidshun abëd icquido chomeshun: ‘Con shocoshëmpi abentsëc niadacboedi nibënquin istuidash bëdambo iquebi,’ quepec chido.

¹⁰“Adecbidi matses abentsëcshun abi icsaid ënsho isash abi yacnocquido ambi uaido mayan bëdabobëdi Nuquin Papa bëdambo iquebi, quecuededec —quepanëdash Esus.

Aton mado cuëshëdquid

¹¹Aden chido chiasic utsi chiacbimboec Esus nadpanëdash: —Aton mado daëd icnubi ¹²tsyuec tishaid aton papa caic: ‘Tsusio budquin mimbi chiondacpaden nëbi ëbi aitted meneta, papa,’ quepondash. Adoac aton na musucshun aton mado abi daëdi menebampondash.

¹³“Aden meniac daëdpactsëc ushash aton mado tsyuecquid aton natedi sandoshon buanec nidaïd utsi yacno nidash icsamboen nabanec tabadnuc aton natedi naimëdpondash. ¹⁴Aden aton natedi naimëdambic tiedën caniquid unësbulan abi nidacnocquidon pete naimëdan tsusion mado chedo comapenec bundocuededpondash. ¹⁵Adec bundoquec abi nidacnocquid abentsëc yacno nidshun: ‘Mimbi namiaïd ictiadquido iquebi,’ caquien: ‘Con chancho pemebanta,’ qeshun aton chancho yacno tsusion mado nidmepondash. ¹⁶Aden nidmiac nidquin chancho pemebanequi ambi chancho pemiaïd petiadquido yec tabadshobi anocquidon menenquido icpondash.

¹⁷“Adec natiambo bunec tabadquin aton papa ambi nianondaidbëdta abi icsaid utsitedi tantiec abibi onquec nadpondash: ‘Con pan namiaïdon pete dadpen icnubi con na nibëdnuc unëspebi. ¹⁸Nëbi con pa yacno nidshun

naden con pa chiembi: Nuquin Papan chiacpaden nainquiocquin mibi tantienquo yec nidshun icsamboen nabanombique. ¹⁹Adquid icsho con mado nec, ëbi cainda, papa. Nëbi min yuapadquid ëbi icme,' quequin chiembi, ²⁰abibi quianec aton papa yacno nidoapondash. Adec nidec ancuenquo yacno aton mado nidondaic casenash chosho isash unësquiocnoc aton mado bëqedquin dayumbudshun shubi uatanquin aton papan tanchoccapondash. ²¹Adoac ambibi tantiabocpaden aton papa chuiquin: 'Nuquin Papan chiacpaden nainquiocquin mibi tantienquo yec nidshun icsamboen nabanec tabadteniobi. Aden naquid con mado ëbi cainda, papa. Min yuapadquid ëbi icme,' capondash aton madon.

²²"Aden chiaquien bëdambo yanshun ambi namiaidombo naden aton papan chuipondash: 'Con mado ënden nidondaic choashe. Dasiuidte bëdaidquo bëshun con mado dasiuinta. Adoshombic mëusudtetsen mëusunta. Adoshombic tapucudtetsen tasiuinta. ²³Adoshombic, bacan bacuë nuacquid dapa bedshun cuesuneta nuquitedi bëdamboec tabadquin penun. ²⁴Con mado unësac bimboecboedi nëbi ëbëdi tabadoaic. Aidi bënudac bimboecboedi nëbi istuidac bimboec choash iquec,' cac bacan bacuë cuesuneshun codocacsho pebededpondash.

²⁵"Adnubien bëyuc tishaid tied nantan icpondash. Auëshquo nidec shubu anoentsëqui choquin tentencate cuëdëmec matses cuëdënsho tantiatuidpondash. ²⁶Aden tantiatuidashien aton papan namiaid istuidash: '¿Atotsi naic nec?' quepondash bëyuc tishaid.

²⁷"Adoquien: 'Min utsi ënden nidondaic choaposh. Aidi chosho isash

unësquiocquin nuquitedi bëdamboec tabadquin pemenuequin aton bacan bacuë nuacquid dapa papan cuesunemiosh,' cac ²⁸bëyuc tishaid nëishash shubun puduedenquo icpondash.

"Adsho isash, Puduedenquo iccosh, quequin chiac bëyuc tishaid yacno nidshun: 'Min utsibobëd bëdambo icnuec cho, mado,' capondash aton papan. ²⁹Adoquien: 'Seta dadpen matamequin mimbi chiacpadomboen nabanteniombi. Adquid icsho ëbëd capuquidobëdta ëbi pemenuen yua utsin bacuë mimbi cuesunemenquiocpaboc. ³⁰Nëbi mimbi meniaidtedi naimbudquinc, chido dada dadpen chudmequid chudquinc caic min mado choacsho isun bacan bacuë nuacquid mimbi cuesunemepacboec,' quequin bëyuc tishaidën aton papa chushcapondash.

³¹"Adoquien: 'Mado, ëbëd icquid mibi nec. Adquid icnuc con natedi mitsana neyoc. ³²Min utsi unësac bimboecboedi nëbi choash tabadoaic. Aidi bënudac bimboecboedi nëbi istuidaid nec,' quequin aton papan choboedën buchi chuipondash —quepanëdash Esus.

Icbon na icsamboen isquid

16 ¹Adshumbic, abëd icquido Esusën naden chuipanëdash: —Icbon, Con na dadpen isquid icta, caid icnubi: Mimbi con na ista caidën mitsana uesbudec, quequin utsibon chuiposh. ²Adoac, ambi con na ista caid chomiash icbo nadposh: 'Mimbi con na ista caidën mitsana uesbudec, quequin chioshi. Adoac, con na isquid mibi ictiapimbo iquec, caimbi. Nëbi ¿Ëmbi tambamboed abitedida iqueque? Con na daëd uata quequin ëmbi meniac mimbi daëd ubanquin dada uaid bec cho. Isnu,' queposh icbo.

³“Aden chiac icbon na isquid otacquio onquec: ‘¿Icbon na isquid ictiapimbo yec mitsimbobi tabadpeba? Neshcashunquid ictiapimbo iquebi. Adecbidi, Con na nibèdeque. Bec cho, quetiapiimbo icoaibi. ⁴Naden natsiambi. Con icbon na meniondaid abitedi cuidmenquio yac ëbi yuedtsiash,’ queposh.

⁵“Aden tantiashun ambi icbon na meniondaid abentsé-abentsen chomiác bëyuc choquid chuiquin: ‘¿Tetsi ëmbi con icbon na meniaqui mimbi cuidenquiocpaccoc?’ caquien:

⁶“ ‘Bëchi shocosh nuacquid dapan cushtoaid 15tedi bedshun cuidamboccombi,’ queposh.

“Adoquien: ‘Mimbi 15ted bedombi, quequin dada uaid secashun dada uatempi bedshun shocosh dapa bëchi cushtoaid 7ted bedshun cuidembi, quequin dada uata.’

⁷“Aden bëyuc choquid chuishumbic utsi chosho isun: ‘¿Con icbon na tedtsi bedshun cuidenquio mimbi icpo?’ caquien:

“ ‘Tsitsan dapa dadpen 1000ted tiedën caniquid ëshë bedombi,’ queposh.

“Adoquien: ‘Mimbi aited bedombi quequin dada uaid secashun dada uatempi utsin tsitsan dapa dadpen 800ted tiedën caniquid ëshë bedshun cuidembi, quequin dada uata,’ quequin icbon na isquidën chuiposh. Adoac ambi chiacpaden ambi bedaid cuidambocquidën dada uaposh.

^{8,9}“Aden dada uabansho isun dada uatempitedi bedshun icbo yacno nidshun meniac isbanec icbo tantiaquidquio iquec nadposh: ‘Muaquin mimbi dada uamebanquin mibi yuedmetequad con na mimbi aido menioque. Nidec nid,’ caposh icbon —quequin Esusën chuipanédash. Aden chuishun ambi chuiboed tantiamenuen

abi chuibudec: —Nuquin Papa yacno mitsana buantiapimbo icquin nidaidën tabadquin mitsana meniac mimbi meniaidotsen ëbi tantiaquid yanash unësash Nuquin Papa yacno nidshun mibi tsyuec chosho isun ëbëdtambi aidon mibi yuedendac —quepanédash Esus.

¹⁰Aden chuishumbic adomboembidi chuiquin Esusën nadopanédash: —Icbon na daëdpactsëc bëdamboen isbanquin nashunquid icquin adembidi icbon na dadpen isbanquin bëdamboen nashunendac. Padnuen, icbon na daëdpactsëc isbanquin icsamboen nashunquid iquin adomboembidi aton na dadpen icsamboen isbanoaindac.

¹¹Adembidi mimbi nidaidëshun bedquin mimbi icsamboen nabansho isun, ¿ëbi tantiaquid bëdamboen ista, quequinda Nuquin Papan mibi chuipeba? Padenquio iquec.

¹²Adembidi, ¿utsin na isquin bëdamboen nashunenquio icsho isun abi yacno chosho isun mibi menependa ictic? Padenquio.

¹³“Adecbidi, chuiquid daëd icnuc aid daëdshun namiaidquio ictiapimbo mibi iquec. Abentsëcshun chiaiduidi tantiaquin utsin chiaid mimbi chieshëneç. Adquiobidi Nuquin Papa mimbi tantiaidquio icquimbi mitsana bedtequid mimbi tantiaidquio ictiapimbo iquec —quepanédash Esus.

¹⁴Aden chuibanubi aton na bedtequid ambi tantiaidquio icnuc chieshec padiseyobo tabadcuédapanédash.

¹⁵Adec tabadsho isun Esusën: —Bëdamboen nashumbimboen ismequido mibitedi icsho mimbi ompoquin naidtedi Nuquin Papan isquin tantiec. Adembidi, Bëdamboen naquidbimboecsho matsesën isplashuni, quequin tantiaquin nasho Nuquin Papan bëdamboen istiapimbo iquec.

¹⁶“Adembidi, acten mentoanquid Uan pado tishabicnuc Nuquin Papan naden nata quequin chiaid Moisesën dada uampidbêdta Nuquin Papan chuimiaið utsibon dada uampid mimbi ênden tantiondaid nec. Nuquin Papa yacno puduedmianquid iquec, quequin nëbi chiaid utsi nec. Ad icnuc Nuquin Papa yacno puduedmianquid tantianu, quenquio yec ambibi tantiacpadec puduedte bunec. ¹⁷Abubêd nidaid ênêdtequid icnuc Nuquin Papan naden nata quequin chiaid ênêdtiapimbo iquendac.

Aton chido nianquid

(*Mat. 19.1-12; Mad. 10.1-12*)

¹⁸“Ad icnuc, aton chido bunenquiocquin aid nianshun chido utsi bedquin Nuquin Papan chiaid niacquid nec. Adembidi aton bënë niamboed chido bedquid Nuquin Papan chiaid niacquid neoaic —quepanêdash Esus.

Aton na dadpen icquid icnubien aton na nibêdquid

¹⁹Adequi onquequimbi utsi chiacbimboen Esusën naden chuipanêdash: —Dada, aton na dadpen icquid bêdaidquio dasiuidquidên badiadquidên-badiadquidênquien nua peshun acposh. ²⁰Adnubien aton na dadpen icquidên shubu dayun bêshun tsadunac aton na nibêdquid, Dasado cuêmêdquid, chiuê dadpen icquid tsadposh. ²¹Bunqueic ambo tsadec aton na dadpen icquidên peshun secaid bedshun penuec tsadtsêcsho menenquiocposh. Aden menenquiocnoc tsadshobi opa choquin aton chiuê bêtashuntuidposh.

²²“Adnubien, aton na nibêdquid Dasado unêso isun Nuquin Papan uaido mayan bêdabon abuc buanshun Abadauanên dayunquio tsadumposh.

Adoambic, aton na dadpen icquidtsen unêsashi ²³chian anêdênquiacnoshon mëyanaid icquin abucquio isquien aton na nibêdquid unêsboedi Dasado Abadauanên dayunquio tsadpec. ²⁴Adec aid daêdi tsadsho isun aton na dadpen icboedên Abadauan chuiquin: ‘Ëbi antauideque. Con ana dauebudoaquin ëbi êcpanun Dasado acte bême, papa,’ caposh.

²⁵“Adoaquien: ‘Chuinu. Tantia, abuido. Ênden nidaidên tabadquin mitsana dadpen bedbanec bêdambo mibi tabadnubien Dasado comapenec bunquieic tsadposh. Nëbi aidi ênabi bêdamboec tabadnubien anchumbo yec mibi tênquebudec. ²⁶Adboedi, uquêmbo mibi iquec cuêma utsiuc potetemaïd icnuc nëuêshquio nidtiapimbo iquec. Adquiobidi mibi yacnocquido nêmbo chotiapiimbo icoaic,’ quequin Abadauanên aton na dadpen icboed chuiposh.

²⁷“Adoaquien: ‘Ëbi yacno potetemaïd icnuc con pan shubu yacno Dasado nidme. ²⁸Con buchi ado mêdante auc abentsêc 5tedi unêsabi yec nidaidêmbo tabadeque. Con buchi ado nêmbo mëyanacno chonoshe qeshun Dasado aido chuimetanta, papa,’ queposh aton na dadpen icboed.

²⁹“Adoaquien: ‘Nuquin Papan chiaid, Moisesën dada uampidbêdta dada uaid utsi isec tsusiobo onquepayoc. Aden chiaid ma min buchi adon tantiaquiopanuna,’ quequin Abadauanên chuiposh.

³⁰“Adoaquien: ‘Aid tantienquioctsiash, papa. Unêsboed nidshun chiac aidon tantiapatsiash,’ quequin aton na dadpen icboedên chuiposh.

³¹“Adoaquien: ‘Padicnuna. Nuquin Papa tantiesa icquin uincuemiadên chiaid min utsibon tantienquio icpatsiash,’ caposh Abadauanên aton na

dadpen icboed chuiquin —quepanëdash Esus.

Matses icsaid chiaid, ambi Esus tantiaid chiaid, ambi natequid chiaid
(Mat. 18.6-7, 21-22; Mad. 9.42)

17 ¹Aden chuishumbic abëd icquido Esusën nadopanëdash: —Icsa uanquid iquendac. Adquid Nuquin Papan comapenen cuidendac. ²Adquid ëbi tantiabenicquid icsa uanabicsho cuënote yuëmbocquid têtanetanquin acte shodomboshë yacno nënepatecnëdan. ³Aid tantiec aidpadquid icmane quequin bëdamboec tabadquin ismedeneta.

“Utsi icsasho isun: ‘Mibi icsaique. Mibi icsaid ënta,’ mimbi cac: ‘Ai, icsaobique. Ënëdnuna,’ qesho tantias aidi icsainquio yac bimboec bëpiscudta. ⁴Mibi icsamboen nash choec: ‘Icsaobique. Ënëdnuna,’ quenuc mibi icsamboen nacmaid bimboec yec bëpiscudta. Mibi padpiden icsamboen nash choaic: ‘Icsaobique. Ënëdnuna,’ queoanuc mibi icsamboen nacmaid bimboec yec bëpiscudoata. Mibi padpiden icsamboen nash padpidec choec: ‘Icsaobique. Ënu,’ queoanuc aidtedebidi aidi icsambo yenquio yac bimboec bëpiscudoata —capanëdash Esusën abëd icquido chuiquin.

⁵Adoaquien: —Nuquin Papa nadatiambocquin nabanquidquio nec, quequin tantiaquidquio ictiadquio iquebique. Adquid ëbi icme, icbo —capanëdash abëd icquidon Esus chuiquin.

⁶Adoaquien: —Cuëtempi ëshë mostasa caid pistsëcquio iquec. Siac dëyucash nua yanec. Adecbidi Nuquin Papa nadatiambocquin nabanquid iquec quequin mimbi bëdiactsëc tantiapec. Aden bëdiactsëc tantiaquin Nuquin

Papan nadatiambocquin naban-nabansho isun, Nuquin Papa nadatiambocquin nabanquidquio iquec, quequin tantiabenshun nëid cuëtempi caic, Cuëte mananuc tabadboedi adquiecbidi acte nantan tabadoata, quequin mimbi chiacpadece acte nantantsen abi tabadacpadececbidi tabadoaindac —quepanëdash Esus.

⁷Aden chiashe Esus abi onquec: —ËMin yua mimbi neshcata cac nidshun neshcaquin nainash shubuno chosho isun: “Nëmbo tsadquin pec cho,” caquinda mimbi icpe? ⁸Padenquio. “Con pete codocashun ëbi pemeshun acte menetanquin mimbitsen peshun acta,” mimbi caic. ⁹Aden mimbi chiac mimbi chuibodtedictsëqui nabanquin mimbi yuaidën naimbudec. Aden naimbudsho isash: “ËBëdamboen mimbi naoc,” quecta mibi icpe? ¹⁰Padenquio. Ambembi nainquio iccosh. Mimbi chiacpaden min yuan nabanosh. Adembidi Nuquin Papan chuibodtedtsëqui nabanash Nuquin Icbo caic: “Mimbi chuibodtedi nabampombi. Mimbi namiaid icquin ëmbi naboed ëmbi natequiduidi napombi,” quequin mimbi chuite nendac —quepanëdash Esus.

Daushumbocquido bëdamiaid

¹¹Adashic, Edusaden yacno nidequi nidaid Cadidia caid ënëdacno nidaid Samadia caid yacno datambëtsenec ¹²shubu daëdpactsëc yacno Esus chopanëdash. Ambo choshobien daushumbocquidon 10tedishun Esus bëquedtuippanëdash. ¹³Adquido yec uano tabadquin: —Ëbitedi bëdamboen tantiaquin nadatiambocquin naban, icbo —cabededpanëdash comapenen cuënnquin.

¹⁴Adsho tantiasahun Esusën: —Isadaidbo tsusiobo yacno nidshun

ismetanta —capanëdash. Adoac
nidanequi abitedi
bëdambudnepanëdash.

¹⁵Adoac bëdamboed abentsëc
dëbidiadanec Nuquin Papan naid chiec
onquec choaic ¹⁶Esusën taëno
tsadbudash: —Mimbi bëdameboc
bëdambo iquebi —quepanëdash Esus
caic. Aidi Samadia yacnocquid
isadaidpemo nepanëdash.

¹⁷Adoaquien: —¿Diestedidambi
bëdamepo? —quepanëdash Esus
dëbidiadanec choboed caic. ¹⁸Aden
chiashic iccuededquidtedi caic: —Nëidi
isadaidpemo yequi dëbidiadanec
choash Nuquin Papan naid chiec
onquenubi ambi chiacpadomboen
bëdameboed utsibo isadaidbo icquimbi
Nuquin Papan naid chienquo icpec
—quepanëdash Esus. ¹⁹Aden
chuishumbic: —Mimbi tantiapadequi
mibi bëdanoque. Nidtoanec nid
—capanëdash Esusën daushumbo
icboedi chuiquin.

**Chuiquid dapabëd
bëdamboec tabadte chote ushë
(Mat. 24.23-28, 36-41)**

²⁰Adshumbic: —¿Chuiquid dapa
abentsëcbëd bëdamboec tabadte ushë
choaid mitsipadënquo nuqui ispeque?
Tantianu. Ëbi chui —capanëdash
padiseyobon Esus chuiquin.

Adoaquien: —Chuiquid dapabëd
bëdamboec tabadte ushë chote ismete
nibëdendac. ²¹Adecbidi, nëmbobi
chuiquid dapa abentsëc choeque. Is,
quetiapimbo matses icpec. Adecbidi,
Umbo choeque. Is, quetiapimbo matses
icoaic. Chuiquid dapa abentsëcbëd
tabadte nëmbobi iquec caimbi
—quepanëdash Esus padiseyobo abi
chuimeboedo caic.

²²Aden padiseyobo chuishumbic abëd
icquido Esusën nadopanëdash:

—Yuecash natiamiantequid icnuc abuc
Esusbëd tabadte ushë chopashun, quec
ëbi iste mibi bunquimbi ëbi isenquo
mimbi iquendac. ²³Adec ëbi iste
bunubien: “Bëdamboec tabadte
chuiquid ambo choshe. Istan,” cac abëdi
nidenda. Adembidi: “Nëmbobi choshe.
Isnu. Cho,” cac istanenda. ²⁴Nuquin
Papa yacno bëdamboec tabadte ushë
chonoc abu bedquetaniacimboec
uëshëmbo chënquec ëbi chosho
abitedishun isbededendac. ²⁵Aid ushë
choabicnuc ëbi natiametequid iquendac.
Adembidi, chuiquid dapa nec
cainquiocquin ëbi isadaidbon
chieshëmbededec —quepanëdash Esus.

²⁶Aden chiec Esus abi onquec:
—Ëndenquimboshë Noe tabadnuc
matsesën icsamboen
tantiaded-tantiadednëdacpadomboen
ëbi choate ushë icnuc adembidi
matsesën tantiadenepec. ²⁷Nadec
tabadpampic: Nuquin Papan chiaid
tantiesa cuidte ushë choec,
quenquiocquin abi bunaiduidtsëqui
tantiaquin nua peshun nua
acbededpampic. Adembidi tantiaquin
aton chido bedpampic. Adembidi
tantiaquin aton champi menepampic.
Aden tantiaquin nabanubien Noebëd
icquido cano dapan puduedambic nua
mauantequid ue dapambo sequenuc
cubudquin Nuquin Papan chiaid
tantiesabotedi acte mauanquin mabocac
abitedi unësbunepampic —quepanëdash
Esus.

²⁸Adec Noe tabadnuc icsamboen
tantiec matses tabadaid chiashic, Esus
nadpanëdash: —Adecbidi Dod caid
icnuc icsamboen tantiec matses
tabadpampic. Nuquin Papan chiaid
tantiesa iquec abi bunaiduidtsëqui
tantiaquid icoapampic. Nidaidën
tabadaiduidquo tantiaquin nua peshun
nua actenepampic. Adembidi tantiaquin

aton na dadpen bedtenepampic.
Adembidi tantiaquin aton tied
nitsindenequinc, shubu uadenequinc,
caquin napampic. ²⁹Aden nabanquin
Nuquin Papan chiaid tantienquio icnubi
shubu dadpen icquid Sodoma caid
yacnoshon Nuquin Papan abi tantiaquid
Dod cuemepampic. Adnubien tabote
dêpesh pasquiacbimboecquid
nêdênquetequid ue sequiacbimboec
sequequidên Sodoma yacnocquidtedi
Nuquin Papan chiaid tantiesabo unês
uabunepampic —quepanêdash Esus.

³⁰Aden chiashic: —Ëbi choate ushê
icnuc ëmbi chuibocpadquiec Nuquin
Papan chiaid tanties a yec abi
bunaiduidtsêqui tantiaquid iquendac.
³¹Shubu macano yacno dectatoash mibi
tsadnuc ëbi choate ushê chosho isash
budanec mitsana bednu quec shubuno
puduedenquio yec cuenta. Adecbidi, tied
nantan mibi icnuc aid ushê chosho isash
shubu yacno mitsana bednuec nidenquio
yec badedquio cuenta. ³²Mibi
yacnocquidtedi unês uanushe
bidiadshun isenquio yec cuenta, cac Dod
cuenubien aton na tantiec aton chido
auchidi bidiadsho unês uampidpadquid
iquenda. ³³Unêsmane qeshun ambi
tantiacpadec tabadquid unêsash
mëyanacno tabadnubien unêsmane
quenquiocquin Nuquin Papa yacno
tabadte tantiaquin chuiquido unêsash
Nuquin Papa yacnombo tabadendac.
³⁴Ëbi choate ushê icnuc nad iquendac:
Inchêshên daêd usho Nuquin Papa
yacno yuednuen abi tantiaquid bedquin
abi tanties a nianendac. ³⁵Adembidi,
chido daêdshun macueso Nuquin Papa
yacno yuednuen abi tantiaquid bedquin
abi tanties a nianoaindac. ³⁶Adembidi,
dada daêd aton tied nantan icsho
Nuquin Papa yacno yuednuen abi
tantiaquid bedquin abi tanties a
nianoaindac —quepanêdash Esus.

³⁷Aden chuisho bēdamboen
tantienquiocquin abēd icquidon:
—¿Mitsimbo budpec, icbo?
—capanêdash.

Adoaquien: —Unêsaid yacno edeste
bud-budec. Adquiecbidi Nuquin Papan
chiaid tanties a abi bunaiduidtsêqui
tantiaquid yacno abi cuidtequid
budendac —quepanêdash Esus abēd
icquido caic.

Cadonequidquio chido chiaid

18 ¹Adashic, Ëbēd icquido
chieshenquio yec Nuquin Papa
chiec onquian-onquianquidquio ma
icpanu quec aido tantiamenu quec Esus
nadpanêdash: ²—Shubu dadpen yacno
icsambocquid cuidte chuiquid icposh.
Aidi Nuquin Papan chiaidbēdta utsibo
tanties a icposh. ³Adnubien uano
tabadquid niante chido icposh. Aidi
icsambocquid cuidte chuiquid yacno
nidshun: ‘Ëbi icsamboen naquid ma
cuidnu chuiquiota,’ quequin chuiposh.
Aden chiaqui padenquiocsho isash
choded-chodedquin adomboenuidi
chuided-chuidedposh.

⁴“Aden chuidoniaqui abi
icsambocquin naquid cuidte
chienenquiocboedëmbi chido ënēdenquio
yec ⁵choded-chodedquin adomboembidi
chuiasho tantiashun: ‘Nuquin
Papabēdta matses tanties a nebi,
quequimbi niante ënēdenquio yec
chodednesho isun uimabudmane
qeshun abi icsamboen naquid cuidte
chuiquiono,’ qeshun cuidte chuiquidên
chuiquioposh.

⁶Aden chiashic Esus:
—Choded-chodedquin chidon chuiasho
tantiash: “Mibi icsamboen naquid cuidte
chuiinu,” queposh icsambocquid cuidte
chuiquid. ⁷¿Adomboembidi ambi
cuēnaidon, Ëbi chieshênquid cuidta,
quequin chuidoniac, Cuidnu,

quenquioda Nuquin Papa icpec? Ai, adendac. ¿Nëbimbobida cuidpeba?

⁸Abitedi padenquioctsiash. Utsi nëbimbobi cuidenquiocquin choshon cuidendac. Badedquio cuidenquiocsho isash choquin ¿tedectsishumbimbi ëbi tantiaquin caimbudnequido istuidpendac? —quepanëdash Esus.

Padiseyobo abentsëc icnuc ancanquidën utsin na bedtequid bedmianiaid chiaid

⁹Adashic, bëdambocquid nebi, quiaish utsitedi icsambo iquec, quequido tantiamenuen adquidën tantiaid icsa chuiquin Esusën nadopanëdash:

¹⁰—Nuquin Papa tabadte shubu uashunaid yacno Nuquin Papa chiec onquenuc nidnuequid daëd icposh. Abentsëc padiseyobo icnubi ancanquidën utsin na bedmianiaid utsi icposh. ¹¹Nuquin Papa tabadte shubu uashunaid yacno abi daëdi choash puduedash uano nidtuidshun padiseyobon ambi tantiacpaden naden Nuquin Papa chuiposh: Bëdambocquid nebi, Papa. Ampequido utsibo icnubi icsamboen nabanquido utsibo icnubi aton chidopen chudquido utsibo nec. Adoesambo nebi. Adecbidi, choboed, ancanquidën utsin na bedtequid bedmianiaidpadquidpenquio nebi, Papa. ¹²Adembidi, chonoadtemaid ushë yambi chonoadtemaid ushë utsi choabicnuc daëdec ushquin mibi tantiaquin buna mëmundenembi. Adembidi, uno bedanquin dies yacno cuëscaquin con na tambanshun 9ted dayun uaquin abentsëc mibi menedenembi, Papa, quequin padiseyobon chuiposh.

¹³“Aden padiseyobon uanoshon chuinubien ancanquidën utsin na bedtequid bedmianiaid puduedash nidtuidash: ‘Icsambocquid nebi, Papa.’ Adquid nebi quequin ismec shuebudacchobi abuc Nuquin Papa

yacno isenquio yec abi onquec: ‘Icsambocquin nabanquid nebique. Ëbi tantiaquin pauc, Papa,’ queposh —quepanëdash Esus.

¹⁴Aden chiashic: —Chuinu. Tantia. Ancanquidën utsin na bedtequid bedmianiaid Nuquin Papan bëdamboen isaidquio icnubien padiseyobo ambi icsamboen isaidquio icposh. Icsaisa yac bimboec, Bëdambocquid nebi, quequid yuecshun Nuquin Papan aidën icsamboen tantiaid ismequin chiendac. Padnuen, icsambocquid nebi, quequin tantiaquid yuecshun ambi bëdamboen naid Nuquin Papan ismequin chuioaindac —quepanëdash Esus.

Bacuëbo Esus yacno bë-bëaid
(Mat. 19.13-14; Mad. 10.13-16)

¹⁵Adshumbic, aton bacuëbo Esus mishmenuequin utsin-utsinquien bë-bësho isun: —Bacuëbo bë-bëenda. Esusën nabanaid utsi iqueque. Nidanec nid —capanëdash Esusbëd icquidon.

¹⁶Aden chuisho tantiaash Esus nadpanëdash: —Bacuëbo nidmenquiocquin con dayunquio cho-chome. Chiac, Abimbo caic, quequin tantiaquidquio bacuëbo nec. ¹⁷Adomboembidi, Nuquin Papa yacno tabadte iquec, quequin chiac bacuëbon badedquio tantiacpadomboen tantiec Nuquin Papa yacno puduedtequid iquendac. Aden tantiesa ambo puduedtemaid iquendac —quepanëdash Esus.

Nëbi caniquid chuiquidën chiaid
(Mat. 19.16-30; Mad. 10.17-31)

¹⁸Adshumbic, nëbi chuiquid caniquidën: —Nuquin Papa yacno nidnuequin ¿atotsimbi nape? Bëdamboen tantiaquidquio icquin ëbi chui. Tantanu —capanëdash Esus chuiquin.

¹⁹Adoaquien: —¿Mitsipaden tantiec bédambocquid nec, quepe mibi? Nuquin Papauidsëqui bédambocquid nec. ²⁰Abi yacno nidnuequin ambi naden nata quequin chiaid naden mimbi tantiapec: “Mimbi inacmaid chudenda; ambi chiaid utsibic, cuesunianenda; utsibic, utsi mua uaquin chienda; utsibic, papan chiaidbédta titan chiaid tantiaquin nabanta,” quequin chiampid mimbi tantiapec —capanédash Esusën nëbi chuiquid caniquid chuiquin.

²¹Adoaquien: —Canidotsëcquimbi aden nadeniondambi —quepanédash nëbi caniquid.

²²Aden chuisho tantias: —Abentsëc mimbi nabicquid iqueque. Mitsanatedi menequin bedtequid bedbanshun aton na nibédquid menebanta. Aden mimbi menebanac ëbi tantiaquid dadpen yanash Nuquin Papa yacno nidendac. Aden meniash ëbéd iquec chota —quepanédash Esus.

²³Aden Esusën chuisho tantias aton na dadpen tantiec unësquo yanshun Esusën chiacpaden natiapimbo icpanédash. ²⁴Adsho isun: —Aton na dadpen tantiaquin Nuquin Papa badedquid tantiatiapimbo adquidën iquec. Nuquin Papa tantienquo yec abi yacno puduedtiapimbocquid iquendac. ²⁵Adquiecbidi shëcuë pistsëcquid puduedte nidaidën capuquid dapan badedquid tantiatiapimbo iquec. Tantiamic puduedec. Ademibidi Nuquin Papan shubu abentsëquën puduedmianquid icsho aton na dadpen icquidën badedquid tantiatiapimbo icoaic. Aden aid tantiatiapimbocquid ambibi tantiacpadequi puduedte bunec —quepanédash Esus.

²⁶Aden chuisho tantias iccuededquido nadpanédash: —¿Tsutsi Nuquin Papa yacno puduedquid icpec? —quepanédash Esus caic.

²⁷Adoaquien: —Matses ambibi tantiacpadec puduedtiapimbocnoc Nuquin Papambien abi yacno yuedanquid matses tantiamendac —quepanédash Esus.

²⁸Adoaquien Petedo: —Mibéd icnu, quequin ëbéd icquidbédtan con natedi nianondambi, icbo —quepanédash Esus caic.

²⁹Adoaquien: —Abimbo mimbi chioque. Tantiata. Chuinu. Nuquin Papabéd shubu abentsëquën tabadaid chuibanuequin aton shubu icnuc aton chidobédta aton bacuëbo nianacsho ³⁰ambi nianaidtedimbo tambanquin daëd uabanquin Nuquin Papan nëbi bédambo icmeshumbi abi yacno nidacsho bédamboshë icmiaid mibi iquendac —quepanédash Esus Petedo chiec.

Ëbi unës uaindac, quequin Esusën chiaid
(Mat. 20.17-19; Mad. 10.32-34)

³¹Adashic, abéd icquido uano buanash: —Edusaden yacno nuquibi nidoaic. Ambo choacsho Nuquin Papan ëbi chuiquin dada uamiampicpaden icsambocquid ëbi nabanendac. ³²Anoshon bedshun buanshun isadaidbon isadaidpembo ëbi menendac. Aden meniac bedshun ëbi mamëshumbededquimbi, icsamboen chuibededquimbi, dacuishtuabededquimbi, dacuesbededsëcquien mëyanshun ëbi cuesten dectanquin unës uaindac. ³³Adoaqui daëdec ushtanec uincuenendabi —quepanédash Esus abéd icquido chiec.

³⁴Aden abi unëste Esusën chuisho abéd icquidon bédamboen tantienquo yec tabadpanédash.

Bëshuaid bédamiaid
(Mat. 20.29-34; Mad. 10.46-52)

³⁵Adashic, Edusaden yacmi nidequi Edico caid shubu dadpen yacno

anoentsëqui Esus chonobien podqued cuëmambi bëshuaid tsadpanëdash. Matses cuensho tantiash: “Mitsana bedtequid bec cho,” quepanëdash bëshuaid. ³⁶Adec tsadquimbi matses dadpen cuen-cuensho tantiashun: —¿Atotsi quec cuen-cuene? —capanëdash. ³⁷Adoquien choquid abentsëc: —Nasaded yacnoësh choquid Esus cuenec nec —quepanëdash.

³⁸Adsho tantiashun bëshuaidën: —Dabid, tsusedpan mado mibi icquin ëbi tantiaquin nata —capanëdash Esus cuënquin.

³⁹Adshobien: —Adec cuëdenquio yec tsad —capanëdash choquidon.

Adoquien bëdiactsëc cuëmboedëmbi comapenquien: —Tsusedpa Dabidën mado mibi icquin ëbi tantiaquin nashunta —caoapanëdash bëshuaidën.

⁴⁰Adoac nidtuidshun Esusën: —Aidi bec cho —cac abi yacno bësho isun:

⁴¹—¿Atotsimbi mibi nashumpeba? —capanëdash Esusën bëshuaid chuiquin.

Adoquien: —Bëshuaid nebique. Ëbi bëucshune, Icbo —capanëdash.

⁴²Adoquien: —Mimbi tantiacpadomboen padpidemboen is —cac ⁴³badedquio isbenshun bëshuacboedën Esus tsibanquimbi Nuquin Papan naid chuibanquin isbanec onquec nidpanëdash. Aid bëdansho isun Esusbëd nidanequidotedishuntsen Nuquin Papan naid chuibededpanëdash.

**Saqueyo, ancanquidën utsin
na bedtequid bedmianiaid dapa**

19 ¹Adec nidequi Edico caid yacno datambidanec Esus nidpanëdash. ²Edico yacnocquid Saqueyo cuëmëdquid icpanëdash. Aidi ancanquidën utsin na bedtequid bedmianiaid dapa iquec aton na dadpen icquid icpanëdash. ³Adoaid icquimbi

utsi, Esus cuenec, queshe tantiash, ¿Mitsipadquidquio Esus neque? Isnu, abibi quianec nidquimbi matses ënapen icquid dadpen Esus datsidadacsho bushcuctsëcquid icquin Esus Saqueyon isenquio icpanëdash. ⁴Adash, Nëid podquedën Esus choec, quianec podqued cuëmam nidquidën cuëte dapan decataoash isec cuidin tsadpanëdash.

⁵Adec tsadnubien aid podquedënquio choec nidtuidshun Saqueyo bushcuctsëcquid istuidshun Esusën: —Nëbi mibi yacno nuquibi tabadec nidnu. Baded bud —cac ⁶Saqueyo badedi budpanëdash. Budanec nidquin Esus buanec aton shubuno choshon: —Mibi ëbëd icte bunsho isash bëdambo iquebique. Pudued —Saqueyon cac Esus puduedpanëdash.

⁷Adec puduedsho isash Esus tsibananquido: —Icsaquidën shubun Esus puduedosh —quecuededpanëdash.

⁸Adnubien, aton shubu nuntanuësh nidtoash Saqueyo: —Chuinu. Tantia, Icbo. Nëbi con na mais uaquin aton na nibëdquid menenun nabono. Adoshombic, con matses: “Con na mimbi ampioc,” queshe tantiashun ëmbi ampiaidbëdta daëd-daëdquiecnuc daëd uaquin menebanembi —quepanëdash Esus chiec.

⁹Adoquien: —Chian anëdënquequid nësiatsemboedi aton tsusedpa Abadauan yanampicpaden tantiaquid Saqueyo yanacsho nëbi mënchicaid iquec.

¹⁰Icsambocquid Saqueyo icbocpadquid nibënquin istuidshun nësecanushe qeshun mënchicnuec chopobi —quepanëdash Esus Saqueyobëd icquido caic.

Aton na bedtequid 10ted icquid meniaid

¹¹Aden Esusën chuisho tantiashun Edusaden yacno choash chuiquid dapa

Esus yantsiash, quequin utsibon icsamboen tantiaipanëdash. ¹²Aden tantianubi tantiaquidquio icquin utsi chiacbimboen aido tantiamenuen Esusën nadopanëdash: —Chuiquid dapan mado: ‘Ënden caniaid iquebique. Nëbi ëbitsen chuiquid icnuec chuiquid dapa yacno nidaid utsi yacno nidendabi. Anoshon chuiquid icmiac nëmbo choaindabi,’ ¹³qeshun ambi namiaido 10ted icquido chomeshun aton na bedtequid abentse-abentsen menebamposh. Aden menebanash: ‘Ëbi nidan ëmbi meneboed bëdamboen nabanquin daëd uata ma choshon dadpen bedoapanuna,’ quianec chuiquid ictiadquiocquid abi chuiquid dapa yacno nidposh.

¹⁴“Adec aid nidambic abi yacnocquidon abi chieshënkuido nadposh: ‘Aidi ëbitedi chuiquid icmenushe qeshun chuiquid dapa yacno chuitanta,’ qeshun abëd icquido chuimenuen chuiquid dapa yacno nidmeposh.

¹⁵“Adoquai, Chuiquid icnu, quianec nidboed chuiquid icmeposh. Aden chuiquid icmiac aton shubuno choash, Con na bedtequid ðtedtsi daëd uapashba? abibi qeshun ambi meneboedo chomeposh.

¹⁶“Adoac bëyuc choquid: ‘Mitsana bedtequid abentsëc icboedi utsi 10ted icnuc daëd uaombi, icbo,’ queposh.

¹⁷“Adoquien: ‘Ëmbi meneboed abentsëc bedshun bëdamboen mimbi daëd uaque. Nëbi mimbi daëd uaidtedquiobi shubu dadpen icquid 10ted uano-uanoecquido chuiquid icta,’ caposh abi chuiquidën.

¹⁸“Adnubien utsi: ‘Mitsana bedtequid abentsëc icboedi utsi 5ted daëd uapombi,’ queposh.

¹⁹“Adoquien: ‘Mimbi daëd uaidtedquiobi shubu dadpen icquid 5ted

uano-uanoecquido chuiquid icta,’ caposh abi chuiquidën.

²⁰“Adnubien utsitsen: ‘Mimbi abentsëc menetsëcboed ëmbi dashcute cuëshaidën dayun uaboed në iquec, icbo. ²¹Mitsana bedtequid mimbi tantiactedimbo daëd uatiapimbo ictsiabi, qeshun dayun uaombi. Utsin na utsin nitsinaidbidi bedbanquid mibi icsho isash chushcanushe quiaash dacuëdec tsadteniobi,’ queposh.

²²“Adoquien: ‘Ëmbi chiaid niacquid mibi neyoc. Mimbi mua uaquin chiaidtedimboesho mibi cuidtequid iquendac. ðUtsin na utsin nitsinaidbidi bedbanquid mibi icsho isombi, ëbi chiech quecta icco? ²³ðAden tantiaquin atotsieshun ëmbi chiaid nanuequin ëmbi meneboed daëd uamequin utsi menenquico icco? Aden meniac daëd uashun bedtsenombi,’ queposh abi chuiquid.

²⁴“Aden aton na daëd uaisa chuishumbic iccuededquido chuiquin: ‘Ëbi chieshënkun con na daëd uainquiocquin ambi dayun uaboed bedshun ëmbi abentsëc meniaid 10ted icnuc daëd uaboed meneta,’ caposh abi chuiquidën.

²⁵“Adoquien: ‘Aton na dadpen iqueque. Aid menenda, chuiquid,’ queposh iccuededquido.

²⁶“Adoquien: ‘Chuinu. Tantia. Ëmbi chiacpaden nabanquin daëd uacsho isun ëmbi meneboed daëd uaquin menembi. Ëmbi chiacpaden chieshquin daëd uainquiocsho isun ëmbi meneboed bedshunembi. ²⁷Adembidi ëbi chieshënece abi chuiquid dapa ëbi icmete bunesabo nëmbo bec cho. Bëshun ëmbi isnubi abitedi cuesuneta,’ caposh abi chuiquidën —quepanëdash Esus.

Chuiquid dapabimboec yec Edusaden yacno Esus choaid

(*Mat. 21.1-11; Mad. 11.1-11; Uan 12.12-19*)

²⁸Aden chuibanashic Esus Edusaden yacmi nidequi anoentsëqui choash

nidtuidpanëdash. ²⁹Uano macuësh Odibos caid potsembo shubu daëdpactsëc icquid Bedpaque caid icnubi shubu daëdpactsëc icquid utsi Betania caid icpanëdash. Adec nidtuidash abëd icquid daëd caic: ³⁰—Nëid podquedën nidquimbi shubu daëdpactsëc yacno choshon cabayobitsecquidën bacuë caniaid catsadabiquid tënëshaid mimbi istuidendac. Aid istuidshun tënëshaid tēchicshun nēmbo bēta. ³¹Aden chicsho isash: “¿Atotsi canun mimbi aid chicpe?” quepec. Adsho tantiashun: “Con Icbo bunaid nec,” quequin chuita —quepanëdash Esus.

³²Adoac nidshun istuidtanquin ³³cabayobitsecquidēmpi tënëshaid tēchicsho isash: —¿Atotsi canuen aid tēchique? —capanëdash icbon.

³⁴Adoaquien: —Con Icbo bunaid nec —queshun Esus yacno nimbanquin abi tënëshaidën buampanëdash Esusbëd icquidon.

³⁵Aden bēshun, Chuiquid dapa Esus nepanui, quec onqueshun Esusbëd icquidon aton dashcute bēntsecquid chictanquin cabayobitsecquid capucshun Esus catsadumpanëdash. ³⁶Aden Esus catsadunash nidnubien iccuededquidontsen aton dashcute bēntsecquid chictanquin podqued ansambanec nidanepanëdash. Chuiquid dapa Esus nepanui, quesahun aidontsen adopanëdash.

³⁷Adec nidanec macuësh Odibos caid budtuidequi iccuedequidtedimbo bēdambo iquec comapenen Nuquin Papan nadatiambocquin naid ambi isboed naden chiec comapenec onquecuededpanëdash:

³⁸—Nuquin Papan chomiaid ambi chuiquid dapa icmiaid ambi bēdambo icmiaidquiobidi nec. Nuquin Papa yacno abēdi bēdamboec tabadequi

icsaisatedi iquendac —quepanëdash iccuededquido comapenec cuëdcuededec.

³⁹Adec cuëdcuededesho tantiashun padiseyobon: —Adec onquenda, quequin mibëd icquido chuita —capanëdash Esus chuiquin.

⁴⁰Adoaquien: —Ēmbi naid chiec aitedi cuëdcuededenquiocnoc cuēnote podqued cuēman samëdquido onquianendac —quepanëdash Esus padiseyobo chiec.

⁴¹Adashic, adanec nidequi Edusaden anoentsēqui choquin anocquido abi tantiesabo tantiec shubiec Esus nadpanëdash: ⁴²—Ēbi bēdambo icmequid Esus nec, quec nēbi ēbi tantiaquid mibi ictsiandac. Tanties a icquin mibi chuiquid mimbi nibēnacpadquid mimbi istuidtiapimbo iquendac. ⁴³Yuecash choquin uimanēmēnquidon mibi cuentiapimbocnoc tsicatabudcuenendac. ⁴⁴Aden mibi tsicatabudcuenshun min bacuëbōbēdtabi naimbudquin mibi unēs uashun nendac. Min shubutedi nibëdquidendac. Nuquin Papan chomiaid ēbi tanties a icsho cuidtequido mibi nendac —quepanëdash Esus. Edusaden uano icnuc abi tantiesabo tantiec unēsquo icnuc anocquido chiacbimboec adpanëdash.

Nuquin Papa tabadte shubu uashunaid yacnoshon cuemiaid

⁴⁵Adashic, Edusaden yacno choash Nuquin Papa tabadte shubu uashunaidën puduedshun nuntanshunquo aton na bedtequid bednun menebanquido Esusën cuemepanëdash. ⁴⁶Cuemec: —Nuquin Papan chuiampid nad iqueque. Tantia: “Ēbi tabadte shubu uashunaid ēbi chiec onquianete shubu iquendac,” quepampic. Aden Nuquin Papan

chuiampid icnubi ampequido tabadte shubu Nuquin Papa tabadte shubu uashunaid mibitedishun icmebededayoc —quepanëdash Esus aitedi cuemec.

⁴⁷Adoshombic,

badiadquidën-badiadquidënquiec Nuquin Papa tabadte shubu uashunaidën puduedtenequin Nuquin Papan chiaid tantiamenuen Esusën chuibampanëdash. Anoshon chuibansho isun isadaidbo tsusiobon: ¿Mitsipadentsimbi Esus cuesunepeba? quequin caimbededpanëdash. ⁴⁸Aden caimbededquimbi Esusën chiaid tantianu quec dadpen Esus datsidadacsho isun ashunquio isadaidbon Esus cuesunemenuen bedtiapimbo icpanëdash.

¿Tсандан chuibanta caid mibi ne?

(Mat. 21.23-27; Mad. 11.27-33)

20 ¹Adashic, Nuquin Papa tabadte shubu uashunaidën puduedshun, Nuquin Papa yacno yuedanquid iquec, quequin Esusën chuibanubien isadaidbo tsusiobo cho-chopanëdash. ²Cho-choshon: —¿Tсандан chuibanta caid mibi neque? Tantianu. Ëbitedi chui —capanëdash.

³Adoaquien: —Ëmbia tantianu. Ëbi chui. ⁴¿Nuquin Papan ëmbi chiaid chuibanshun mentobanta caidta Uan icpondash? Padenquio mibi quenuc, ¿Matsesën nata caidta nepondash, quequina mimbi tantie? —quepanëdash Esus isadaidbo tsusiobo caic.

⁵Aden chiac isadaidbo tsusiobo onquecuededec nadpanëdash: —Nuquin Papan nata caid Uan pado nepondash, ëbitedi qesho tantias Esus nadpendac. ¿Atotsieshun Uanën chuisho mibitedishun tantienquio icponda? ⁶Matsesën nata caid Uan pado niondash, ëbitedi qesho tantias Esus

iccuededquidon cuënoten nuquitedi se-sependac. Nuquin Papan chuimiaid, Uan icpondash, quequin iccuededquidon tantiec —quepanëdash isadaidbo tsusiobo.

⁷Adec onquecuededash: —¿Tsuntsin nata caid Uan pado icpondash? quequin tantiambo iccombi —quepanëdash tsusiobo.

⁸Adoaquien: —Mimbi chienquio yacpadembi ëmbitsen ëbi chuita caquid mibi chienquio icoaimbi —quepanëdash Esus.

Neshcashunquidon icsambocquin naid

(Mat. 21.33-44; Mad. 12.1-11)

⁹Aden isadaidbo tsusiobo chuishumbic, Utsi chuinu, quiacimboen Esusën nadopanëdash: —Tied icbon aton tied nitsinshun aton tied cuësh-cuëshquin ambi ëbi neshcashunta caidtedi istuidash tied icbo nidposh. Nidaid utsin yuec tabadshumbic: ¹⁰“Tiedën caniquid ënden bacuëpash. Ëbi neshcashunquidën musucaid con na bedmenu,’ qeshun ambi namiaid aton tied yacno icbon nidmeposh. Nidmiac ambi bedtan caid tied yacno chosho isun cuestanquin tiedën caniquid bacuë ambi musucaid menenquiocquin abi neshcashunquidon icbon chomiaid nidmeoposh.

¹¹Adoshombic, icbon aton tied yacno ambi namiaid utsi nidmeoposh. Aid chosho isun adembidi cuestanquin icsamboen nashun ambi musucaid menenquiocquin icbo neshcashunquidon aidtsen nidmeoposh. ¹²Adoshombic, ambi namiaid utsitsen icbon nidmeoposh. Aidi chosho isun chiuë-chiuëpambocnoc cuestanquin tied tsitsuno icbo neshcashunquidon aidi netamposh.

¹³“Netamboedi nidtoanec icbo yacno choacsho isash: ‘¿Mitsipadentsimbi

napeba? Con madombobi ëbi cudasaid con tied yacno nidmembi. Aidi con tied yacno chosho bëdamboen ispec,’ quequin aton mado nidmeposh.

¹⁴“Aden nidmiac aton mado aton papan tied yacno chosho isash icbo neshcashunquido nadposh: ‘Tied icbo unësan aton natedi bedquid aton mado nepec. Aden bednushe aidi cuesunenuna. ¹⁵Aden cuesunian icbo unësan aton natedi nuquin na ictsiandac,’ quecuededshun tied tsitsuno icbon mado buanshun icbo neshcashunquidon cuesuneposh —quequin chiashic Esus:

“ ‘Min mado cuesuniosh,’ quequin utsin chiac ðatotsi tied icbon napec? ¹⁶Naden napec. Abibi aton tied yacno nidshun abi neshcashunquido cuesuneshun aton tied ambi cuësh-cuëshaid abi neshcashunquid utsibo aton tied yacno tabadmendac —quepanëdash Esus.

Adsho tantiash: —Adoenquo icpashun —quepanëdash iccuededquido. ¹⁷Adoaquien iccuededquido bëisequi Esus nadpanëdash: —¿Nuquin Papan dada uamiaidën naden chienquioda icpampic? Ai, aidën chuiampid nad iquec: “Shubu uanuequidën isuidaid buintad utsin ambia nitsinaid icposh.”

¹⁸Buintad sec uebudec podquëd-podquëdendac. Adembidi buintad uebudquin matses tish-tishendac. Adembidi, abi yacno puduedmianquid tantiaidquid Nuquin Papan cuëshëdmiac comapen cuidte yacno tabadendac —quepanëdash Esus.

¹⁹Aden Esusën chuisho tantiash: —Nuqui naid chiacbimboen chiec Esus niosh —quiash isadaidbo tsusiobo Esus bedte buncuededquin iccuededquid dadpen icnuc Esus bedtiapimbo icpanëdash.

Sesadën shocoshëmpi neque.

Mene, quequin chiaid

(Mat. 21.45-46; 22.15-22; Mad. 12.12-17)

²⁰Adec Esus bedte bunquin isadaidbo tsusiobon ambi Esus ista caido Esus yacno nidmepanëdash. Ambi ista caido, Bëdambocquid nebi, quequin ismiac bimboecquid icsho Esusën chuibanacno tsusiobon nidmepanëdash. Esus yacno nidshun ëmbi ista caidon chuimiac Esusën icsamboen chuitsiash. Aden chuisho isadaidpembo ancaquidën Esus bedpashun, quequin tantiaquin nidmepanëdash. ²¹Aden nidmiac choash Esus ista caid abentsëc: —Mimbi tantamequin chuibanaid bëdambo iquec, quequin tantiembi, Abitedi Nuquin Papan chiaid abimbo chuibanquid mibi nec. ²²Adquid mibi icquin ëbi chui. Tantanu. ¿Ancanquid Sesad cuëmëdquid isadaidpembo icquin ambi piucquid shocoshëmpi bec cho caid isadaidbon menetiadquidida nepec? —quepanëdash isadaidbo tsusiobon ista caid Esus caic.

²³Aden chuisho tantiashun choboedën icsamboen tantiaid tantiaquin Esusën nadopanëdash: ²⁴—Piucquid shocoshëmpi ancanquidën bec cho caid sananquin abuc cadota —cac sananquin abuc cadosho isash: —¿Tsuntsin podobitsi dada uaid aidën icpec? —quepanëdash Esus.

²⁵Adoaquien: —Ancanquid Sesadën na nec —quepanëdash tsusiobon ista quequin chomiaid.

Adoaquien: —Ancanquid, Bec cho, qesho meneta. Nuquin Papan naden nata cac adobanta —capanëdash Esusën. ²⁶Aden chiac, Bëdamboen tantiaquid bimboec onquec, quequin tantiaquin icsamboen chuimetiapimbo yec tsusiobon chomiaid otacquo tabadcuëdedpanëdash.

**Uincuen uaid chido bedesa nec,
quequin chiaid**

(Mat. 22.23-33; Mad. 12.18-27)

²⁷Adashic, saduseyobo caido yec
²⁸unësaid uincuen uate nibëdec quequin
chuiquido Esus yacno chopanëdash.
Aido choash: —Unësaidën chido
bedshun aidën tishmiaid unësaidën
bacuëbobimboecquid iquendac, quequin
Moisesën dada uapampic. ²⁹Aden
Moisesën dada uaid icnuc dada 7ted
iccuededposh. Aidedtada icnuc bëyuc
tishaidën aton chido bedshun bacuë
tishmiabi yec unësposh. ³⁰Aton buchi
unësan aidën chido bedash adecbidi
bacuë tishmiabi yec unësoaposh aton
utsi. ³¹Adembidi, bëyuc tishaid
tsibanquidën-tsibanquidënquien chido
abentsëqui bedto-bedtoec bacuë
tishmiabi yec unësbuneposh. ³²Yuecash
chidotsen unësoaposh. ³³Adec chido
abentsëcshun bënë dadpen icboedi
uincuen uate ushë icnuc ñmitsicquid
chidon bënë icpeque? Èbi chui.
Tantianu —quepanëdash saduseyobo
Esus caic.

³⁴Adoaquien: —Nidaidënshun dadan
aton chido bedec. Adecbidi, Min
bënëbëd nidta, quequin aton papan
chiac aton champi aton bënëbëd nidec.
³⁵Uincuen uate ushë choan Nuquin
Papan bëdamboen isaido abëdi
tabadquin chido bedenquio iquendac.
Adembidi, aton champi menenquio aton
papan iquendac. ³⁶Adecbidi, Nuquin
Papan uaido mayan bëdabo unësese
yapadquiequi Nuquin Papan uincuen
uatequid unësenquio iquendac. Nuquin
Papan uincuen uatequido aton bacuëbo
nendac. ³⁷Adembidi chuinu. Tantia.
Cuëtempi nëdënquiacbimboecquid isun
Moisesën dada uapampid nec. Cuëte
nëdënquiacbimboecsho isun Nuquin
Papa chuiquin nadopampic: “Tsusedpa

Abadauanën papa cain cuënaid mibi
nec. Adecbidi tsusedpa Isaquën papa
cain cuënaid mibi neoaic. Adecbidi
tsusedpa Acobon papa cain cuënaid
mibi nec,” quequin Moisesën
chuiampic. ³⁸Moisesën tsusedpabo
ambi chuiboed ënden unësampidën
nami chodquiaidën papa cain Nuquin
Papa cuëntiapimbo iquec. Aton nami
chodquias abi tantiaquidquio icquin
tantiec tsadquidën papa cain Nuquin
Papa cuënec —quepanëdash Esus
saduseyobo chiec.

³⁹Aden Esusën chuisho tantias
Nuquin Papan naden nata quequin
chiaid tantiamequid padiseyobo
utsi-utsiec nadpanëdash: —Bëdamboen
mimbi chuiabanoc —quepanëdash Esus
chiec. ⁴⁰Aden Esusën chuisho tantias
Esus chuimetiapimbo utsibo icpanëdash.

¿Tsuntsin mado Quidistu nepec? quiaid

(Mat. 22.41-46; Mad. 12.35-37)

⁴¹Aden utsibon abi icsamboen
chuimetiapimbo icsho isun Esusën
nadopanëdash: —Èbi abia yampid icsho
ñmitsipadentsi tantiaquin tsusedpa,
Dabidën mado Quidistu caid nec,
quequin matsesën chuipec? ⁴²Dabidën
ambibi Sadmo caid dada uaquin naden
chuiampic:

“Icbo utsi yec con mado mibi
chiembique. Tantia, quequin
chiec icbo dapa nadpampic:
‘Èquë con dayun abiucquio cainec
tsadec cho

⁴³ma mibi chieshëquidtedi mimbi
namiaid ma icpanu,’ ”

quequin Nuquin Papan Esus chiaid
Moisesën dada uapampid nec. ⁴⁴Aden
Dabid padon dada uaquin
ñmitsipadomboentsibi con icbo
cashumbi con mado ëbi caoapampic
Dabidën? —quepanëdash Esus abi
chieshëquido caic.

**Naden nata quequin chiaid
tantiamequidpadquid iquenda,
quequin chiaid**

(Mat. 23.1-36; Mad. 12.38-40; Duc. 11.37-54)

⁴⁵Aden chuishun iccuededquidon tantianubi abëd icquido Esusën nadopanëdash: ⁴⁶—Nuquin Papan naden nata quequin chiaid tantiamequidpadquid iquenda. Aido ancanquidbimboecsho utsibon ispashuni quequin nabanesa dasiuidacpadec dashcute ënapen icquid dasiuidcuededpec. Adomboembidi tantiec matses dadpen iccuededacno nidash capuequi, Èbi bëquedquidon ëbi chuiquid dapabimboecsho isash onquequin chuipashuni quec tabadec. Adomboembidi tantiec Nuquin Papan chiaid chuibante shubun puduedash, Tsusio dapabimboecsho ispashuni, quec tsusiobo tsadacno tsatenec. Adomboembidi tantiec, Pec cho cac chosho isash chuiquid dapabimboecsho ispashuni, quec tsusiobo tsadacno tsatenec. Adquidpadquid iquenda. ⁴⁷Aidon bëdamboen nabanacimboen nianten natedi bedbanec. Aidombidi Nuquin Papa abimbo tantiacimboec yuen chiec onquec. Aden bëdamboen nabanacimboecquido Nuquin Papan comapenen cuidendac. Adoesa bëdiactsëc cuidendac —quepanëdash Esus abëd icquido chiec.

Nianten piucquid shocoshëmpi meniaid
(Mad. 12.41-44)

21 ¹Adashic, Nuquin Papa tabadte shubu uashunaid yacno tabadtuidash tsadquin Esusën isbampañdash. Ambi isaido Nuquin Papa tabadte shubu nacnemete cuidnu, quequin menequin aid shubun shocosh tabëcaidën aton na bedtequid utsin-utsinuiquen sandobededpañdash.

Aton na bedtequid dadpen icquidon dadpen sandobededsho isquimbi ²nianten aton na nibëdquidëmbi aton na bedtequid shocosh daëd ictsëcquid sandosho ispañdash. ^{3,4}Adosho isash: —Chuinu. Tantia. Nianten aton na bedtequid abitedimbo sandoposh. Adosho, Dadpen menequid nec, quequin Nuquin Papan niane isec. Utsibon aton na dadpen abi icnubi dadpen menesho, Daëdpactsëc menequido nec, quequin Nuquin Papan aid isoiaic —quepanëdash Esus.

**Abitedi naimbudte ushë
choec quequin chuite**

(Mat. 24.1-35, 42-44; Mad. 13.1-37)

⁵Adashic, Nuquin Papa tabadte shubu uashunaidbëdtabi matesën dectanaid didiquesho isec: —Nuquin Papa tabadte shubu bëdaidquio iquec —quepanëdash utsibo.

⁶Adoaquien: —Mimbi nëbi isaid yuecash niddëdquidendac. Matses utsibon nëid shubutedi chic-chicbudendac —quepanëdash Esus.

⁷Adoaquien: —¿Mitsipadën Nuquin Papa tabadte shubu uashunaid chic-chicquin tauapec? ¿Aid ushë anoentsëqui yanuc mitsipadquid ismiente icpeque? Tantikanu. Chui —quepanëdash utsibo.

⁸Adoaquien: —Cho-choshon muaquin chuisho tantienquiocta. Adquid cho-choash: “Nuquin Papan Chomiaid Quidistu nebique. Èbëd iquec cho,” queded-quededendac. Aden chuiquid tsibanenda. ⁹Adecbidi: “Cuesnancuededec,” queshe tantiash dacuëndenda. Nuquin Papan chiampicpadequi cuesnancuededteba iquendac. Aid icnubi abitedi naimbudte ushë badedquio choenquio iquendac —quepanëdash Esus.

¹⁰Aden chiequi abi onquebudec: —Adecbidi, abi ancaquid dapan nidmiac nidaid utsin icquidobëd cuesnancuededendac. ¹¹Adecbidi, nidaid utsi-utsiec yacno canchednuec ishcu-dishcudendac. Adecbidi, utsi-utsiec yacno bunquiotu iquendac. Adecbidi, utsi-utsiec yacno daicsabudnete iquendac. Adecbidi, mibi dacuëdmetequid iquendac. Adecbidi, mimbi isacmaid abucüesh natiambo icsho mimbi isbededendac.

¹²“Aidtedi choabicnuc ëbi tantiaquid utsi-utsien bedshun mëyanendac. Adobanshumbic, Icsamboen naquid nec, quequin muaquin icsaquid cuidnuequid yacno mibi buanendac. Utsi-utsien ancanquid yacno buanac ¹³aidotsen tantiaquid yantsiash queshun ëbi chuibanta. ¹⁴Aden buanaqui, ¿atotsimbi ancanquid cape? quequin tantiec tsadenda. ¹⁵Nuquin Papan Mayanën tantiamiacpadomboen mimbi chuibanendac. Adoac, Icsambocquid mibi nec, quetiapimbo mibi chieshënkuido iquendac. ¹⁶Adembidi, Nuquin Papan chiaid tantiesan min shubun icquidën mibi bedshun cuidnuequid yacno buanash: ‘Cuidquin cuesuneta,’ quependac. Aton papambi adotsiash. Animbi aton mado adembidi adotsiash. Utsi aton buchimbi adoatsiash. Utsi aton chuchumbi adoatsiash. Utsin abëdtan isedquidëmbi adoatsiash. ¹⁷Ëbi tantiaquid chieshënkuid dadpen iquendac. ^{18,19}Aden nabanquin mibi cuesunemenu, cac chieshenquio yec, Esus tantiaquid nebi, quequid icta. Adquid iquec unësash ënëdenquio yec Nuquin Papabëd mibi tabadendac.

²⁰“Adecbidi shubu dadpen icquid Edusaden caid yacno cuesanquid dadpen cho-choshon tsicatebudsho isash, Edusaden yacno naimbudte ushë

choec, quequin mimbi tantiendac.

²¹Aden tantiec ma Cadidia yacnocquido macuësh dapa yacno cuempanuna. Adecbidi, Edusaden yanocquido ma auëshquio cuempanuna. Adecbidi, dëuequido Edusaden yacno ma nidenquiocpanuna. ²²Aid ushë icnuc Nuquin Papan chiacpadomboen cuidtequid iquendac. ²³Aid ushë chonoc matses utsibon Edusaden yacno tsicatebudac pete naimbudnuc bacuë usunquidobëd bacuë chishmequido mëyadec natiaquendac. Edusaden yacnocquido abi tantiesabo icsho Nuquin Papan natiambocquin cuidte iquendac. ²⁴Edusaden yacnocquid utsi-utsien chështen cuesendac. Utsi-utsien bedshun nidaid utsi yacno buanshun matses utsibon yuatequido iquendac. Isadaidpembo Edusaden yacno tsicateboedo Edusaden yacno tabadendac. Nuquin Papa, Chën, quenquiocnoc adec tabadendac. Chën, quenuc nidendac.

²⁵“Adec Nuquin Papa, Chën, quian badiadën ushë, inchëshën ushë uispa chedo aidtedi ambi nadatiambocquin naid ismiantequid iquendac. Aid ismiente icsho isash, Uinsadpambo iquec, quec comapenec dacuëdec matsestedi tabadcuededendac. Acte natiambo chëuëdsho isash adquiecbidi comapenec dacuëdec matsestedi tabadcuededoaindac. ²⁶Adecbidi, uispa utsi-utsiec paëdted-paëdtednubi utsi-utsiec tididiquendac. Adsho isash matses dacuëdec padishendac.

²⁷Adnubini Nuquin Papan chomiaid matsesaid ëbi dasiuidaid bëchomauanquiec ushë chënquiacbimboec uëshëmbo yec nadatiambocquin nabanquidquio abu ushun ëbi budsho matsestedishun isbededendac. ²⁸Natiambocquin naid tauadoacscho isun, Nuquin Papa yacno

ëbi yuedte ushë chote anoentsëqui yanec, quequin bëdamboquin abuc isteneta —quepanëdash Esus.

²⁹Aden chuishumbic ambi chuiboed ushë chote tantiamenuen nadopanëdash: ³⁰—Cuëtempî bacuëacsho isash, Ënden suc seccuduquiac nëbi seta taëec, quequin matsesën tantiec. ³¹Adembidi ëmbi chuiboed icsho isun, Nuquin Papabëd tabadte ushë choec, quequin mimbi tantiec. ³²Abimbo chiembique. Tanti. Ëmbi chuibamboed naimbudabicnuc con tan matses isadaidbo naimëdbudenquo iquendac. ³³Abubëdta naimbudtequid nidaid nendac. Ëmbi chiaid abimbo iquendac.

^{34,35}“Adembidi chuinu. Tantiata. Nidaidën capuquidën, Nëbi ëbi sec, quequin tantienquo yec capusho badedquo siac cuentiapimbo iquec. Adembidi, Natiëte ushë choec, quequin tantienquo yec chieshquin badiadquidën-badiadquidënquien paëmbocquid actenepec. Adecbidi aton na bednuec abi buntequiduidi tantiec tabadpec. Adobanubien aid ushë choendac. ¿Matsestedî cuidte ushë choenda ictic? Ai, aid ushë choendac, quequin caimbudec bëdamboec tabadta. ³⁶Ënenquiocquin aid ushë chote caimbunec tabadquin Nuquin Papa naden chuidoneta. Chieshmane mibi tantiaquidquo ëbi icme, Papa. Adembidi natiambocquin cuidte ushë chonoshe qeshun ëbi mënichicta, Papa. Aid ushë chonoc ëbi bedshun mimbi chomiac matsesaidën dayun tsadquidquo ëbi icmeta, Papa, quec onquedeneta —capanëdash Esusën.

³⁷Aden chuishumbic, badiadquidën-badiadquidënquien Nuquin Papa tabadte shubu uashunaid yacno nidshun matses tantiamenuen Esusën chuided-chuidedpanëdash.

Adecbidi
inchëshquidën-inchëshquidënquiec macuësh Odibos caid yacno nidash tabadtenepanëdash. ³⁸Adembidi, badiadquidën-badiadquidënquien Esusën chuibansho tantianuequido Nuquin Papa tabadte shubu uashunaid yacno choded-chodedpanëdash.

Esus bedmenu, quequidquo Udas

(Mat. 26.1-5, 14-16; Mad. 14.1-2, 10-11; Uan 11.45-53)

22 ¹Adashic, nami uabicquid pete tantiëte ushë, Pascuas caid, anoentsëqui yampanëdash. ²Aid ushë choabicnuc isadaidbo tsusiobobëd Nuquin Papan naden nata quequin chiaid utsibo tantiamequido iccuededtenequin, ¿Mitsipaden Esus bedshun cuesuneque? Isnu, quequin isted-istedpanëdash. Aden isted-istedtanquin Esus tantiec datsidquido dadpen icsho isash dacuëdquin Esus bedenquo icpanëdash. ³Adnubien Udas cashumbic Iscadiote caid Esusbëd icquid dapuduedshun Satanasën tantiamiac ⁴Esus chieshënquid yampanëdash. Adquid yanash padiseyobo tsusiobo yec isadaidbo tsusio utsibo yec Nuquin Papa tabadte shubu uashunaid isquido yec quec Esus chieshënquid utsibo iquec quianec aido yacno Udas choash, Esus bedmete bunebi, quequin chuipanëdash. ⁵Aden chiaic isadaidbo tsusiobo bëdambo iquebi quetanquin: —Esus bedmiacsho mibi piucquid menenu —capanëdash Udas chuiquin. ⁶Adoquien: —Adonuna —quianec Esus yacno nidoash abëd capuquimbi Esus tantiec datsidquido nibëdacnoshon abi chieshënquido, isadaidbo tsusiobo, Esus bedmembi, quequin isted-istedpanëdash Udasën.

Ënquin nidaidëshun Esusën pebanaid

(Mat. 26.17-29; Mad. 14.12-25;
Uan 13.21-30; 1 Cod. 11.23-26)

⁷Adnubien, nami uabicquid pete tantiate ushë chopanëdash. Aid ushën isadaidbon bëyuc tishaid bacuë unës uanushe queshun obeca bacuëded cuesuneshun shubu shëcuë ëcnoshcaid isun unës uainquiocquin Nuquin Papan uaido mayan bëdabon matanampid tantiate ushë icpanëdash. ⁸Aid ushë chonoc Uambëdta Petedo chuiquin: —Matante ushë tantianuequin obeca bacuë cuesuniaid penun nacnenta —capanëdash Esusën.

⁹Adoaquien: —¿Mitsishumbimbi aid nacnempe? —quepanëdash Uambëd Petedo.

¹⁰Adoaquien: —Nëbi shubu daëdpactsëc yacno nidshun matsun acte bëquid dada mimbi bëquedendac. Aid bëquedshun tsibanane shubun aid puduedacno nidshun ¹¹shubun puduedabi naden shubu icbo chuita: ¿Mitsishumbimbi matante ushë tantiaquin ëbëd icquidobëdtan pepe? quiosh Esus, quequin chuita. ¹²Aden chiac abuc dectatoshon abuc quënëcquid mibi aidëmbi ismendac. Ashunquio penun nacnenta —capanëdash Esusën.

¹³Aden Esusën chiac nidaneshun Esusën chiacpadomboen istuidshun matamepampid ushë tantiaquin penun Uambëdtambi Petedon nacnempanëdash.

¹⁴Adashic, inchëshën choash abëd icquidobëd pete sante cuate dayun uequi Esus: ¹⁵—Ëbi mëyante yanabicnuc bëyuc tishaid cuesunianquidën cuesunenquiocquin matanampid tantiaquin pec mibëdi tabadtiaquio yanobi. ¹⁶Matanampid tantiaquin obeca cuesuneshun nuqui pebocpadomboen

mibëdtambi nidaidëshun padpiden penquio iquendambi. Matses icsaquid icsho cuidnushe queshun obecaded cuesuniaidpadquiocquid yanshun Nuquin Papa yacno choash tabadquidobëdtambi ashunquio pendambi —quepanëdash Esus.

¹⁷Adoshombic dëshote sananec Nuquin Papa chiec onqueshun actanquin abëd icquido menec: —Në, aniactse-aniactsen acban mibitedishun.

¹⁸Tiedën caniquid ënë nidaidëshun padpiden aquenquio iquendambi. Nuquin Papa yacno choash tabadquidobëdtambi ashunquio aquendambi —quepanëdash Esus.

¹⁹Adoshombic, pete bedshun Nuquin Papa chiec onqueshun cuësh-cuështanquin menebanquin: —Mibi icsaid bedshunacsho ëbided cuidquin mëyanquin cuesuniaid tantiaquin pebeded —capanëdash Esusën.

²⁰Adoshombic pete utsi petanquin dëshoten sicaid cushtoshon menec: —Ënden, Icsambocquin naombi, queshun obecaded cuesunemenuen isadaidbon menedeniac. Aden cuesuniaidën intac siquec unëso isun, Obeca cuesuneboed ëbi icsaquid icsho cuidnushe queshun cuidtequid nec, quiampicpaden abi chiec. Padnuen nëbi unës uashun siac aton intac siquec matses icsaid bedshunash Esusded cuidadac, quequin tantiatequidquio nendac. ²¹Ëbi chieshënquido ëbi bedmenuequin chuiquid pete sante dayun ëbëdi uec. ²²Nuquin Papan chiampicpaden ëbi matsesacsho unës uaid iquendac. Ëbi chieshënquido bedmenuequin chuiquid comapenen cuidte iquendac —quepanëdash Esus.

²³Aden Esusën chuisho tantiash abëd icquido: —¿Midacquidien capec? —quecuededpanëdash.

²⁴Adashic: —Doseted nuqui iquec. ¿Tsudain chuiquid icpec? quequin utsibon ispec —quepanëdash Esusbëd icquido.

Aden chuitanec, Chuiquid nec, quequin utsibon ëbi ispec, Esusbëd abitedi nëishash comapenec chushcanampanëdash. ²⁵Adec chushcanansho tantiash Esus nadpanëdash: —Isadaidpembo ancaquidën comapenen aton matses namebanquin daëdpactsëc menebanec. Aden meneshun, Ëmbi namiaido bëdambo icmequid nebi, quequin muaquin chiec. ²⁶Mibitedi adquid iquenda. Nadquidquio icta. Chuiquid nebi, quec tsyuec caniquidbimboecquid icta. Chuiquid icquin utsi namiacpaden nabanta. ²⁷Abi pemequid abi nashunquid nec. Adembidi pec tsadquid utsibo chuiquid nec, quequin utsibon ispec. Aden tantienda. Nëbi mibëdi pec tsadequi mibi nashunquid nebi. ²⁸Ëbi chieshënkuido icnuc ëbi nianesa ²⁹icsho con Pan ëbi chuiquid icmiacpadquid chuiquid mibitedi icmendambi. ³⁰Aden chuiquid icmiac ëbëd icquin ëbëdtambi peshun aquec mibitedi tabadendac. Chuiquid icquin abuc tsadte icquidën tsadquin isadaidbon naid bëdabëdta ambi naid icsa cuidte ëbëdtambi mimbi chuibanendac —quepanëdash Esus abëd icquido caic.

**Esus ëmbi isacmaid nec,
quequin Petedon chiaid**
(*Mat. 26.31-35; Mad. 14.27-31;
Uan 13.36-38*)

³¹Aden chuishumbic Esusën nadopanëdash: —Mibi chuinu. Bëdamboen tantia, Simon. Mibitedi Satanasën yuatiadquio iquec. Aden yuanuequin piacbo macuesquin nainshun bitsi secacimboen mëyantantquin ëbëd icboedi mibi

cuëshëdmetiadquio iquec. ³²Aden mibi Satanasën yuatiadquio iquec, quequin tantiaquin Nuquin Papa naden chiombi. Simon ëbëd icquidquio iqueque. Yuadnushe queshun Satanasën niac-niacmete chiaid Petedo tantienquio icmeta, Papa, quequin chiombi. Adec ëbëd icboedi cuëshëdtsembosh choashun comapenen ëbi tantiaquin ëbëd icquid utsibo adomboembidi comapenen ëbi tantiameta, Simon —capanëdash Esusën Petedo chuiquin.

³³Adoaquien: —Mibi caic, Quënën nauednu, quenuc mibëdi nauedadebi. Adecbidi mibi caic, Unës uanu, quenuc adecbidi mibëdi unës uadebi, Icbo —quepanëdash Petedo Esus caic.

³⁴Adoaquien: —Chuinu. Tantiata, Petedo. Cachina bënë cuëdanabicnuc nëid inchëshëmbi, Esus ëmbi isacmaid nec, mibi queded-quededendac —quepanëdash Esus.

**Buanenda, queboedëmbi,
Buanta, quequin chiaid**

³⁵Aden Petedo chuishumbic abëd icquidtedi chuiquin: —Mitsana bedtequid buanenquio yec shictoade buanenquio yec dashcute utsi buanenquio yec quec nidaneta, ëmbi cac nidash ãmibitedi bunecta tabado? —capanëdash Esusën.

Adoaquien: —Padenquio —quepanëdash abëd icquido.

³⁶Adoaquien: —Ënden adquid buanenda, queboedi, Ëbi nibëdnuc mitsana bedtequid shictoadebëdtabi buanta. Chështe bednu, queshun mitsana bedtequid nibëdnuc min dashcute abentsëc menequin chështe bedshun adembidi buanta, caimbi nëbi.

³⁷Nuquin Papan ëbi chuiquin dada uamiampid nad iqueque. Tantiata. Chuinu: “Icsambocquidbëdta unës uaindac,” quepampic. Aden Nuquin

Papan ëbi chuiquin dada uamiampicpadomboembi nëbimbobi naimbudembi —quepanëdash Esus.

³⁸Adoquen Esusën chuiboed tantienquo yec abëd icquido: —Në, chështe daëd iqueque. Is, Ico —quepanëdash.

Aden abëd icquidon tantienquiocsho isash: —Ai, padi —quepanëdash Esus.

Macuësh Odibos caid yacnoshon Esusën Nuquin Papa chiaid

(Mat. 26.36-46; Mad. 14.32-42)

³⁹Adashic, Edusaden caid yacnoësh macuësh Odibos caid yacno abi nidteniaccadën nidnuc abëd icquidon tsibanampanëdash. ⁴⁰Adec nidequi abi tabadteniagno choshon Esusën: —Chieshëmënnquidën ëbi namete bunacpaden natiapimbocquid ëbi icme, Papa, quequin Nuquin Papa chuideneta —capanëdash abëd icquido chuiquin. ⁴¹Aden chiashic abiuidtsëqui uano nidash danëshën nidaidën sebudash Nuquin Papa chiec nadec yuec Esus onquetan-onquetampanëdash: ⁴²—Mëyanquin mibi unës uanu, ëbi chieshënquidon casho tantiash bunenquo yec, Adoenda, quepatsiac mibi Papa. Adoshombic mibi bunacpadomboen nameta, Papa —capanëdash Esusën Nuquin Papa chuiquin. ⁴³Aden Esusën baded-badedquien chuishobi Nuquin Papan uaid mayan bëda choshon Esus chieshtomenquo icpanëdash. ⁴⁴Aden uidën uaqi adec uëshquec Nuquin Papa chuiquiequi ichacbëd intacash nidaidën siquepanëdash.

⁴⁵Aden Nuquin Papa chiashic nidtoash abëd icquido yacno choaquimbi ambi chuisho tantiaboed tantiec uimabudash ushec uesho istuidshun: ⁴⁶—¿Atotsi quiash ushe? Nidtosshon ëbi chieshënquidën nametiadquo yacpaden natiapimbocquid ëbi icmeta, Papa, quequin adenuidi

Nuquin Papa chuideneta —capanëdash Esusën abëd icquido chuiquin.

Esus bedaid

(Mat. 26.47-56; Mad. 14.43-50; Uan 18.2-11)

⁴⁷Adec Esus onquenubien Esusbëd icboedi, Esus bedmenu, quec bëyucanec matses dadpen bëec Udas chopanëdash. Adec choquimbi abi tanchoccanuesho isash: ⁴⁸—¿Ëbi matsesaid icsho bedmenuen tanchoccaquinda ëbi chieshënquido isme, Udas? —quepanëdash Esus.

⁴⁹Aden Udasën nac Esus bednuesho isash Esusbëd icquido: —¿Cho-choquido nuquida cuesten cuespe? —quec ⁵⁰onquetanquin abentsëcshun isadaidbo tsusio dapan yuan pabiate opioc pateshunepanëdash.

⁵¹Adosho isash: —Padi. Chën. Adoenda —quetanquin Esusën tsusio dapan yuan pabiate patiacno mishquin bédamepanëdash.

⁵²Adoshombic, isadaidbo tsusio dapabo Nuquin Papa tabadte shubu uashunaid isquido tsusiobobëda tsusio utsibo caic: —¿Matses cuëshëdmequid nec, qeshunda utsin-utsinquien chështe sananubi utsin-utsinquien cueste sananec cho-chopec?

⁵³Badiadquidën-badiadquidënquiec Nuquin Papa tabadte shubu uashunaid yacno icsho ëbi bedenquo mimbi icpoc. Mimbi ëbi bedte ushë nëidquiobi nendac. Satanasën tantiamicpaden utsibo ismenquiocquin inchëshëmbi mimbi icsa uanuen ëbi bedendac —quepanëdash Esus.

Ëmbi isacmaid nec, Petedo quiaid

(Mat. 26.57-58, 69-75; Mad. 14.53-54, 66-72; Uan 18.12-18, 25-27)

⁵⁴Aden mimbi icsa uanuen naindac, quequin Esusën chiacsho bedanquin isadaidbo tsusio dapan shubu yacno

Esus buanubi Petedo uano tsyuec chopanëdash. ⁵⁵Adec choec umanuc cuête dêtsiadaid cuêec utsibo tabadacno Petedo cuête cuêec tsadpanëdash. ⁵⁶Ambo Petedo tsadsho isash tsusion yuaid chido anoentsëqui choshon bëdamboen isec: —Nëid bëboedbëd icboedi nec —quepanëdash.

⁵⁷Adoaquien: —Bëboed ëmbi isacmaidquo nec —quepanëdash Petedo.

⁵⁸Adashic, yuecpactsëcshun Petedo isec utsitsen: —Ma mibi bëboedbëd icquid neyoc —quepanëdash.

Adoaquien: —Aidbëd iquenquo iccobi —quepanëdash Petedo.

⁵⁹Adashic yuec-yuecpactsëc ictanec utsitsen: —Nëid Cadidia yacnoshon tishaid iquec. Ma bëboedbëd icquidi neyoc —queopanëdash.

⁶⁰Adoaquien: —Mimbi chiaidbëd icquidpenquo nebi —quepanëdash Petedo. Aden chuinubien cachina bënë cuëdampanëdash. ⁶¹Adec cuëdanubi aton Icbon bidiadshun Petedo bëspanëdash. Adosho isun: “Nëbi, cachina bënë cuëdanabicnuc, ëmbi isacmaid nec, quequin tedesteden mimbi chiendac,” quequin aton Icbon chuiboed tantiash ⁶²unësquo yec umanuc nidash Petedo shubiquipanëdash.

Esus sondadon mamënshunaid

(Mat. 26.67-68; Mad. 14.65)

⁶³Adshumbic Esus cuenushe qeshun abi isquidon, sondadon, Esus mamënshumbedequin cuesbededpanëdash. ⁶⁴Adoshombic, dashcute cuëshaidën bëpucshun cuestanquin Esus sondadon nadopanëdash: —Mibi tantiaquidquo icquin ðmidaquidën mibi nëbi cuesequé. Tiantianu. Chui —capanëdash Esus chuiquin. ⁶⁵Aden cuesbededquin Esus icsamboen chuipanëdash.

Isadaidbo tsusiobo yacno Esus buanaid

(Mat. 26.59-66; Mad. 14.55-64;

Uan 18.19-24)

⁶⁶Adshumbic badiadnubi isadaidbo tsusiobo iccuededacno Esus buanshun ⁶⁷nënantanquio nidtomesho isash: —Nuquin Papan chomiaid, Quidistu caid, nebi, quecta ique? Tiantianu. Chui —quepanëdash isadaidbo tsusiobo Esus caic.

Adoaquien: —Ëmbi abimbo chuisho mibitedishun tantienquo iquendac.

⁶⁸Adembidi, ðMitsipadquidquo Nuquin Papan chomiaid neque? Tiantianu. Èbi chui, cac ëcbedenquo mimbi iquendac.

⁶⁹Nad iqueque. Chuinu. Tiantia.

Matsesash nidaidën tabadboedi ambi nadatiambocquin naidënquo Nuquin Papan dayunquo tsadendabi —quepanëdash Esus isadaidbo tsusiobo tantiamequin chiec.

⁷⁰Adoaquien: —ËNuquin Papan madombobi nebi, quequina chio? —quepanëdash isadaidbo tsusiobo Esus caic.

Adoaquien: —“Esus Nuquin Papan madombobi nec,” quequin abimbo chuiquid mibi nec —quepanëdash Esus isadaidbo tsusiobo caic.

⁷¹Adoaquien: —Nuquin Papan madombobi nebi, quequin ambibi chiec Esus muc nec. Aden chuisho icsambo iqueque. Unës uatiad, quequin tantiashun, Esus icsaosh, quequin chuitiadquiocquin chuita, cainquo iquembi utsibo chuiquin. Adquid iquec, quequin nuqui tantiec —quepanëdash isadaidbo tsusiobo.

Pidato yacno Esus buanaid

(Mat. 27.1-2, 11-14; Mad. 15.1-5;

Uan 18.28-38)

23 ¹Aden ambibi chiec Esus muc nec, isadaidbo tsusio abentsëc qesho tantiash isadaidbo tsusiobotedi

nidtoson Esus bedshun Pidato yacno buampanëdash. ²Aden Pidato yacno Esus bëec choash: —Esusën chuibansho tantiash, Cuëshëdmianquid nec, quequin mibi yacno bëombi. Nëid ancanquid dapa Sesadën, Shocoshëmpi bec cho, cac menenda quiosh. Aidbidi, isadaidbo chuiquid dapa nebi, quiosh —quepanëdash isadaidbo tsusiobo Pidato chiec.

³Adoaquien Pidato: —¿Isadaidbo chuiquid dapada ne? —quepanëdash Esus caic.

Adoaquien: —Mimbi chiaidquio abimbo iquec —quepanëdash Esus.

⁴Adsho tantiash: —¿Atotsi nashoembi cuidpe? Ambi icsamboen naid nibëdec —quepanëdash Pidato isadaidbo tsusiobo chiec.

⁵Adoaquien: —Ambi tantiamiaidënquio Cadidia yacnocquido nëishmiac comapenec cuëdcuededosh. Anoshon tantiameshumbic Edusaden yacno choshon adomboembidi tantiameoaposh —quepanëdash isadaidbo tsusiobo Pidato caic.

Edodes yacno Esus buanaid

⁶Aden chuisho tantiash: —¿Nidaid Cadidia yacnoësh choquidta Esus nec? —quepanëdash Pidato.

⁷Adoaquien: —Ai. Cadidia yacnoësh choquid Esus nec —quepanëdash. Aden chiac Esus ancaquid Edodes nec, quequin Pidaton Edodes yacno Esus buamepanëdash Edusaden yacno Edodes choash tabadec, qesho tantiashun.

⁸Aden Edusaden yacno abi yacno bëacsho isash Edodes, Yuen Esus iste bunec nëbi bëdambo iquebi, quequin ëquëducshun tantiapanëdash. Nadatiambocquin nabanquidquio nec, quequin isquidon chiac Edodes Esus isec, Nadatiambocquin napashun. Isnu,

quequin ambibi tantiec ⁹Esus chuimenu quec Edodes onquepanëdash. Adoaqui Esusën ëcbedenquio icpanëdash.

¹⁰Adnubien isadaidbo tsusiobo: —Esus icsambocquid nec —quepanëdash comapenec onquec Edodes chiec.

¹¹Adoac Edodesbëd sondado Esus icsamboen chuiquin mamënshumbededshumbi chuiquid dapan dashcutebimboecquid abichobicquid Esus dasiunshun Pidato yacno buameoapanëdash. ¹²Mimbi tantiacpaden Esus cuidta, quequin Pidato chuita, quequin Edodesën chuitanquin Pidato yacno Esus padpiden buamepanëdash. Adoac Edodesbëd Pidato bëdambo yampanëdash.

Esus cuesten dectameta quiaid

(Mat. 27.15-26; Mad. 15.6-15;

Uan 18.39-19.16)

¹³Adashic, isadaidbo tsusiobobëdta isadaidbo utsibo chomeshun ¹⁴Esus ismetanquin Pidaton nadopanëdash: —Nëid dada bëash: “Cuëshëdmianquid nec,” quequin mimbi ëbi chioc. Adoac aidbëdi onquiash, ¿Cuëshëdmianquidta nedic? quendabi. ¹⁵Aden ëmbi tantiacpadomboen tantiaquin Edodesën ëbi yacno chomeoaposh. Esus unës uainquiocquidquid nec. ¹⁶Aden tantiaquin mëyanshun aidi nidmenuna —quepanëdash isadaidbo tsusiobo caic.

¹⁷Aden chiac naden isadaidbon tantiapanëdash. Setan-setanquien icsambocquid con matses quënën nauedaid abentsëc ambi nidmiacpaden nëbi adquid utsi Pidaton nidmetsiash, quequin tantiec isadaidbo nadec cuëdcuededquin: ¹⁸—Nëid Esus caid unës uatiadquid nec. Mimbi quënën nauednëdaid Badabas cuëmëdquid puduemeta —capanëdash comapenec cuëdcuededquin isadaidbon.

¹⁹Ancanquid bunenquiocquin utsibo cuëdcuededmiondaidd utsi cuesuniondaiddidi Badabas icsho quënën nauedmepanëdash.

²⁰Adec isadaidbo cuëdcuededsho tantias Esus nidmetiadquio iquec: —Esus cuidenquioctiadquidi nec —quepanëdash Pidato isadaidbo caic.

²¹Adnubien: —Cuesten dectame —capanëdash isadaidbon yuec comapenec cuëdcuededquin.

²²Adec cuëdcuededsho tantias: —¿Atotsi canun, Cuesten dectame, cai? ¿Atotsi icsamboen nasho isun mimbi chieque? Chui. Tantianu. Ma unës uainquioctiadquidi neyoc. Aden tantiaquin mëyameshun Esus nidmembi —quepanëdash Pidato.

²³Adoaquien: —Cuesten dectame —quepanëdash cuëdcuededoaic isadaidbo Pidato, Ai, camenuc.

²⁴Adoac iccuededquidon chiacpaden namenuen ²⁵Pidaton: —Utsi cuesuniondaidd Badabas puduemeshun Esus cuesten dectameta —capanëdash Pidaton cuesten dectamënquido chuiquin.

Esus mëyanaid

(Mat. 27.32-44; Mad. 15.21-32;
Uan 19.17-27)

²⁶Pidaton, Esus cuesten dectameta, cac sondadon abi dectante cueste Esus buamequimbi Simon, Sidene yacnoshon tishaid, chosho bëquedtuiddtanquin Esus dectante cueste Simon buamiac Esus tsibambëpanëdash. ²⁷Adec Esus nidsho isun matses dadpeshun shubiquin tsibanampanëdash. Adembidi abi tsibanquid chidobo icpanëdash. ²⁸Adec chidobo abi tsibanec shubisho tantias bidiaidshun isec Esus: —Ëbi tantiec shubienda, Edusaden yacnocquidon chidobo. Mibibi tantiadec min bacuëbobëdta tantiec shubicuededta.

²⁹Yuecash mëyantequid ushë choendac. Aid ushë chonoc bacuë tishtiapiimbocquid caic utsibo nadendac: “Bacuëbo nibëdquid icquin min bacuëbo natiasho isenquio mimbi iquec. Adquid yec bëdamboshë mibitedi iquec.”

³⁰Mëyantequid ushë chonoc matses utsibon natiambocquin mëyanaqui naden mimbi Nuquin Papa chiendac:

“Natiamianquieque. Acte quiusudquid macuësh dapa catashmetabi, Papa, mibi quendac.

Adecbidi, Acte quiusudquid macuësh masiametabi, Papa, utsi queoaindac.”

³¹Ëbi buansho isec shubiequi, Ëbi mëyantequid ushë choec, quequin tantiesa mibi ipec. Nëdënquenquioctiadquidi achuëshquiocquid nëdëncasho isash: “¿Tanunquiocquid badedquio nëdënquenquio ipec,” quecta mibi icti? Adembidi: “Cuidenquioctiadquidi nec,” queboedëmbi ëbi icsaisa unës uasho isash: “¿Ëbitedi icsambocquid comapenen cuidenquio ipec,” queoaspecta mibi ique? Ai, quequin tantiatiad —quepanëdash Esus.

³²Adnubien Esusbëdta icsambocquid dada daëd nidmequimbi ³³macuësh mapi canite caid yacno choshombi ëquë daëd dectambudcuentanquin nënantanquio Esus dectampanëdash. ³⁴Dectanac diadequi Esus Nuquin Papa caic: —Ëbi unës uanuequidon tantienquiocquin unës uainquioctiadquidi cuesten dectanoshibique. Aidon icsamboen nambo yacximboec bëpiscudta, Papa —quepanëdash. Adnubic Esusën dashcute bednuequin sondadon dada uashun tëchun sandoshon cadotanequin dada uatempi puduemebanquin isquin Esusën dashcute bedbampandash.

³⁵Adnubien matses dadpeshun isnubi Isadaidbo tsusiobo isec tabadquin mamënschumbededec: —¿Utsi-utsien Nuquin Papa yacno yuedanquidta nec? Aidi matses mënchictequid Nuquin Papan chomiaidquio iquec abibi budtiadquidi diadpec. ¿Ada budeque? Isnu —quec onquecuededpanëdash.

³⁶Adembidi sondadon mamënschumbededquin paëmbocquid mucambocquid sananquin Esus ismequimbi: ³⁷—Isadaidbo chuiquid dapa iquec unësenquio iquebi, quiash nëid bednush bud —capanëdash sondadon.

³⁸Adnubic, abi dectanaid cuesten mapino abuc matoccaid Pidaton Esus chuiquin dada uamiaid nad icpanëdash: “Nëid, isadaidbo chuiquid dapa nec,” quequin dada uashun Esusën mapino dectamepanëdash.

³⁹Adnubien, Esus icsamboen chiec icsambocquid Esusbëdta dectamboed abentsëc: —¿Nuquin Papan chomiaid, Quidistuda ne? Adquid icquin mimbi budmiac ëbi daëdi mibëd budebi —quepanëdash abëd diadquid.

⁴⁰Adec Esusbëdta dectamboed abentsëc onquesho tantiaish aidbëdta dectamboed utsi: —¿Aidi unës uatequid yacpadquid mibi yec, Nuquin Papan ëbi cuidendac, quec dacuëdënenquioda mimbi icpe? ⁴¹Icsamboen nabanacsho cuidaid ëbi daëdi nec. Aidi bëdambocquin nabanquid icsho cuidenquioctiadquidi nec —quepanëdash.

⁴²Aden chiashic Esus caic: —Mibi yacno choash chuiquid dapa icquin ëbi bëdamboen tantiaquin nata —quepanëdash Esusbëdta dectamboed utsi.

⁴³Adoaquien: —Abimbo chuinu. Tantia. Nëid ushëmbi abuc ëbi bëdamboec tabadacno ëbëdi mibi

iquendac —quepanëdash Esus abëdta dectamboed abentsëc chiec.

Esus unësaid

(Mat. 27.45-56; Mad. 15.33-41; Uan 19.28-30)

⁴⁴Adec onquenubi ushë cuembo yanuc bëtinacbimboec inchëshquio yashic ushë budtsan chënquedoapanëdash.

⁴⁵Inchëshquio icnubi Nuquin Papa tabadte shubu uashunaid yacno puduedtemaid quënën dashcute bitsipambocquid tsincabudquin dectanëdaid tembi daëdquio yec canchedbudcuempanëdash. ⁴⁶Adnubien unësbudec comapenec cuëdec: —Mibi yacno ëbi yuedta, Papa —quiash Esus unësbudpanëdash.

⁴⁷Adec Esus unëso isequi ambi isboedtedi tantiaquin Nuquin Papan naid chiec sondado chuiquid: —Abimbo chiosh. Cuesten dectanaid Esus caid bëdambocquid niosh. Aidi unësenquioctiadquidi unës uaposh —quepanëdash. ⁴⁸Ambo tabadquin isquid utsibo Esus unëso isash unësquio yec aton shubuno nidanepanëdash.

⁴⁹Aido nidnubien nidaid Cadidia yacnoësh choshon chidobon Esus tsibanamboedon dadabëdtambi uano tabadquin isbededpanëdash.

Esus nauedaid

(Mat. 27.57-61; Mad. 15.42,47; Uan 19.38-42)

⁵⁰Adnubic, ambobi dada, Ose cuëmëdquid, isadaidbo tsusio utsibobëd iccuededquid abentsëc bëdambocquid icpanëdash. ⁵¹Isadaidbo tsusio utsibo, Esus unës uatiadquidi nec, quenubi, Padi. Unës uainda, quepanëdash Ose. Aidi nidaid Udeya caid shubu dadpen icquid Adimateya caid yacnoshon tishaid icpanëdash. Aidi Nuquin Papan chomiaid chuiquid dapa iste bunquin

cainquidquo icpanëdash. ⁵²Aidi Esus unëso isash Esusën dada nauedtiadquo yec Pidato yacno nidshun ambi tantiapaden Osen chuipanëdash.

⁵³Aden chiaquien Pidaton: —Adotan —cac nidshun Esusën dada imbudshun dashcute ushumboquidën dataneshun buanshumbic ambi macuësh cuënote shëcuë nacnenaid chucanquo Esus Osen badequo nauedpanëdash.

⁵⁴Inchëshbudtsëqui seis yanuc chonoattemaid ushë nec, qeshun Esusën dada Osen nauedpanëdash.

⁵⁵Adnubien: Naudenu, quequin Osen buansho isun Cadidia yacnoësh Esusbëd choboedon chidobon tsibanshun shëcuën Esusën dada Osen nauedsho aidon isbededpanëdash. ⁵⁶Aden isash aton shubuno nidaneshun noadte bëda Esusën dada danoshcanu qeshun danoshquete chidobon nacnempanëdash. Nacnenash inchëshbudtsëqui seis icnuc Nuquin Papan chiapadec chonoattemaid ushë nec, quiaish Esus nauedacno nidenquo yec tabadpanëdash. Nuquin Papan chiapadec tabadpanëdash.

Esus uinciente

(Mat. 28.1-10; Mad. 16.1-8; Uan 20.1-10)

24 ¹Adashic, sabado inchëshbudtsëqui seis yanuc chonoattemaid ushë naimëdan badiadnuc danoshcanun ambi nacnemboed buanec Esus nauedbocno isec chidobo nidpanëdash. ²Ambo choshon Esus nauedshun bëtashaid cuënote shëcniacsho isashi ³shëcuën puduedash aton Icho Esusën dada nibëdsho isec tabadpanëdash. ⁴Adec tabadnubien dada daëd dashcute dasiuidac bimboec dasiuidash chënquec chopanëdash. ⁵Aid isash dacuëdcuëdedequi isenquo yec chidobo tabadpanëdash. Adsho isash dada daëd:

—¿Atotsi canuen unësacsho nauedac uincueniaid nibëne? ⁶Nëmbo nauedboedi nibëdec. Aidi uincuenaccosh. ¿Aidi Cadidia yacno mibëdi tabadquin chuisho tantienquioda icco? ⁷Naden Esusën mibitedi chiondash: “Matsesaid ëbi icsho bedshun icsambocquid ëbi menendac. Aden meniac cuesten dectanac daëdec ushtanec uincuenoabi,” quequin Esusën chiondash —quepanëdash dada daëd chidobo caic. ⁸Aden chiac chidobon Esusën chiaid abi bëpiscudaaid padpiden tantiapanëdash.

⁹Aden tantiash Esus nauedaid shëcuë yacnoësh puduenanec Esus tantiaquid dadpen tabadacno choec puduedshun ambi isboedbëdtabi ambi tantiaboed chidobon chuibampanëdash. ¹⁰Madia shubu dadpen icquid Mactada caid yacnoshon tishaid yec Uana yec Madia utsi Uambëdtan Acobon tita yec chido utsibo yec quec choshon Esusën ëbi chuibeneta caido chuipanëdash. ¹¹Aden chuisho tantiash: —Mimbi chiaid tantiatiapimbo iquebi —quecuëdedpanëdash iccuëdedquido. ¹²Adnubien Petedo nidtoanec titinquec nauedaid shëcuë yacno choash shuebudquin shëcuë anisquin dataniaid dashcuteuidi uesho ispanëdash. Aden isanec nidequi: —¿Atodain nechitec? —quepanëdash Petedo tantienquo yec.

Emaus yacmi nidte

(Mad. 16.12-13)

¹³Adashic abi ushëmbi Edusaden yacnoësh utsibobëd iccuëdedboed dada daëd shubu daëdpactsëc icquid Emaus caid yacno nidpanëdash. ¹⁴Adec nidequi ambi Edusaden yacnoshon isboedbëdta ambi tantiaboed chiec onquepanëdash. ¹⁵Aden chiec onquec nidshobi Esusën aid daëdi chinunash aidobëd

nidpanëdash. ¹⁶Aden abi chinuntuidsho isac utsibimboec Esus isadpanëdash.

¹⁷Adec nidequi Esus: —¿Atotsi chuibanec onquec nide? —quepanëdash. Adsho tantiash unësquo yec mamënenquo yec nidtuidpanëdash.

¹⁸Adec nidtuidash Quëdeyopas cuëmëdquid: —¿Edusaden yacno tabadtuidquin anoshon naboed mimbiuidtsëqui tantiamboda icco? —quepanëdash Esus caic.

¹⁹Adoquien: —¿Atotsi naid chiec ne? —quepanëdash Esus.

Adoquien: —Esus Nasaded yacnoësh choquid chiec nebi. Aidi Nuquin Papan ambi chiaid chuimiaid icquin ambi chuibaniaid ambi nabanaidbidi Nuquin Papabëdtan matses dadpeshun bëdamboen isaid icposh. ²⁰Nuquin tsusio dapabobëdtan nuqui chuiquid utsibon Esus bedshun: “Unës uata,” quequin isadaidpembo chuiquid meniac cuesten decantanquin unës uaposh. ²¹Nëbi chuiquid dada isadaidpembo iquenquiocpashun, quequin Esus isadaidbo yec isadaidbo chuiquid dada ictsiash quequin ëbitedishun tantiapombi. Ëmbi caboedi unës uaposh. Aidi unës uan daëdec ushobi. ²²Adec daëdec ushun dacuëdanquiecnuc chidobon naden chuibededposh: “Esusën dada nauedbocno badiadnuc nidshun isac ²³nibëdosh. Ambobi icnubi Nuquin Papan uaido mayan bëdabo daëd icsho isac, ‘Mimbi nibënaid nibëdec. Uincuenac,’ quiosh,” quequin chidobon chuiposh. ²⁴Aden chidobon chuisho tantienquo yec ëbëd icquido Esusën dada nauedbocno nidshun chidobon chuibocpadembi unës uaboed nibëdsho isposh —quepanëdash ambi chinunaido Esus chiec.

²⁵Adoquien: —Ma bëdiactsëc tantiaquid mibi daëdi neyoc. Nuquin Papan ambi chiaid chuimiaidon dada uampid bëdiactsëc tantiatsec tantiesabidi

ma mibi neyoc. ²⁶¿Bëdamboec tabadacno chuiquid dada icnuec Esus mëyanaidba iquendactiosh? —quepanëdash Esus.

²⁷Aden chuibanquin Moisesën dada uampidbëdtabi Nuquin Papan ambi yuecshun nanun chiaid chuimiaidon dada uampid tantiamequin Esusën chuibampanëdash.

²⁸Aden chuibanequi shubu daëdpactsëc icquid Emaus caid yacno anoentsëqui choshon

datanshobimboecnuc Esus isun:

²⁹—Inchësheque. Nëmbo ëbi yacno tabadec cho —abi daëdshun cac nidash aidobëd tabadpanëdash.

³⁰Adashic, shubu nuntan pete sante dayun abëdi uequin pete bedshun Nuquin Papa chuishun cuësh-cuëshun Esusën menebampanëdash. ³¹Aden nasho isun badedi, Esus nec, quequin tantianubi Esus nibëdquo yampanëdash. ³²Adsho isash: —¿Podquedën choquin Nuquin Papan chiaid dada uampid chuisho tantiash, Bëdambo yanobi, quenquiodabi ëbi daëdi ictio? —quepanëdash Esus yuedquido.

³³Aden chuitanequi Emaus yacno choboed daëd badedi Edusaden yacno nidoapanëdash. Edusaden yacno choash Esusbëd icquido 11tedbëdi utsibo iccuededacno puduedacsho isash:

³⁴—Abimbo iquec. Nuquin Icbo uincuempaccosh. Uincuenanec choquin aidëmbi Simon ismetuidposh —quepanëdash iccuededquido. ³⁵Aden iccuededquidon chuisho tantiashun Emaus yacnoësh choaboed daëdshun Esusën abi chinunshun chiaidbëdta ambi pete bedshun Esusën cuësh-cuëshbamboed chuipanëdash.

Abëd icboedo yacno Esus chote

(Mat. 28.16-20; Mad. 16.14-18;

Uan 20.19-23)

³⁶Adec onquecuedednubi nënantanquo choshon Esusën:

—Nuquin Papan bēdamboen isaido yec dacuēdenquoio yec tabad —capanēdash.

³⁷Adec aid chosho isash: Podo bitsi nec, quec dacuēdequi abēd icquido tabadpanēdash. ³⁸Adsho isashien Esus: —¿Atotsi quiash, ¿Esusida nepec? mibitedi quepe? ³⁹Con mēdantebēdta con taē is. Ēbibi nebique. ¿Mētoccaid taēbēd chiuē nibēdecta ye? Mishec cho. Ēbi yacpadquid canitebēd nami icquid podobitsi nibēdec —quepanēdash Esus abēd icquido chiec.

⁴⁰Aden chuitanquin abi bēchun shuin mētoccaid chiuē aton mēdantebēdta aton taē Esusēn ismepanēdash. ⁴¹Aden ismiac, Aidquiobi nec, quenquoio yec abēd icquido mamēncuededquin isec bēdambo yanec, Adec uincuentequidshenda dectampaccosh, quequin tantiec tabadpanēdash. Adec tabadsho isun: —¿Ada pete iquec? —Esusēn caquien ⁴²nuēcquid shēaid cuēshē menepanēdash. ⁴³Aden meniac bedshun Esusēn pepanēdash abēd icquidon isnubi.

⁴⁴Aden piash: —Mibēd icquimbi naden chuipombi: “Nuquin Papan ēbi chuiquin ambi naden nata quequin Moises dada uamiampidbēdta ambi yuecshun nanun chiaid dada uamiampid naimbudtenendac,” quequin chuibanombi —quepanēdash abēd icquido tantiamenuēc. ⁴⁵Aden chuishumbic abēd icquido tantiamequioquin: ⁴⁶—Nuquin Papan dada uamiampid nad iquec: “Nuquin Papan chomiaid, Quidistu caid, matsesēn mēyanquin unēs uaqui daēdec

ushash uincuenendac. ⁴⁷Aid tantiashun mibi icsaid mimbi ēnsho isash, Icsaquid nec, quenquoio yec mibi icsaid Nuquin Papa bēpiscudendac, quequin Edusaden yacnocquidoba ēbi tantiaquidon chuibanendac. Aden Edusaden yacnocquido chuishumbic nidaid utsi-utsiec yacno nidshun adomboembidi chuibanoinadac. ⁴⁸Mēyanquin unēs uaqui ēbi uincuenacsho mibitedishun ispec. ⁴⁹Aden isun tantiaquido mibitedi icsho Nuquin Papan ambi mibitedi menenu caid aton Mayan chomendambi. Aidi Nuquin Papan nadatiambocquin natequid iquec. Aid mibitedi meniabicnuc Edusaden yacnoshon aidi caimbudta,” —capanēdash Esusēn.

Esus abuc indote

(*Mad. 16.19-20*)

⁵⁰Adashic, bēyucanec nidequi Betania yacno anoentsēqui choash nidtuidshun aton mēdante abuc sananquin ismec: —Nēidtedi bēdamboen ista, Papa —quepanēdash Esus. ⁵¹Aden chiacsho abēd capucuenequido niamequin Esus aton Papan abuc indopanēdash. ⁵²Aden indosho isash, Ēbitedishun icbo nec, quequin ismec shuebudash: —Bēdambo iquebi —quianec Edusaden yacno nidanepanēdash. ⁵³Adec Edusaden yacno nidoash tabadec Nuquin Papa tabadte shubu uashunaid yacno badiadquidēn-badiadquidēnquiec nitted-nittedquin Nuquin Papan naid chuidenepanēdash.

Padi. Aidedtada dada uaombi, Teyopido.